


P. S. P A L L A S
MISCELLANEA
ZOOLOGICA.



P. S. P A L L A S
M E D I C I N Æ D O C T O R I S
M I S C E L L A N E A
Z O O L O G I C A

Quibus novæ imprimis atque obscuræ
A N I M A L I U M S P E C I E S

D E S C R I B U N T U R

E T O B S E R V A T I O N I B U S I C O N I B U S Q U E
I L L U S T R A N T U R.



— Juvat integros accedere fontes
Atque haurire, juvatque novos decerpere flores.
LUCRET. de nat. rer. Lib. IV.

H A G E C O M I T U M,
A P U D P E T R U M V A N C L E E F;
M. D C C . L X V I.

3 А - И - Т - А - 9

СИЮДА ПРИЧУПЫ

ДЕШАЛДЕСИМ

АРХИОДОС

СИЮДА ПРИЧУПЫ

КИДАЧА КИДАЧА

СИЮДА ПРИЧУПЫ

СИЮДА ПРИЧУПЫ

СИЮДА ПРИЧУПЫ

QL
3
P16X
1766
C 3
SCHWAB

CELSISSIMO AC SERENISSIMO
ARAUSIONIS ET NASSAVIÆ
PRINCIPI
GUILLEM V.
HÆREDITARIO
FEDERATÆ BELGICÆ
GUBERNATORI,
ET
SUMMO TERRA MARIQUE
IMPERATORI
&c. &c. &c.

UM ea sit Litterarum in Belgio felicitas , ut de re nato *AURIACÆ Domus* splendore , tamquam de propitio quodam sidere , congratulari sibi denuo pos sint ; post auspiciatissimam maxime illam diem , qua TU , CELSISSIME PRINCEPS , Imperium feliciter capeſſivisti ; Ante omnes certe utilissima humano generi *Scientia Naturalis* TUO sub Numine aurea ſæcula exſpectare debet . In Batavo hæc olim diligenter culta ſolo , ad Gallos & Suecos deinde transmigraverat . Verum AUGUSTISSIMA TUA MATER ,


artium atque litterarum , dum viveret , non modo Fautrix , sed & *IPSA* , gloriosissimo exemplo , insignis Magistra , in Bel- gium revocavit eam , & ornatissimum undique conquisitis Naturæ gazis Museum , tanquam Templum eidem dedicavit . TU , cui felix India sceptræ sua tendit & Naturæ foecundos pan- dit sinus , perficies , quod *DIVA MATER* incepit , opus . Ne- que enim *IPSE* , inter gravissima quæ animo volvis negotia , Naturæ Scientiam beneficiis & favore TUO ornare desisti . Imo summa quoque clementia laborum in eo genere meo- rum hocce specimen , tantis quamlibet impar auspiciis , designa- tus haud es , sed ardua auro annuisti . Accipe ergo TUA sub umbra natum Opusculum , magna pro parte e ditissimo ani- malibus *Vivario* & *Museo* TUO decerptum ; accipe , non ta- le , quod TANTO PRINCIPI inscribi dignum fit , sed quale juvenis præstare potui , & saltem devinctissimi animi monumen- tum futurum . DEUM O . M. oro ut TE , SERENISSIME PRINCEPS , in perpetuum fospitet !

C E L S I S S I M O A C S E R E N I S S I M O T U O N O M I N I

Hæc Comitum
A. D. XV Kal. Novembris.
M. DCC. LXVI.

Devotissimæ
P. S. PALLAS.

P RÆ-



P R A E F A T I O.

ARRISIT mihi semper institutum Candidissimi & Clari olim Viri CAROLI CLUSII, quo in eximio EXOTICORUM opere, quæcunque per vitam digna & nova passim summo, quo pollebat, judicio observasset, in Scientiæ naturalis emolumentum fideliter simpliciterque prodidit, doctissimis suis & apis commentariis singula illustrans. Nihil enim studio huic nostro perniciosius esse reor, quam, quod multi solent, Bibliothecas spissis voluminibus obrue-re, in quibus saepe vix invenias, quod unam alteramve plagulam novis & dignis observationibus bene adimpleat, dum reliqua compilatio farrago quantum libro voluminis, tantundem scientiæ novi impedimenti infert. Scilicet ex aliorum operibus transcribuntur necessaria, corrumpuntur passim & saepe male applicantur a compilatore etiam judicio & scientia pollente. Fatum inde est, ut hodie plurimum temporis Naturæ studiose terendum sit in conciliandis & castigandis auctorum hallucinationibus, transpositionibus, & in conquirendis per magna volumina spar-sissimis observationibus scriptorum propriis.

Qui sic festinanter Naturæ codices compilant, qui Faunas ins-tiles,

ties, qui systemata claudicantia fundunt, si immortale Clusii exemplum secuti, in observatis caste tradendis, in adornandis paucularum specierum, quas incognitas sciverint, descriptiōnibus & iconibus potius defudassent; multo nitidior & perfectior hodie existeret Scientia naturalis & minus laboraretur in appellatioñibus centies translatis & mutatis, reliquisque compilatioñum vitiis. Neque ansam hodierni dediſſent detrectatoribus, Naturæ cognitionem nominum scientiam appellandi.

Hæc sunt, quæ primum impulerunt me, ut laborem molirer, cuius hic primum sifo specimen. In Belgio triennio fere abhinc advena summa humanitate a Curiosis & Scientiæ Patronis exceptus fui. Ditissima abinde, quibus Batavæ urbes gloriantur, Rerum naturalium Musea in hoc genus studii ardentiſſimo mihi liberaliter patuerunt. Indoctus ante & in exoticis imprimis tiro, affidua horum perlustratione quo plus proficiebam, tanto magis adcreſcebat desiderium servatas innumerās in Cimeliis istis Naturæ divitias, quarum mihi apud autores vel prorsus nulla, vel imperfecta vestigia occurrebant, publico quodam monumento celebrandi &, datis rerum, præſertim e regno animali, curiosiſſimarum descriptionibus atque iconismis, quæ possem ad Scientiæ incrementum conferendi.

Biennium fere est, quod de edendis hujusmodi Miscellaneis Zoologiciſ. serio cogitare cœpi, adhortantibus plurimis humanissimis Viris & e Museis suis rariora quævis generose suppeditantibus. Et sic sane multo citius processiſſet suscepitum opus, ni alienis ſe-

pe

pe discentus negotiis & Chalcographorum imprimis negligentia tardatus fuisset. Quale tandem prodeat, Lector, vides, etiam nunc quoad Icones, post tædiosissimas earum emendationes & mutationes innumeratas, non ad mentem meam satis vel nitidum, vel castigatum. Neque dubito Fasciculos, qui huic primo, si is secunda navigaverit aura, succedent, & promptius & melius in lucem enisuros. Omne enim principium arduum est.

Si Commentariolos species, pro viribus egisse me Lectori facile persuadebo. Nec laborem huncce meum defectibus laborare negabo. Modo ad augmentum Scientiæ naturalis quædam notatu non indigna neque lectu injucunda contulisse dicar. Et hac ni fallor gloriola me exuet nemo.

Descripsi quædam, & in posterum describam, apud autores jam obvia, vel quia leviter adtigerunt illi, vel quod nova addenda habeo. Incognitarum tamen rerum pars major erit. Et in ipsis etiam quæ, nota prius, retracto, fere sine eorum quæ apud alios occurruunt repetitione, nisi ea ad rem necessaria sit, ago. Opportunitatis locis generum vexatiorum characteres & in hoc dedi volumine & in proximis dabo, addita etiam specierum eo referendarum mihiique cognitarum enumeratione. Sique circa species successive describendas, post editam earum historiam, plura & notabiliora forte rescrivero, aut passim, quod in his vix evitari potest, errores commisero, sequentibus voluminibus ea candide tradentur atque emendabuntur.

Publicum grati animi testimonium debo Patronis optimis atque Amicis, quorum humanitati plurimam hujus Libelli materiam debeo. E quibus imprimis nominandi mibi veniunt Vir nobilissimus atque gravissimus ABRAHAMUS GEVERS Urbis Roterod. Consul & Acad. Cæsareæ Membrum, tum Incliti Viri HIERONYMUS DAVID GAUBIUS & JOHANNES BURMANNUS, nec non Viri Celeberrimi ac doctissimi CORNELIUS VAN HOEY M. D. Senator & Poliater Haganus, LAURENTIUS THEODORUS GRONOVIUS J. V. D. Leydensis Senator, cet. JOHANNES ALBERTUS SCHLOSSER Medicus Amstelodamensis clarissimus, cet. aliique. Ante omnia vero exquisitis laudibus extollenda est Eximii Viri ARNOLDI VOSMAER Museo Seren. Principis Præfecti, Acad. Cæsar. Membri & in Reg. Gall. recitati, summa in me benevolentia, qua mibi non ad incomparabiles modo Rerum naturalium Thesauros sue curæ feliciter demandatos, sed propriam quoque Bibliothecam ad scientiam naturalem apprime instructam humanissime aditum semper concessit, quibus sine auxiliis nunquam vel nuper edito de Zoophytis Opusculo, vel novis hisce laboribus parem me futurum fuisse lubens fateor. Refero quoque grates Candidissimis VIRIS qui pro secundo jam Miscellaneorum fasciculo observationes, icones & ipsa e Museis suis specimina liberaliter contulerunt, quorumque suo loco favor celebrabitur.


Cum jam prior hujusc Libelli pars impressa esset, Clariss. VOSMAER, cuius in me voluntatem modo commemoravi, exsequi cœpit

*cœpit propositum, quod dudum animo conceperat, MUSEI SERE-
NISSIMI PRINCIPIS rariora iconibus & descriptionibus
illustrandi. Quandoquidem inter Iconum suarum primas rariissima
illa Apri species, quam in meis quoque descripsi, quæque ab ÆLIA-
NO (hist. anim. lib. 5. cap. 27.) proditus, Æthiopiæ tributus Sus
cornutus AGATHARCHIDIS aut tetracerus DINONIS apud eun-
dem (lib. 17. cap. 10.) videri posset, exspectanda est; monendum
hoc esse censui, ne quid deesset historiæ curiosissimi hujus animalis,
quatenus nunc præstari potest.*

*Antequam Præfatiunculæ coronidem imponam aliqua, monenda
sunt, quæ in Descriptione ANTILOPES Grimmiae, postquam
typis jam exarata effet, ex iterata observatione didici corrigen-
da effe.*

*Dixi nempe pag. 14. hujuscem Libelli, materiem in valleculis
subocularibus ANTILOPES Grimmiae satis liberaliter exsudan-
tem, inodoram deprehendisse me. Et omnino quidem frigidiori
tempestate aliquoties vix quicquam odoris percipere potui. Iter-
ato vero scrutinio percepi aliter rem habere, materiamque odo-
rem spargere per amœnum, volatilem, minime tamen fortem, cum
vinositate quasi quadam hircinum, qualemque fere Gerania non-
nulla africana spirant. Cerumine liquidior & oleosior est &
atro colore manus inficit materia, largiorque calido, quam frigi-
do aëre exsudat; unde mirum non est in natali animalis climate
GRIMMIUM de medico hujus ichoris usū cogitasse.*

Deinde in enumerandis speciebus ANTILOPARUM error commissus fuit, ubi (pag. 7. num. 9.) ANTILOPEN Kevellam, quam vivam non vidi, dixi petulcam, moschum fortiter redolentem & in utroque sexu cornutam. De A. Corinna dicenda ista fuissent, cuius tria feminea specimina vidi, cornibus, qualia fere a BUFFONIO describuntur, instructa, sed hinc inde distortis. Tanta ceteroquin est reliquo toto corpore A. Corinnæ cum A. Kevella similitudo, ut fere crederem utramque sexu tantum differre, & hanc speciei esse marem, illam vero feminam. Inquirant & confirmant aut diluant dubium, quibus utraque species occurret. Tu autem, Lector, vale & tentamina mea æqui consule.



ANTI-



I.

A N T I L O P E G R I M M I A.

ANTIOPARUM *genus* cum *caprino* *Zoologi* methodici, maxime recentiores, confundunt & commis-
scent. Distinctius tamen illud Natura reddidit, quam *ovillam* gentem, quæ cum *caprina* multo propiori & vera consanguinitate juncta est, nec tamen ab ullo auctore eidem associata invenitur. Æquitatis in distinguis-
tendum aut conjungendum generibus defectus plerarumque apud recentiores methodicos hallucinationum origo est & plera-
que systemata tironibus inutilia, proiectioribus ex parte insipi-
da reddit.

Antilo-
parum ge-
nus.

Antilopas Natura medias inter *cervinum genus* & *capri-* Characte-
num collocavit. *Habitu* prorsus sunt cervino, imo elegan-
tiori fere. At *cornibus* solidis, osseis, cornea vagina præ-
munitis, & in femineo sexu non semper absentibus, conve-
niunt cum *Capris*, *Ariete* & *Bobus*. *Ungulas* pedum spuriæ
verruciformes habent, uti *Capræ*. *Dentibus* variant; pleræque
tamen & his, & *sinu* sebaceo seu lacrymali ante oculos, cornuum-
que sæpe in femineo sexu absentia, *Cervos* æmulantur. Interna fa-
brika inter *Cervos* & *Capras* ambigunt, magis tamen ad has ac-

A

cedunt

cedunt ; cystide imprimis fellea , cervino generi denegata , præditæ.

Differentia Antiloparum a Cervis & Capris hinc fere confici poterit. Discrepant a Cervis cornuum imprimis persistentium natura , ungularum posticarum parvitate , cystidis bilariæ in hepate præsentia & ossicularum præterea in corde defectu.

Distinguuntur a Capris : habitu imprimis & pilo cervino ; cornuum directione & maxime figura tereti , nec complanata , qualis Capris esse solet ; sæpiissime etiam sinus lacrymalis præsentia & dentium incisorum lateralium parvitate & figura abludunt.

Peculiare ergo jure merentur nomen & genere distinguendæ sunt. Generale iisdem ANTILOPARUM nomen imponi posse videtur , quod nulli nec significatu , neque usus constantia adeo proprium est speciei , ut non pluribus adplicari possit. Satius enim esse puto vagum antea , sed notum jam , nomen generi adplicare & triviali vocula addita speciebus præponere , quam novum pro genere nomen fingere , aut cuivis speciei proprium cudere & in alienæ memoriæ detrimentum esse minutissimum. Nec possum non laudare a LINNÆO suscepimus huncce & per universam Naturæ scientiam introductum morem , genericæ nomina trivialibus jungendi ; quo scientiæ cultorum memoriæ insigniter succurritur & tirocinii pondus adlevatur. Si enim singulæ speciei animalium vel plantarum proprium imponeretur nomen , nemo est qui centesimam seriei partem memoriæ inculcare posset. Habemus exemplum in ADANSONII barbaris testaceorum adpellationibus , quas nemo discere aut celebrare cupit. Si vero in numerosis v. gr. Insectorum , Vermium , Vegetabilium classibus , *Linnæana* in adpellationibus concinnandis regula sequenda est (quod omnes concedunt) ; cur eam , uniformitatis gra-

gratia, non ad minus numerosas etiam Quadrupedum aliorumque animalium series extendamus ; modo in conficiendis generibus simus æqui & judiciosi , in distinguendis diserti , in servandis casti , nec species pro arbitrio misceamus , traducamus , disiciamus.

ANTILOPARUM *species* per Asiam & imprimis Africam numero-
sissimæ vagantur, quædam magnitudine, omnes elegantia corpo-
ris, membrorum agilitate & alacritate insignes. Pleraque ea-
rum species gregariam vitam agunt & saepe centenariis exer-
citibus incedunt. Inclemteriori sub Jove positæ Europæ vix ullæ
contigerunt. Tota etiam America naturaliter Antiloparum ge-
nus exulat, cui olim & Caprarum gens peregrina fuit, prius
quam ab Europæis transplantatae hujus species ibi se multipli-
cilarunt atque diffuderunt. Verissima hæc est *Illustr. BUFFO-*
NII observatio, quæ novo arguento docet Naturam non omnia
terrestrium Animalium genera Americæ & trigemino antiquo
orbi communia instituisse. (a); sed quædam cuique propria
dedisse.

Speciem hujus generis hoc fasciculo rarissimam curiosius de-
scribam; quæ vix huc usque cognita Zoologis fuit. Cujus hi-
storiæ si brevem enumerationem specierum præmisero, quas
ipse vel totas vel ex parte lustrandi copiam habui, reliquasque
ex

(a) Americæ propria quadrupedum genera sunt Bradypi, Dasypodes & Caviæ, de quibus postea dicetur, quarumque affinem, ut mox dicetur, at vix bene ad sociandam speciem unicam extra Americam novi. Didelphides etiam & Myrme-
cophagas Novo orbi proprias credidit *Ill. BUFFONIUS*, mihi vero de Myrmeco-
phaga africana & Didelphide orientali constat, prout infra fusius exponetur.
Antiquo orbi genera innumera propria sunt: Elephas, Rhinoceros, Antilo-
pe, Capra, Ovis, Erinaceus, Manis, Lepus; ut in Quadrupedibus consistam.

ex optimorum autorum fide notas interseruero, non inutilem suscepisse forte laborem videbor, cum in nullo magis, quam Antiloparum, inter quadrupedia, generè laboret Zoologia & observationibus egeat.

Divisio. Ut species distinctius tradam, *Antiloparum genus secundum cornua dispescam in curvicornes ad Capras accedentes, lyricornes, plerasque Gazellas vulgo dictas, recticornes, contorticornes & spiricornes.*

A. curvi-cornes. Ex *curvicornibus* aliquæ cornua apice in frontem adunca, alia in dorsum redundent. Ex his tantum binas novi species (1. 2.) & duas itidem, quibus cornua in adversum recurvantur (3. 4.)

1. ANTILOPE *leucophæa*. *Capra coerulea* KOLB. *afr. ed. belg.* I. p. 169. Hujus plurimas vidi pellès Promontoriæ bonæ Spei missas, ubi vulgo sub belgico KOLBI nomine *Capræ coeruleæ* (*Blaauwe Bok*) nota est. *Habitus*, qui congeneribus, fere cervinus fuisset videtur, *magnitudo* inter cervum & Damam. *Dentes* primores in hac specie singulares, omnes nempe æquales, rotundati & incisoribus infantilibus similes, in arcum dispositi. *Cornua* subulata, falcato-recurva, vix divergentia, rugis annulosa, basi lœvigata & compressiuscula, apice lœvia. *Corpus* supra ex canocinereum, versus spinam & in capite nigricans. *Cauda* brevis, apice alba; litura ante oculos, subtusque corpus & pedes toti alba. *Cornuum* figura hanc speciem exprimit animal a BUFFONIO (Vol. XII, p. 210.) sub nomine *Kob* celebratum. Colorem Antilopes hujus vivæ lœte coerulecentem esse, at statim a morte evanescere, perhibet *Kolbius*.

2. ANTILOPE *Rupicapra*. Hæc mihi non specie modo, sed genere etiam, sive toto habitu, ab *Ibice* differre videtur, quo-cum

cum præter vitæ genus, pilique colorem nihil omnino communem habet; ut mirum sit *Ill. BUFFONIUM*, qui in carnivoris animalibus ex levissima quavis differentia atque proportionis & coloris varietate species confidere amat, hic & in *Gazellis* adeo aliena animalia specie conjungere voluisse & Naturam in ruminantibus minus constantem atque prorsus degenerem putasse. *Rupicapra* inter Antilopas unica Europæa est; sola cornua ereta, extremitate retrorsum uncinata, ungulas longiusculas & late discedentes, atque singularem pone cornua *sinum cutaceum* rugosum, coecum (ut mihi in viva visum est) habet, quem in descriptione sua *BUFFONIUS* neglexit.

3. ANTILOPE *Dama* Plinii. Le Nanguer *BUFFON. hist. nat.*
Vol. XII. p. 213. t. 34. Hujus solum caput cum cornibus vidi, e quo didici solam inter congeneres, dentes inferioris maxillæ tantum *senos* habere, quorum 2 medii latissimi & recta acie terminati sunt, laterales parvi, sublineares. Africana est, uti sequentium pleraque, excepta sexta, & forte quinta. Plurimæ tamen ex Africanis speciebus Asiae quoque communes esse notandum.

4. ANTILOPE *reversa*. Mazame seu *Cervus cornutus* ex nova Hispania *SEB. thes. I. t. 42. n. 3?* *Capra novæ Hispaniæ.* *BRISSON. quadr. p. 72. sp. 16?* Le Nagor. *BUFFON. hist. nat.*
Vol. XII. p. 326. t. 46. Hanc nonnisi ex aureo *BUFFONII* opere novi.

5. ANTILOPE *Tragocamelus*. *Tragelaphus Caji* apud *Gesnerum.* *RAJ. quadr. p. 82. n. 10.* *Tragocamelus.* *PARSONS, Act. angl. Vol. 43. n. 476. p. 465. icon.* Paradoxa species a PARSONIO viva descripta.

A. Lyri-
cornes.

Antilopas lyricornes voco eas , quæ cornua dupli clementi curvatura in lyræ antiquæ , qualis *vulgo* pingitur , formam efficta habent. De sequentibus hujus phalangis speciebus constat :

6. ANTILOPE *Saiga*. *Colus Strabonis*. GESN. *quadr.* p. 361. icon. *quadr.* 362. *Ibex imberbis* GMELIN. *comm. Petrop.* V. p. 345. Le Saiga BUFFON. *hist. nat.* XII. p. 198. t. 22. f. 2. Cornua vidi , quorum subdiaphana substantia & flavescente colore rariissima hæc species cum Capris convenit.

7. ANTILOPE *Dorcas*. *Dorcas AELIAN.* *hist. anim. lib.* XIV. c. 14. Tzeiran Turcarum , Ahu Persarum OLEAR. *it.* I. p. 413. Le Tzeiran BUFFON. *hist. nat.* XII. p. 207, t. 3. f. 6? (cornu.) Integras vidi pelles. *Magnitudo* videbatur fuisse *Cervicapra*. *Cornua*, ut sequentibus, compressiuscula, rugis postice fere obliteratis. *Dentes* 4 medii latiores. *Caput* & *collum* totum, cum antica armorum parte spadicei seu saturatissime ferrugineo sanguinei coloris sunt. Sed rostrum antice occupat macula a nafso orta , longitudinalis, alba , in fronte truncata , parvoque acuminè mucronata. *Aures* obsoletiores , acutæ , marginibus albæ , intus nudæ. *Dorsi* color singularis , supra ferrugineum cano-argenteus quasi , versus latera in atrum transiens. *Lateralum* fascia albedini ventris abrupte contermina atra , ad humeros crena ferruginea excisa , femora late occupans & usque ad genua adtenuata descendens , quæ lato annulo nigro occupat , ultra quem crura alba. *Urrhopygium* late , etiam supra caudam , niveum ; unde *Pygargi* nomen vere meretur. Sutura nigricans ab ungulis per pedes albos adscendit. Genua priora pilosissima , callosa. Hanc speciem satis bene delineatam sifit *Zoologiae Linnæanae* bellico sermone a D. D. HOUTTUYN editæ Vol. III. tab. 24. fig. 2. ex Cel. JOH. BURMANNI picturis Afri-

Africanis a *Linnæo* passim citatis depromptam. Ibi vero pro *Cervicapra Linnæi* proponitur.

8. ANTILOPE *Gazella*. La Gazelle BUFFON. *hist. nat. XII.* p. 249. t. 23. Magnitudine & colore a præcedenti diversissima, mihi ex capite tantum nota.

9. ANTILOPE *Kevella*. Le Kevel BUFFON. *hist. nat. XII. p. 258. t. 26.* *Gazella africana* RAJ. *quadr. p. 80.* Parvula, teneri-
mi adspexitus, elegantissima, muscum fortiter redolens, petul-
ca & utriusque sexus cornuta.

Ad hanc phalangem referri debere videntur species binæ, quarum altera cornibus quidem a præcedentibus differt, at aliis notis affinis est; altera vero cornua utcunque lyriformia, sed distorta habet & habitu a reliquis Antilopis, omnibus di-
screpant.

10. ANTILOPE *Corinna*. La Corine BUFFON. *hist. nat. XII.* p. 261. t. 27. t. 31. f. 3, 4. Mihi nunquam visa.

11. ANTILOPE *Buselaphus*. Buselaphus & Moschelaphus CAJI apud GESN. *quadr. p. 121.* Vache de Barbarie. *Mem. pour serv. à l'hist. des anim. Part. II. p. 24. t. 39.* Le Bubale. BUFFON. *hist. nat. XII. p. 294. t. 37. 38. f. 2.* ♂ forte f. 1. Iconem etiam hujus ex picturis Capensisibus, quas possidet Celeberr. JOH. BURMANNUS, desumptam invenias in *tertii voluminis historiæ naturalis Linnæanæ, bellico sermone conscriptæ, Tabula 24. fig. 3.* Ex pellibus animal novi, quod mihi potius *Addax* Plinii esse videtur, quam *Bubalus* & *Bubalis* antiquorum. Magnitudine vi-
detur Asinum superare. Caput majus, & pedes multo minus
proceri quam in congeneribus reliquis, & postici videntur
bre-

breviores esse anterioribus. *Dentes omnes lati, truncati, æquales, medii tamen paulo maiores.* Labium inferius nigrum, mystace utrinque ad marginem. Rostrum antice fascia nigra, sub fronte terminata. Frons *topho* pilorum vorticoso. Vertex inter aures elatus, in eoque *cornua nigra*, adproximata, basi antice explanata fereque contingentia, crassa, inæqualiter rugosa, basi divaricata in formam lyræ, simul primo leviter antrorsum curvata, versus extremitatem vero strenue retrorsum infracto flexa & ad se invicem accendentia, extremitatibus subulatis, rectissimis, quas demisso capite in pugnam offert animal. Color gryseo-sulvescens, capiti & collo magis ferrugineus, in dorso fuscescens, clunibus pedibusque pallidus. Lineæ nigricantes per cervicem una & per humeros antice, longitudinales. Litura triangularis ad flexuram clunium. *Cauda longiuscula atra, hirta & subfloccosa.*

A. recticornes. *Recticornium binas tantum distinctas novi; quæ sunt.*

12. ANTILOPE *bezoartica*. *Gazella indica RAJ. quadr. p. 79.* *Pazas KÆMPF. amæn. p. 398.* *Le Pasan BUFFON. hist. nat. XII. p. 212. t. 33. f. 3. (cornua.)* Ex cornibus solis mihi cognita, nec ab *Algazel* Buffonii forte diversa. Iconem hujus animalis ex *Burmannianis* pariter *picturis* edidit D. HOUTTUYN tabulæ supra citatæ fig. 1.

13. ANTILOPE *Grimmia*. Cujus hic dabitur Historia.

A. contorticornes. *Contoricornium cornua singulari modo quasi manu torta diceres.* Harum pariter binas tantum species invenio.

14. ANTILOPE *scripta*. *Le Guib BUFFON Hist. nat. XII. p. 305. ♂ 327. t. 40 ♂ 41. f. 1.* Quam nondum vidi.

15. AN-

15. ANTILOPE *Oryx*. Oryx ut videtur *Antiquorum*, saltem OPPIANI *de venat.* lib. II. 445. 551. Alce capensis KOLB. afr. ed. belg. I. p. 173. icon p. 174. Le Condous BUFFON. hist. nat. XII. p. 357. t. 46 b. (cornua.) Belgis ad Promontorium B. Spei sub nomine Alcis capensis (*Kaapsche Elandt*) nota, equo fere major; Hujus servatur integrum sceleton in Museo SERENISSIMI PRINCIPIS AURIACI, e quo constat equum mediocrem magnitudine superasse specimen. Cornua optime delineavit *Buffonius*. Ex autoptis didici colorem animalis esse dilutissime gryseum, linea per dorsum nigra & extremis pedum nigricantibus.

Spiricornium tandem, spiraliter volubilibus cornibus insignium A. spiricornes.
solæ itidem binæ species innotuerunt:

16. ANTILOPE *Strepficeros*. Strepficeros. CAJI apud GESN. quadr. p. 295. Le Condoma BUFFON. hist. nat. XII. p. 301. t. 39. (cornua.) Species Belgis ad Prom. B. Spei habitantibus sub nomine Koedoe, quod Kudu s. Koudou pronunciat, nota, quo titulo & cornua plurima & integrum caput missa vidi. *Cornuum* sesquitipedalium situs & convolutio ut in A. *Cervicapra*; futura seu carina a fronte incipiens omnes legit spiras; interius cornuum latus versus basin subrugosum est, color, antequam polita fuerint, niger. Capitis (quod Cervi adulati capite majus est,) color cervino obsoletior, fuscidiorque; circa oculos albicans area, e qua tæniola nivea procurrit, supra rostrum cum comparri juncta angulo fero recto. Totius animalis, ut & cornuum, iconem proposuit D. HOUTTUYN in supra jam citatæ *historiæ naturalis* nimis fideliter *Linnaeanæ*, belgicæ tertio primæ sectionis Volumine, tab. 26.

17. ANTILOPE *Cervicapra*. *Gazella africana* s. Antilope *Raj*. quadr. p. 79. n. 5. Antilope BUFFON. hist. nat. XII. p. 215. t. 35, 36. Hujus in proximo fasciculo dabitur descriptio & anatome.

Videri quibusdam posset ad hoc pariter *genus* pertinere MOSCHUM *Linnæi* & Moscho certissime congenerem TRAGULUM *pygmeum* Africæ, omnium bisulcorum animalium minutissimum. Ea vero animalcula cum ambo in utroque certissime sexu excornia sint, prætereaque forma & dentium caninorum in superiori maxilla præsentia, verrucarum vero ad talos defectu differant, proprii potius generis esse cum BUFFONIO existimo.

Neque ad *Antilopas* referri potest CAMELOPARDALIS, anomala bestia, quam ex sufferta pelle, in *Museo ACADEMIÆ Leydensis* nunc exstante, dentibus 8 spathulatis, (quorum extimus externe profunde bilobus,) labio superiore integro, pedum ungulis tantum binis retrorsum productis, cornibus pelle tectis & fasciculo pilorum nigro terminatis, jubaque cervicis & tibiarum longitudinali uti forma corporis tota, ab omnibus facile Ruminantium generibus, Camelis etiam, ad quos tamen, concedente BUFFONIO (*hist. nat. Vol. XIII. p. 12.*), proxime accedit, discrepare didici, & sui generis esse animal.

Complures Antiloparum species nobis ignotas inhospita Africæ deserta pererrare (a) minime dubito; hæ seculi futuri observatores, cum innumeris aliis Africæ & Indiæ a Natura tributis divitiis, manent.

Elegantissimum hic interim liceat animalculum, Antiloparum modo enumeratarum tredecimam, describere & iconem illustrare; cuius, ni fallor, feminam olim descriptis GRIMMIUS in *Ephemeridum*

(a) Earum ex numero est species elegantissima, verum obscura, a KOLBIO sub nomine *Capræ variegatae* (*Bonte Bok*) Afric. ed. belg. Vol. I. p. 170. memorata, cui magnitudinem *Antilopes leucophaea* nostræ tribuit, quamque magnis greibus incedere dicit.

meridum natura curiosorum Decur II. ann. 4. obf. 57. unde in series quadrupedum a RAJO, KLEINIO, BRISSONIO atque LINNÆO (*b*) datas deinde transiit, & pro excorni specie celebrata fuit, donec eam *III. BUFFON* pro Antilope heic describendæ, femineo specimine agnovit; quanquam ipse marem ex cruento tantum, cum pelle & cornibus servato, cognitum haberet, nec nisi quoad has partes & imprimis cornua, jam apud SEBAM (*thes. vol. I. tab. 43. fig. C, D.*) delineata, describere potuerit.

Animal, cuius hic descriptionem proponam, pulcherrimum, ex Guinea in *Vivarium SERENISSIMI PRINCIPIS ARAUSIONENSIS* missum fuit. Complura ejus specimina in itinere perierant, & feminæ imprimis omnes, quas excornes fuisse accepi. Mares duo in *Vivarium* vivi pervenerunt, quos ambo vidi & quorum mitissimus & familiarissimus unus etiamnum supereft; alter, qui hyeme anni 1764. interiit, ferus erat, adpropinquantes fugiens, sterterosus, cornibusque feriens.

Timidissimum in genere animal est Antilope nostra, agilissimumque. Velozi & eleganti gradu currit & celeri saltu sese subducere callet. Inquietum pede altero anticorum sublato stare solet, prout icona (*Tab. I.*) expressum est. Posticis pedibus corpus scabit, & scabi amat, maxime inter cornua. Tonitrua maxime timet.

Nutritur in Vivario, pane & radicibus Dauci comminutis; lubentius tamen tuberibus Solani esculenti vescitur. Esuriens pa-

(*b*) *Capra sylvestris africana Grimmii RAJ. syn. quadr. p. 80. Tragus, Capra fera Grimmii KLEIN quadr. p. 19. E. Tragulus Africanus BRISSON. quadr. p. 97. fp. 4. Epit. p. 97. Capra Grimmia LINN. syst. nat. ed. X. p. 70. fp. 10. La Grimme BUFFON. bist. nat. XII. p. 307. 329. t. 41. f. 2, 3.*

pabulum ex alto oblatum in posticos pedes erecta adpetit, uti Damæ cicuratae solent. Ruminat prout congeneres omnes. Excrementa tantilli animalculi crassitie humana æquant, viridescentia, velut e globulis compacta.

Videtur omnino hæc esse Antilope, quam BOSMAN, loco ab Ill. BUFFON citato, in Guinea dicit inveniri & a Nigritis Regulum Cervorum adpellari: parvulis nigrisque instructam cornibus & pedibus proceris atque gracilibus, levissimam cursu saltuque (*Voyage de Guinée pag. 252.*) Nec negaverim relationem alterius itineratoris ab Ill. viro ad *Antilopen Grimmiam* citati huc pertinere, qui Damulas in insula prope Javam observavit, magnitudinem Leporis æquantes, quas incolæ cursu adsequuntur & manibus capiunt (*Voyage de LE GENTIL Paris 1725. tom. III. p. 73. 93.*)

D E S C R I P T I O

A N T I L O P E S G R I M M I A E

Tab. I. III. e longinquo & IV. fig. 3 a b.

Magnitudine circiter est pulli Damæ bimestris; *habitus* elegantiæ, crurum nempe gracilitate, trunci apta & habili plenitudine, capitis forma & aspectus argutie, gressusque levitate congenerum specierum venustissimas vincit.

Caput fere simile Capreoli. *Nasus* continuo humidus, nudus & ater est; *naribus* lunatis seu subreniformibus, longitudinalibus instructus.

Oris margines nigri, ut & *linguae* subacutæ. *Dentes* medii lati,

lati, extrorsum subobliqui, laterales acutiusculi, sensim minores. *Labium* superius obsoletissime bilobum, nec fissum. *Pili* rari in mento & utrinque ad rostrum pro mystace. *Verrucula* gulæ pilifera.

Cornua nigra, in vertice erecta, parallela, rectissima, subulata, crassiuscula, apice subcompressa, striis longitudinalibus arantur & basi quatuor circiter rugis annulata sunt; (*Tab. IV. fig. 3 a.*) exterius vero exhibent longitudinalem fasciam (*fig. 3 b.*) ubi & striæ longitudinales, & rugæ annulares deficiunt.

Pili a fronte longiusculi, rigiduli, grysei, circa basin cornuum horrent eamque contegunt. Inter cornua vero assurgit *flamula* e pilis atris composita, a qua per frontem descendit fascia nigra, in rostro latecens. Hæc est quam in femina insigniorem imprimis notavit GRIMMIUS.

Aures magnæ, longitudinaliter obsoletius velut tricanaliculatæ, interne eminentioribus locis albidis pilis adspersæ, ceterum nudæ ac nigricantes.

Oculi majusculi, fusci. *Cilia* nigra, in superiori palpebra majora largioraque. *Pili* supra oculos longiusculi, sparsi.

Ante oculos *area* observatur leviter concava, calva, nigra; in cuius medio *sulcus* callosus, humidus, e quo ichorosa quædam materia, parce tamen, sudat, in nigras fordes durescens. Hæc quoque a GRIMMIO & auctoriis, qui eum exscripserunt celebratur, & sinus lacrymalis *Cervorum* & *Antiloparum* reliquarum succedanea quasi est. Exsudantem in hacce area materiam GRIMMIUS odore inter moschum & castoreum medio pollere dicit

& medicam virtutem inesse credit. In nostra prorsus inodoram deprehendi, nec tantam materiæ quantitatem, ut insigniori copia colligi possit.

Collum teres, inferiori parte pilis rudioribus, largius laxiusque reliquo corpore, vestitum est, coloremque lutescente gryfeum cum capite communem habet. *Gula* vero & colli superior pars subtus alba sunt.

Corporis vellus densum est, strictum, cervino tenerius quidem & mollius, rudi aspectu tamen simile; *Color* antice gryeus, versus clunes sensim in cano-fuscescentem transit, abdomen versus canescit & subtus tandem albicat.

Pedes graciles, versus unguis nigricant, unde nigredo in anticis lineariter ad tibias adscendit. *Ungulæ* in singulo pede binæ, acutæ, atræ; *spuriae* nullæ adsunt, & vix earum loco tuberculum notatur. *Scopæ* quoque anticornum genuum, quæ in multis Antilopis observantur, huic nostræ desunt.

Cauda brevis, linearis, alba, superne fascia atra distinguitur. *Scrotum* inter femora pendet magnum, nigrum, una cum præputio insigni.


M E N S U R AÆ.


Animalium quæ vidi alterum, quamquam admodum familiare esset, inquietum tamen & tractantium manus effugiens impatiensque, commensurationem reddidit difficillimam. Neque hinc quas hic adpono mensuras, saltem quæ totius corporis sunt, pro adcuratis & exactis accipi velim.

Lon-

Longitudinem totius animalis secundum spinam dor- si, <i>estimabam</i>	- - - - -	2'. 7". 0'''.
Altitudinem ad medium dorsi anticam	- - - - -	1. 5. " 0.
posticam	- - - - -	1. 5. 6.
Trunci longitudinem fere	- - - - -	1. 5. 0.
Longitudo capitis a rostri extremo ad originem cornuum erat	- - - - -	0. 5. 8.
cornuum, quorum nunc sinistrum lon- gius evasit	- - - - -	0. 2. 9.
aurium	- - - - -	0. 3. 0.
caudæ	- - - - -	0. 3. 0.

Iconem animalis a latere visi fistit *Tabula I.* Idem e longin-
quo, quasi plantas prærodens, *Tabula III.* conspicitur. Cor-
nua *Tab. IV.* fig. 3 a b exhibentur.





I I.

A P E R
Æ T H I O P I C U S.

Animalia
Africæ.



UANTOS monstri para Africa thesauros densis suis sylvis & horrenda solitudine a curiosorum oculis remotos foveat antiquitatis scriptoribus jam erat notum & recentiorum, saltem Botanicorum, experientia confirmavit. Zoologi etiam nuperiores aliqua ex inaccessis vastissimæ & maximam partem felicissimæ telluris tractibus rariora nocti sunt, & quæ prisca ætas vivariorum & Zoomachiarum curiosa cognoverat animalia, succedente ætate pro fabulosis habita, denuo eruere cœperunt. At infinitam animantium Africæ vim, imo vulgaria istic & non spernendæ molis quadrupedia plurima ignota etiamnum esse aut perobscure saltem cognita, ex rudium itineratorum fragmentis & partibus eorundem animalium passim in Museis obviis, quis non concludat? Quantusne immanium ferarum per Africæ deserta vagatur exercitus? quarum plurimæ species ex foliis pellibus notæ sunt, nec satis bene distinguuntur. Antiloparum quanta & quam varia corpora inulta istic tescua pererrant? quarum numerosæ species nostro demum sæculo dignosci occipiunt. Parvulorum autem animalium quam immenso numero regiones scatere credamus, quæ uti gigantea vegetabilia, ita & maxima quæque animalium

malium terrestrium genera, Elephantas, Hippopotamos, Rhinocerotes, Oryges, Leones vulgo alunt? Quot non gradibus indiguit Natura, ut a tantæ molis fabricis ad minuta Insecta descenderet? Et tamen in his æque infinita varietate lusisse eam, Belgica imprimis Musea, Insectis capensis indies ditiora, docent; quorum in grege, quamvis passim Europæ calidiori & Mauritaniæ communis species una vel altera occurrat (*a*), tamen pleraque a nostris, plurimaque a vicinæ Indiæ productis diversissima sunt & formarum stupenda diversitate æque ac aspectus crebra pulcritudine sese commendant.

Ex Quadrupedibus Africæ nova aliqua & inaudita huic fasciculo inferenda duxi, quibus, si non ingrata Curiosis fuerint, plura in posterum subjungam & ad Insecta quoque capensia, quorum vix ulla iconibus illustrata prostant, excurram. Primo ergo loco *Apri* speciem novam, Africæ propriam & forma vere admiranda singularem recensebo; quæ generi *Suillo*, notabilia fere in omni specie offerenti plurima, at minime numero, insignis erit accessio.

Ex vulgo notis hujus generis speciebus singula orbis pars sibi suillum vindicat. Est Europæ imprimis proprius vulgaris *APER*, qui ab hominibus cicuratus & domesticus factus a naturali co-lore, forma & indole declinavit, apud nos pendulis auriculis degener, apud Indos brevipes, pendulo abdomen; quam formam hic etiam in Europam transplantatus fideliter servat. Est Afri-

(*a*) Occurrunt inter Insecta Capensia v. gr. *Papilio Cardui*, a nostrate nullo modo distinguendus; *P. Hyales* fulva varietas in Gallia & Anglia vulgaris, at Germaniæ inferiori ignota; *P. Daylidice* virore inferiorum alarum in citream flavedinem mutato; *Phalæna plagiata* nostrati simillima, nec non *Sphynx Atropos* & *Celerio*, *Apis rostrata*, *Scarabeus Follo*, *Meloë Cichorii*, *Leptura arietis* aliaque.

Africæ occidentaliori **Sus GUINEENSIS** (*b*) cuius adhuc-dum bona descriptio caremus, auricularum acumine singula-
ris, quique cum *Sue nostrate* & *varietate ejus indica* in Amer-
icam calidorem transplantatus, inquilitus ibi factus est. Re-
peritur, præter adventitias species, naturalis Americæ **Sus TAJAS-
SU** (*c*), folliculo dorsi purulento ac aneurysmate naturali aor-
tæ notabilis. Ultimi vero Orientis insulæ **SUEM BABIROUSSAM**
alunt (*d*). Has quatuor species, solas hucusque a Zoologis ce-
lebratas, Natura distinxit curiose & aversione sexuali æque ac
patria segregavit; habitu tamen toto, indole & characteribus
externis adeo arcte consociavit, totamque simul Suillam gentem
a reliquis quadrupedum generibus ita reddidit alienam, ut so-
la ea probet genera non a methodicis fingi, sed a Natura instituta
esse, quamquam non ubique constantibus notis definiri possint;
cum maxime habitu & certo structuræ termino circumscriban-
tur, passim vero adfinitatis vario gradu inter se juncta obser-
ventur; quæ omnia minus adtentos minusque judiciosos metho-
dicos nostro ævo vexarunt insigniter, ac plurimarum apud eos
hallucinationum causa fuerunt.

No-

(*b*) *Sus Porcus* LIN. *syst. ed. X.* p. 50. *sp. 2.* *Sus guineensis* BRISSON. *quadr.*
(*ed. minor.*) p. 76. *sp. 4.* MARCGRAF. *braſil.* p. 230. *fig. poffima.* Hujus pictura
existat inter *Burmannianas* Promontorio Bonæ Spei missas; e qua liquet feram
hanc speciem toto corpore fetosissimam esse, & domesticitate forte in America
pilos amisisse. In eadem pictura singularis appetet folliculus umbilicalis, den-
tesque primores insignes, laniarii vero tantum inferiores; & mystax ab angulis oris
ortus, reflexus, de quo prorsus nihil apud MARCGRAFIUM. Forte hæc est spe-
cies, cujus partes describit *Ill. BUFFON. biſt. anim. Vol. XIV. append. Aprum
Promontorii viridis vocans*, quem alibi varietatem Apri Europæi esse pronunciavit.

(*c*) *Sus Tajacu* LIN. *syst. ed. X.* p. 50. *sp. 3.* *Aper mexicanus* BRISSON. *quadr.*
p. 77. *sp. 6.* *Le Pecari* BUFFON. *biſt. anim. Vol. X. p. p. 21. Tab. 2, 4 seq.*

(*d*) *Sus Babyroussa* LIN. *syst. ed. X.* p. 50. *sp. 4.* *Aper orientalis* BRISSON.
quadr. p. 76. sp. 5.

NOTÆ *Suilli generis* characteristicæ & quibus ab universa quadrupedum plebe distinguitur, in *pedibus* imprimis bisulco-quadrungulatis, *rostro* simul truncato, cartilagineo, fossorio & *dentibus caninis* in qualibet maxilla utrinque solitariis, exsertis, supra remotioribus, consistunt. Constantissimæ ex tribus his notis sunt *rostrum suillum* & *canini dentes*, cum quibus etiam nascuntur Porcelli, & qui jam immaturo foeti prorumpunt. Æque constans dicenda foret *pedum* structura, nisi ludens Natura, coalitis majoribus ungulis, solidipedes quasi Porcos domesticos interdum produceret; quales in Polonia imprimis nasci lanionibus Germanis notissimum est, qualesque in Mysia & Poeonia reperi jam dixit ARISTOTELES *bist. anim. l. 2. c. 1.*

Species nova; hic statim describenda tres modo adlegatos characteres genericos evidentissimos sicut; imo caninorum situ & forma medium sese generi inserit, atque inter *Aprum nostratem* & *Babyroussam* collocari debet. *Dentes* nempe *canini* in supra memoratis speciebus diverso sese modo habent. Eorum & situ & proportione *Tajassu* reliquis animalibus caninorum apparatu præditis similius est; labiis enim fere tecti in eo sunt, & superiores, plane ut in canibus ferisque reliquis, deorsum directi, adversis inferioribus occurunt. An eadem fabrica in *A. guineensi* obtineat, non affirmaverim. *Nostratem* ab hac solita conformatione jamjam insigneriter degenerare videmus. Huic enim *canini* superiores antrorsum obliqua directione ex alveolis exeunt & extra gingivas illico extrorsum reflectuntur. In *Babyroussa* multo etiam magis aberravit Natura, dum lanarios non in ore emisit, verum perforata cute ex superiori rostri latere exseruit, in altum directos, recurvatos circinatosque. Medium *A. æthiopicum* inter hos ultimos, conformatione & situ dentium exsertorum, obtinere stationem statim videbimus.

Sed characterem Suilli generis, in *primorum dentium vel incisorum* conditione auctioribus quæsum, eadem nostra nova species eludit; iis nempe, ut dicetur, prorsus orbata. Ex reliquis tamen speciebus hi quoque satis constantem characterem præbere videbantur. Etenim in omnibus istis observantur in superiori maxilla obtusissimi, distantes & convergentes, in inferiori longiores, pronati, subparallelis, lineares atque truncati. Numerum quidem eorum non esse in omnibus speciebus, imo ne in unica quidem *Sue domestica* (e) constantem, notum erat; At eorundem conformatio singularis pro nota generis sufficere potuisset, nisi species nostra Æthiopica inutilem nunc eam redideret.

Autorum
loca ad
Aprum
æthiop.
pertinen-
tia.

His de charactere Suum generico præmissis, ad descriptionem speciei, cuius causa hæc adlata sunt, progredior; quam utut turpissimam bestiam, Zoologis gratam futuram minime dubito, cum nulla omnino apud auctores de eadem mentio occurrat, si KOLBIUM FLACCOURTIUM & ADANSONIUM exceperis. Horum prior in recensione *Animalium capensium* sylvestres Africæ Apros memorat, (*afric. ed. belg. I. p. 196.*) nulla quidem data descriptio ne dignoscendos, qui tamen vulgares certe non fuerunt, cum Aprum europæum in Africa ferum reperiri haud credam (f); Alter

(e) In *Apro nostrate* adulto constantes dentes primores supra & infra senos observavi; infra extimum utrinque reliquis adclinem, nec parallelum. In *Babyroussa*, cuius triginta ad minimum crania inspexi, semper in maxilla superiore quaterni retusi, convergentes, in inferiore seni adsunt, forma fere ut in *Apro nostrate*. Idem in *Tajassu* solemne. De *A. guineensis* non constat. At in *Sue nostrate domestica*, quæ tamen certissime *Apri* varietas est, modo supra JV, infra VI, modo utrinque VI, imo quandoque infra VIII adsunt.

(f) In *SCYLACIS Cariandenfis*, *Periplo* (*Geograph. græc. minor. Oxon. 1698. Vol. I. p. 540.*) invenio „ Phœnicum institores inter alias merces adferre solitos

„ tos

Alter (FLACC. *hist. de Madag.* p. 152.) Madagascarienses adtigit Aros, quorum imprimis mares cornu utrinque ad nares habere dicit, quod de nostro potius, quam de *S. Babyrousa* intelligi debere videtur. ADANSONIUS tandem distin^tius (*Voyage du Sénegal.* p. 76. 77.) de *A. æthiopico* nostro locutus est, prout ex data l. c. dentium descriptione colligere licet. Quod vero majorem nostrate dixerit, forte ideo visum quia capitis moles & monstrofitas e longinquo imposuerant; non enim nisi eminus eum videbat. Crederem & BUFFONIUM hanc nostram speciem voluisse, ubi in operis nuper edito *Volumine XIV. append.* inferit descriptionem partium quarundam ex Apro Promontorii Viridis desumtarum; præsertim cum in cauda setas in perniciosos dispositas invenerit & dentes laniarios superiores maximos memoret. Verum primorum dentium in Apro BUFFONII præsentia incertum me & dubitatem reddunt,

Sus æthiopicus noster anni 1765. æstate, in navi *de Erfprins* dicta, Promontorio Bonæ Spei advectus atque in SERENISSIMI PRINCIPIS AURIACI theriotrophæum, quod prope *Voorburgum*, haud procul ab *Haga-Comitum* est, delatus fuit, ibidemque etiam nunc, cum hæc scribo, lætus vivit, postquam rigidam satis hymen partim sub diu, partim in stabulo ex asseribus consarcinato, felicissime, quamvis male vestitus, transfigit.

Litteræ simul adlatæ rarissimum esse animal, perhibebant, quodque, ducentis fere leucis a Promontorio in Africæ interioribus captum, nemo ibi antea visum fuisse recordaretur. Quum tamen postea viderim corium præparatum capitis hujusmodi Apri, in quo

„ tos fuisse Æthiopibus *Apros castratos* ”; unde, tunc in Africa Aprum nostrum neque naturaliter existisse, neque cultum fuisse, inferri poterit.

quo faccorum subocularium & loborum zygomaticorum reliquiæ satis clare speciem indicabant , quodque , cum pedibus , sub titulo capitis Dromonis (*Hardlooper*) olim Promontorio B. Spei missum fuerat ; fit ut speciem ibi loci , aut in Africæ saltem interioribus non adeo raram esse credam , quam in prædictis commendatoriis litteris traditur ; quippe quæ ibi etiam belgicum illud meruerit nomen , quod corio capitis adnexum inveni . Fieri potest ut in vicinis Promontorio regionibus non reperiatur ; idque fere pro certo crederem , cum KOLBIUS Apros suos africanos in interioribus tantum & sylvosis tractibus , rarius autem prope Promontorium habitare dicat . Indeque forte est , quod rarius a Belgis Promontorium istud occupantibus , nec nisi itineribus in interiora Africæ factis , capiatur .

Vix dubium est ADANSONIO eminus visum Aprum africanum , hanc nostram speciem fuisse ; unde eam per totam calidorem Africam , ad Nigrum fluvium saltem usque , vagari concludendum . Madagascariæ etiam incolam esse , ex citato supra FLACCOURTII loco vero fit simillimum . Jure ergo APRI *aethiopici* nomen sibi poscit .

Ex vivo , cuius mores & ex vivarii custode diligenter sciscitatus sum , & ipse crebra ejus , sæpe plurium horarum continua inspectione confirmatos habeo , sequentia ad historiam speciei nostræ novæ naturalem pertinentia collegi .

Odor naturalis , quem animal late circa se spargit , ambrosiacus est , simillimus ei , quo caseus viridis Helvetorum , *Schabziger* vulgo dictus , manus inficit . Subsimilis quoque effluviis *Lamii* purpurei contriti .

Adeo cicur jam erat animal cum primum in vivarium delatum

tum fuit, ut parvulum captum fuisse credam. Mole hinc etiam satis evidenter accrebit in vivario. Qui illud educarunt superiores laniarios dentes ferra vel lima truncasse credibile est, cum etiam labium dextri lateris lacerum fuerit & læsum. In vivario ubi nunc cum Damis bengalensis plurimis (iis quas sub Axis nomine PLINIUS cognovit,) simul servatur, saepe eum Damas istas a pabulo abigentem & per totam aream diu exagitantem miratus sum. Nomen supra adlegatum belgicum, quod *Dromonem* significare dixi, non inepte impositum videtur; celeriter enim etiamnum currit, quamvis diurna captitatem multum a naturali agilitate amisisse videatur; cum etiam pedes minus graciles habilesque nunc habeat, quam eos in fero esse ex pedibus, qui exuviis capitis supra memoratis adnexi erant, didici.

Vividior multo & agilior est *Apro nostrate*, astutiorque eodem & congeneribus notis. Cum diu stabulo inclusus fuit, eodem exire avet subgrunniens, & si quando impeditur aut irritatur misere vociferatur rauco porcelli sono, alias raro vocalis; emissus cursu subfultibusque & Damas agitando lætitiam testatur. In angustias redactus, aut subito adpropinquantem hominem metuens retrogradus incedit, & caput semper hosti offert eodemque atrociter ferit. Currens caudam arrectam protendere solet, quæ alias recta dependet. In pedes anteriores, posticis naturaliter proceriores, satis alte erigitur, quandocunque ex alto offertur pabulum. Oculis in summo capite sitis, vix nisi antrorsum cernit, favente etiam ibi ciliorum defectu, quum contra auriculæ & obumbrans caprona visus vastiorem campum prohibeant. Pabulum solo odore quærit, lobis zygomaticis quos, leviter adtollit subinde, visum infra prohibentibus; adeoque parvulis suis oculis perparum fruitur. Scabi amat, maxime circa collum, ut & in capite atque dorso. Ipse quoque

que corpus adterit , & laterum pilos fere omnes detravit , multoque nudior toto nunc est corpore , quam cum eum pri-
mum adlatum vidi. Calidissimum esse animal manu percepí , etiam per summum præteritæ hyemis frigus.

In itinere Mayzio nutritus fuerat. At quam primum in Vivarium delatus hordeum cum fagopyro mixtum , quod ibi vulgo animalibus offertur , degustasset , prius pabulum aversatus est. Panem tamen omni solito alimento præfert , & ubicunque potest terram pedibus & maxime rostri margine antico fodit , etiam in genua sæpe demissus , & graminis radiculas carpe-
re amat. Ore superficie aquæ immisso potum fugit , in genua procidens si profundior lacuna sit.

Pabulum rostro , quod fere horizontaliter terram respicit , & labio superiore colligit. Cum maxillas aperit dentes exserti in-
feriores a superioribus abscedunt , at clauso ore iisdem adli-
duntur.

Longitudo , moles & figura capitis ; dentiumque insignis ar-
matura tremendum huic Apro fero adspectum conciliant. Sa-
pienter Natura duritie rostri & armis exsertis , simul agilitate &
calliditate animal alias imbelli , neque cornu , nec unguibus
valens , & nudum in prælia corpus gerens , contra truculen-
tos copiosissimarum Africæ ferarum insultus firmavit. Auditu
etiam , cum oculis minus utatur , pollere dedit & olfactus organum
exacuit illi , ut pabulo quaerendo serviret. Oculos vero ab
imminentis solis splendore sparsa desuper caprona occuluisse &
aurium aditum largo villo Insectis præcludere voluisse vi-
detur.

D E S C R I P T I O

A P R I A E T H I O P I C I

Tab. II. ♂ *Tab. IV.* fig. 1, 2 ♂ 4.

Magnitudine superat Porcum Indicum. Crassior quoque est & elongatior, inque pedes maxime primores paulo altior; dorso obesiori, convexo.

Caput monstruosum, magnitudine pariter ac figura singulare. *Rostrum* maximum, latum, depresso, subcorneæ fere duritie; *nasus* mobilis, subinflexus, oblique truncatus, superficie marginata terram respicit, pilis raris, albidis adspersa; *nares* oblongæ. *Os* sub rostro, singulare, exiguum, rectu brevi. *Labium* superiorius ad dentes crassiusculum, durum, *lobo* pone dentes *semiovati*, pendulo, cartilagineo angulos oris utrinque obtegit.

Dentes primores nulli; at gingivæ antice convexæ, duræ. *Dentes laniarii* in superiore maxilla pollice manus virilis crassiores, sursum tendentes, patuli, recurvati, tereti-subulati, fulcis duobus, paulo anterius sitis exarati & versus basin antice ab inferioribus prætriti. *Laniarii* inferiores erecti, patentiores, multo minores, triquetro subulati, rectiusculi, apice adtriti. *Molares* a caninis distantes, sub examen non venerunt.

Oculi in summo capite parvuli, propiores inter se, auribusque quam in *Sue vulgari*. *Cilia* in superiori palpebra tantum, creberrima, antice deficientia. *Irides* obscuræ. *Sulcus lacrymalis* ante oculos fere longitudinalis. (*Tab. 4. fig. 4*)

D

Au-

Auriculæ majusculæ, subacutæ, intus pilis albidis, ab interno margine deorsum directis, largiter inunitæ.

Sub oculis *saccus* convexus cutaceus, mollis, laxus, rugosissimus. Sub sacco utrinque *lobus zygomaticus* magnus, durus, deprimus, rotundatus, fere horizontalis, parum mobilis. Inter lobum zygomaticum & os media *verruca* dura convexa. (Tab. 4. fig. 4.)

Corium fuscum, in dorso & capite nigrescens ; capiti æquale, durum ; in trunco adipe suffertum ; sub gula & in inguinibus atque præputio laxum. *Corium trunci* rimis obsoletis, transversis subrugosum, & callulis epidermidis secedentis subleprosum.

Setæ rariusculæ, per totum corpus, etiam in capite pedibusque, *fasciculatim* sparsæ ; *fasciculi* singuli ex setis quinis, vel paucioribus, in transversam seriem adproximatis. *Caprona* frontis inter aures subvorticosa, ex setis fuscis albidisque mixtis. *Setulæ* breves, nigræ canæque mixtæ, antrorum prostratae, a caprona ad intervallum oris longitudinaliter rostrum obsidentes. *Setæ* maiores nigræ in sacco suboculari, minores per palpebram superiorem & rariissimæ in labio superiore, qua dentibus circumjectum est, sparsæ. *Aures* intus pilo largo albo villosæ.

Setæ dorsi antici, inde a nucha, maxime supra scapulas, fusconigræ, longissimæ (sex, septem, octo, pollicum,) crassitie vulgarium porcinarum, & ut illæ apice fissiles, reclinatae atque crebriores quam reliquo corpori. Area dorsi hisce setis obsita ante adtenuata, postice subbifida evanescit. Postica pars dorsi, setis rarioribus, femora pedesque brevioribus fuscis sparguntur.

Latera trunci & ventralis facies, capitis etiam latera cum gula,
se-

Setulis albidis pilosa; quæ ad parotides *suturam versus gulam reflexam* concursu efficiunt.

Pedes ut in Apro nostrate. *Ungulæ* nigræ, *primariæ* acutæ, *spuriæ* terræ insistentes itidem acutæ.

Cauda linearis, nuda. *Scrotum* inter femora strictum. *Præputium* sub abdomine laxissimum, urinam retinens.

M E N S U R Æ.

Vivum mensuravi quam fieri potuit exactissime, & proportiones sequentes, secundum Parisinæ mensuræ normam enunciatas, deprehendi:

Longitudo tota ab apice rostri, ad ortum caudæ	-	4.	9.	0.
capitis ab apice rostri usque ad intervallum aurium	-	I.	3.	0.
rostri ab apice ad oculos usque	-	I.	0.	0.
Latitudo rostri inter dentes exsertos	-	o.	6.	9.
Linea transversim inter loborum zygomaticorum summitates	-	I.	0.	6.
Distantia aurium	-	o.	6.	0.
oculorum inter fe	-	o.	7.	0.
ad canthos anticos	-	o.	5.	0.
ab auribus	-	o.	2.	0.
verrucarum a lobis	-	o.	3.	0.
a dentibus	-	o.	1.	9.
Longitudo aurium	-	o.	3.	3.
Altitudo corporis ab intervallo scapularum ad terram	-	2.	2.	6.
a mediis lumbis ad terram	-	I.II.	o.	

D 2

Lon-

Longitudo pedum anticum	- - - - -	o. 11.	6.
caudæ	- - - - -	o. 10.	6.
Crassities trunci major	- - - - -	3. o.	o.
ad femora strictior	- - - - -	2. 9.	6.

Dentes, in vivo, superiores truncati & prætriti erant, ut primum vix, deinde successu temporis transversi digitii altitudine extra labium prominenter; tandemque ita excreverunt, ut nunc, cum hæc scribo, sesquipolicem excedant; inferiores subbipollares, acutique sunt. In capite cujus corium cum rostro & dentibus præparatum, Promontorio Bonæ Spei missum lustravi, dentium mensuras sequentes observabam:

Longitudo dentium exsertorum superiorum a ginvitis ad apicem, directa	- - - - -	o. 4". 2"	
inferiorum summa	- - - - -	o. 2.	6.
Distantia superiorum basi	- - - - -	o. 4.	o.
apice	- - - - -	o. 7.	6.
inferiorum apice	- - - - -	o. 6.	4.

Corii crassities versus rostrum 2". ad collum vix 1".


Quantum a notis speciebus discrepet hæc nostra, ex adjecta icona (*Tab. II.*) patet, quam omnes, qui animal coram videbunt, optime expressam & naturæ simillimam censuerunt. Si illud unum excipias, quod oculos vertici & inter se propiores collocare debuisset Pictor. Capitis igitur abnormis circumcæsura & exornatio mirabilis accuratius ex adumbratis ejusdem desuper inspecti lineamentis, *Tab. 4. fig. 4.* adjectis, dijudicanda erit. In *Tabula IV. fig. 1* & *2.* addidi quoque levem adumbrationem dentium exsertorum, quales siccum corrugatumque capitis corium, quod, ut supra jam monui, in *Museo SERENISSIMI PRINCIPIS* servatur, exhibuit; cum in vivi animalis icona eosdem prætritos, ut sunt, delineari voluerim.

Sin.

Singularis setarum in hoc *Apro* dispositio per fasciculos, quam supra adtigi, quamque BUFFONIUS in Apro suo Promontorii viridis, saltem in ejus cauda, vidi, evidentius observatur in foetibus *Hystricis cristatae*. In his enim medius truncus pectinibus transversis quasi squamatus est. Simile quid in mollibus corporis partibus *Dasyopodis sexcincti* observavi. Hic in inferiori corporis latere & in pedibus transversim hiulcus est, verrucarum autem singulæ setulis aliquot, transversa serie ordinatis dotatur; saltem in pedibus, in corpore enim puncta tantum, de tritarum forte setarum vestigia, supersunt.

Natura setarum *Aper aethiopicus* cum *Porco domesticus* convenit, tenues enim illi, flexiles & apice fissiles sunt; cum in *S. Tajas su* contra crassiores, rigidiores & apice integras atque acutas observaverim.





III.

C A V I A C A P E N S I S.

Caviae in
genere.



AVIARUM genus primus judiciose distinxit KLEINII & justis fere limitibus inclusit. Minus bene BRISSONIUS easdem *Cuniculorum* nomine adpellavit & simplicissimum, maximeque naturale KLEINII genus, adactis variis alienis speciebus, vitiavit. Apud LINNÆUM binas *Caviarum* species præeunte RAJO generi *mурino* insertas invenias, unicam *leporino*. Ab utroque tamen, ut & a reliquis omnibus Glirium familiis, distinctissima est hæcce gens & habitum formamque prorsus singularem a Natura accepit.

CAVIÆ nomen barbarum quidem est; quum vero a KLEINIO adoptatum fuerit, pro genere, cuius hic novam speciem sistam, significando, illud malui servare, quam nova denominatione Zoologiam impedire.

Omnes hujus generis species cum *Leporino* aliquam produnt convenientiam; mole imprimis & forma trunci Leporibus adfines sunt. Attamen crura posteriora minus longa habent, quam illi, adeoque gressu minus subsultant; breviores etiam in genere &

& plurimæ quoque ventricosiores. Capitis auricularumque figura, magis, ad *Hystrices* accedunt, quos inter & *Murinum* genus mihi mediæ esse videntur.

CAVIIS vulgo *os* & *dentes*, ut *Hystrici*; *pedes* antici in qua-Characte-
tuor finduntur digitos, *postici* plerumque tridactyli, *rarius*, (in res.
unica nempe specie) utrinque digito adjecto, pentadactyli ob-
servantur. *Cauda* iisdem vel prorsus nulla, vel per exiguo ru-
dimento indicata est. *Claviculae* in sceleto nullæ, quo ab anima-
libus ex glirium ordine omnibus abludunt. *Caput* breve, re-
tusum; *auriculae* rotundatæ, nudiusculæ; *vellus* lœve e pilis ri-
gidiusculis, longis compositum. *Vocem* pleræque edunt por-
celli subæmulam, crebram; incedunt *grefju* magis reptabundo
quam Lepores & tardiores sunt. In posticos pedes raro, nec
omnes eriguntur. Brevi tempore gestant, prolemque numero-
sam, perfectam & pro matris mole maximam edunt.

CAVIARUM genus imprimis Americæ contigit, quæ tellus plu- Caviarum
rimas & maximas earum species alit. Vulgatissima omnium & species.
nobis notissima, utpote per Europam domestica facta, est *Ca-
via Cobaya* Brasilienium (a). Cum hacce specie singulari &
Caviis solemni conformatioe pedum convenient *Acuti* (b) &
Aperea (c) atque *Capybara* (d) MARCGRAFI. Inter has ulti-
ma

(a) *Cavia Cobaya* MARCGR. *brasili.* p. 224. PISON. *bras.* p. 102. quorum
de his & *Caviis* reliquis observata in reliquos autores transierunt. *Cunicu-
lus* BRISSON. *quadr. gen.* 23. *sp.* 7. *Mus Porcellus* LIN. *syst.* X. p. 59. *sp.* 1.
Le Cochon des Indes BUFFON. *bijt. nat. vol.* VIII. t. 1.

(b) *Aguti* vel *Acuti* brasiliensibus MARCGR. *brasili.* p. 224. PISON. *brasili.*
p. 102. *Cuniculus Aguty* BRISS. *quadr. gen.* 23. *sp.* 2. *Mus leporinus* LIN.
syst. X. p. 59. *sp.* 2. l'Agouti BUFFON *bijt. nat. vol.* VIII. t. 50.

(c) *Aperea* MARCGR. *brasili.* p. 223. PISON. *bras.* p. 103. *Cuniculus brasiliensis*
BRISSON. *quadr. gen.* 23. *sp.* 8.

(d) *Capybara* MARCGR. *brasili.* p. 230. PISON. *bras.* p. 99. *Hydrochærus*
BRISSON. *quadr. gen.* 17. Le Cabiai BUFFON. *bijt. nat. vol.* XII. t. 49.

ma differt a congeneribus singulari maxillæ superioris crassitie & digitis pedum posticorum per insignes corii plicas connexis, natatui adaptatis; eademque & CAVIA *Paca* maximæ hujus generis species sunt. *Pacam* (*e*) Brasiliensium, Caviarum e censu esse minime dubium est. Ea tamen in posticis pedibus, praeter tres maiores digitos, utrinque accessorium minutum habet, novoque argumento demonstrat, non ubique generum naturarium certos & constantes characteres constitui posse. Sola ex recensitis cognitis speciebus CAVIA *Acuti* rudimentum fistit caudæ reliquis omnibus speciebus denegatæ.

Caviis ad fine animal Afri-
canum. Proprium Novo Orbi credidissem *Caviarum genus*, nisi plura vidissem specimina animalculi ad Promontorium Bonæ Spei copiosissimi, at inter Zoologos nondum bene noti; quod quamvis conformatioe a *Caviis Americanis* & dentibus ab universo *Glirium* ordine plurimum differat, Caviarum tamen generi accessendum utique videtur, & a ludibunda quasi Natura, secundum Americanarum specierum ectypon, efficta & varie mutata atque anomala imitatio dici posset.

De hocce Animalculo altum apud autores silentium. Unicum ejus vestigium existat apud KOLBIUM (*afric. edit. belg.* Vol. I. p. 173. 183.) cuius tamen locos nunquam huc referre potuisse, nisi sub eadem denominatione, quæ KOLBII jam tempore obtinebat, etiamnum inter Belgas Promontorii Africæ accolas vulgo notum esset animal. *Melis* nempe *Capensis* (*Kaapsche Dass*, *Klip Dass*) nomine illud adpellant, quod jam KOLBIO ineptum visum (*l. cit. p. 173.*) & cum *Marmotæ Capensis* (*Marmott*) aptiori illi visa & faltem ob habitus quandam

(*e*) *Paca* MARCGR. *brasil.* p. 224. PISON. *brasil.* p. 101. *Cuniculus Paca* BRIS-
SON. *quadr. gen.* 23. *sp.* 4. *Le Paca* BUFFON. *hist. nat.* Vol. X. p. 269. t. 43.

dam similitudinem condonanda adpellatione ab illo commutatum fuit (*l. cit. p. 189.*)

Nomina a *Kolbio* excitata belgica sola satis indicant, cuniculos sub terra fodere *Cavias Capenses*. Evidentius illud ex pedum conformatione & accolarum relatione liquet. *KOLBE* carnem earum sapidissimam esse dicit & refert puerum, qui *Ovium gregem* inter rupes pascebatur, instituisse ad earum capturam canem, cuius officio quotidie a venatu onustus domum sese recipere poterat; unde frequentiam earum in montosis Africæ meridionalis tractibus, adeoque fœcunditatem hujus quoque speciei colligere licet.

Vivam *Caviam nostram Capensem* vidi in celebri *Vivario Amstelodamenfi* (*in de blaauwe Jan*). *Incessus* illi, ut congenerum, reptabundus erat. *Vox* sonus acutus, aliquoties repetitus. *Victus ex pane, & vegetabilibus*. Ex alio specimine icon, quam hic adjeci, ab insigni *Zoographo* confecta fuit: *Amstelodamense* specimen, cum postea voracitate periisset, a *Clariss. A. VOSMAER*, cui transmissum fuit animalis cadaver, concessum summa cum admiratione dissecui. Quæ ex eo specimine masculo, ex juniori alio itidem masculo in *Museo ACADEMIÆ Lugduno-batavae* asservato, atque ex femella, quam liquore spirituoso conditam, in *Museo SERENISSIMI PRINCIPIIS AURACI* lustrare licuit, de animali nostro addidici, jam minutim enarrabo.

D E S C R I P T I O

C A V I Æ C A P E N S I S

Tab. III. & IV. fig. 5-13.

Magnitudo Marmotæ vulgaris, cui & forma corporis seu circumcaſura Animalculum nostrum perquam simile est.

Caput antice simillimum est capiti *Traguli* vel *Moschi pygmei*, nec enim aptius comparari potest; at genæ & occiput tumidiora ob musculos mandibulæ robustos, & vellus circa caput densum.

Myftax utrinque in labio superiori e setis nigris, quarum 3 majores, totidemque ante eas minores, præter pilos sparsos versus nasum. *Labium* inferius utrinque *pilis* albidis, parallelis, deorsum versis, subciliatum. In gula *fasciculus* e setis crassis, tredenis circiter, brevioribus nigricantibus. *Verruca* genæ bisepta. *Supercilia* setis circiter undenis, maximis, inæqualibus, atris sparsa.

Nasus nudus, angulo per labium superius, subbipartitum descendens. (*Tab. IV. fig. 5.*)

Dentes primores supra bini, lati, rotundata acie terminati, convexiusculi, *distantes*: interjecto *lobulo* gingivarum gemino versus labium continuato. In *inferiori* maxilla incisivi (contra, quam in congeneribus, imo Gliribus notis omnibus) adsunt *quaterni*, contigui, lati, truncati, singuli bis crenati; æquales in junioribus,

nioribus, at in adulta, quam vivam vidi, extiores altius ad latera excreverant, interius, occursu superiorum, oblique prætriti. (*Tab. IV. fig. 5.*) *Molares* a primoribus distant, suntque per magni, inferiores exterius obliquè truncati, suscipiendi a superioribus, numero ubique quaterni, cum minore in superiori maxilla utrinque ante reliquos accessorio.

Palati rugas in juniori 13, in adulto tantum 8 vel 9 parium numeravi. *Labium* inferius triplici plica frenulatum, quarum ad dentium primorum extimum utrinque insignior una, tertia in medio exilis.

Linguae extremitas subhumana, punctis vix conspicuis æqualiter papilloſa; basis crassior, papillis grossioribus, æqualibus obsita, antice sinu & supra eum bulbo convexo terminata, ad latera sulcis transversis, brevissimis quasi crenata.

Oculi mediocres. *Periophthalmium* insigne.

Auriculæ ovales, patulæ, vellere semiabsconditæ, ipsæ quoque, præter marginem late nudum, lanuginosæ, fuſcæ.

Artus perbreves, humeri enim ac femora intra pellem latent. Pedum volæ nudæ callosæ. *Palmæ* margine quadrilobæ (*Tab. IV. fig. 6.*); lobi obtusissimi, callo soleæ (*fig. 6. b.*) subreflexo præmuniti, ceteroquin mutici, supraque (*fig. 6. a.*) velut vestigio unguis notati. *Plantæ* (*fig. 7. a. b.*) sesquitridactylæ; digitæ enim 2 externi in unicum, apice bilobum, itidemque muticum coadunati: intimus vero disjunctus & ungue tenui contorto seu conchaceo, apici digitæ circumflexo instructus est. (*fig. 7. a.*)

Corpus breve; truncus contractior quam Caviis reliquis; abdomen ventricosissimum.

Cauda prorsus nulla, neque vestigium ejus vel minimum adparet. *Anus* ampliusculus; *præputium* inter femora cylindricum, breviter exsertum, in eoque *penis* parvulus masculis.

Vellus rariusculum, tenue, lanuginosum, in maxima parte corporis intus canescens, extus gryseum; largissimum circa occiput in cervice & scapulis; versus latera & in ventre mollius, teneriusque, sordide ex gryseo albidum, in dorso longitudinaliter fuscescens, pilis longioribus, rudioribusque nigris, apicem gryseo-pallidis, sive *leporinis* commixtum; *Caput* fere totum leporino puto vestitum; *Pedes* pilis brevibus strictis obsiti.

Sic *in vivo*, adulto. *Junioris masculi*, liquore servati *color* subsimilis esse videbatur gryseo fuscescens, in dorso obscurior, versus artus gryseus & dilutior per latera; subtus longitudinaliter albicans. *Femellæ* necdum adultæ, liquore pariter conditæ & in *Museo SERENISSIMI PRINCIPIS* asservatæ colorem in toto corpore observavi gryseo albidum; inferne candidiorem, & in volis quoque pedum non, ut masculis fuscum, sed gryseo luteum.

In omnibus his *setæ* passim longiusculæ velleri interspersæ prominebant, albantes in feminino specimine, nigricantes in utroque masculo mihi viso. Observabatur imprimis *seta* utrinque ad angulum paroticum maxillæ, & infra eam ad collum utробique *una*, *itemque* ad gulam; *alia* major istis ante humeri articulum in collo; *duo* setarum paria in cervice superiori, *totidemque* fere supra scapulas; *unica* extus in humero, gryfescentes *plures* sparsæ per brachii latus externum, cum albidioribus in-

terioris lateris decussatæ; *sparsæ* complures per latera, crebriores per clunes; *paucae*, teneræ, albidæ, etiam masculis, subtus in pectore.

Feminâ ista albida, Capite B. Spei adlata, rarer forte varietas & ob id ipsum transmissa fuerat. Vulgaris enim Color leporinus esse mihi videtur.

M E N S U R A E.

JUNIORIS, curiosius commensurati primum dimensiones proferam.

Longitudo tota a naſo ad locum caudæ	-	-	o. 10.	o.
- - - - capitis a naſo ad occiput	-	-	o. 2.	4.
Distantia a naſo ad ortum aurium	-	-	o. 1.	10.
- - - - ad canthum oculorum	-	-	o. o.	9.
- - - - a cantho postico oculorum ad aures	-	-	o. o.	11.
Rostri Latitudo	-	-	o. o.	7 $\frac{1}{2}$.
- - - clausi altitudo	-	-	o. o.	11.
Longitudo oculorum	-	-	o. o.	3 $\frac{1}{2}$.
- - - aurium ab antico finu	-	-	o. o.	10.
- - - - ad verticem	-	-	o. o.	7.
- - - - setarum longiorum mystacis	-	-	o. i.	7.
- - - - supraciliarium	-	-	o. i.	8.
- - - humerorum ad flexuram cubiti	-	-	o. i.	4.
- - - antibrachii ad carpum	-	-	o. i.	1 $\frac{1}{2}$.
- - - volæ nudæ cum lobis	-	-	o. i.	o.
- - - femorum circiter a trochantere ad genu	-	-	o. i.	4.
- - - tibiarum a genu ad calcaneum	-	-	o. i.	6 $\frac{1}{2}$.
- - - volæ a calcaneo ad apicem digiti	-	-	o. i.	7 $\frac{1}{2}$.
- - - unguis in posticis pedibus	-	-	o. o.	3.

FEMELLAM itidem juniorem tota longitudine 10 $\frac{1}{2}$, capite 2 $\frac{1}{2}$ uncias æquare inveni.

EX ADULTI tandem cadavere sequentes notavi mensuras.

Longitudo a nafo ad coccygem tota	-	I. 3. 3.
- - - capitum totum	-	O. 3. 4.
Oculorum distantia a nafo	-	O. I. 0.
- - - ab auribus	-	O. I. 2.
Longitudo aurium	-	O. I. 1.
- - - tibiarum antecarum	-	O. I. 5.
- - - posticarum	-	O. 2. 4.
- - - palmarum	-	O. I. 5.
- - - plantarum	-	O. 2. 2.

Quæ proportiones præter capitum deminutum volumen & pedes paulo breviores, cum junioris tertia circiter pars minoris proportionibus circiter convenient.

A N A T O M E Tab. IV. fig. 8-13.

Aperto abdomen ventricosissimo, apparuit illico insignis crasorum intestinorum apparatus; fagus nempe magnus Coli in hypogastrio transversus, & cœca a dextris ad sinistra oblique descendens, unde Colon sub ventriculo reptans transfibat & sinisterius denuo descendens in rectum pergebat. Inter hæc & ventriculum dorsique spinam sita erant tenuia intestina, spinæ ex parte adnata. *Omentum arachnoideum, exile.*

VENTRICULUS (*Tab. IV. fig. 8.*) in thoracis infera apertura transversus, hypochondrium sinistrum totum occupabat, & orificio utroque approximato spinæ dorsi contiguus erat; *œsophagus,*

gus, juxta spinam descendens & vix calamo cygneo crassior, intra abdomen longius, quam aliis animalibus, producitur, & antrorsum recurvatus ligamentoque quasi frenatus inseritur. (fig. 8. a.)

Ipse ventriculus ad Cardiam (fig. 8. a.) amplissimus ($7\frac{1}{2}$ poll.) sinistrius (seu *fundo*) (fig. 8. d.) in finum magnum conoideum expansus; dextrorsum sensim adtenuatus, & argute curvatus, ita ut *pylorus*, (fig. 8. b.) & *cardia* se invicem fere contingant, minimo & curvissimo *arcu* interjecto, cum contra *major* ventriculi *convexitas* amplissima & commensurata pedali major sit, quamvis chorda ventriculi seu directa longitudo vix quatuor uncias excedat. *Fibræ* circulares ubique robustissimæ; *Obliquarum* lata fascia cardiae circumjecta, inde versus convexitatem ventriculi dextrorsum descendit atque evanescit. *Membrana* interna facillime separabilis. *Pylorus* carnosus constrictus; & valvulae lunatae quædam species ad curvam œsophagi insertionem. *Vasa* ex *arcu* minori maxime distributa.

INTESTINUM *tenui* tota longitudine æquat pedes V. uncias IX. A Pyloro incipit (fig. 8. c.) amplitudine digitii medii, intus *punctis* contiguis atris villosum; cum villorum numero & magnitudine sensim minuitur intestini amplitudo, & tandem digito tertio, imo in fine *Ilei* vix minimo æqualis est. Pedali circiter a pyloro distantia membrana interna, atomis minutis & sensim rarioribus factis, cinerascit; & bipedali distantia prorsus albet. *Fibræ* in tenui intestino non conspicuæ; & *membranæ* in genere progressu adtenuantur.

In foco *mesenterii* intestini tenuis glandulæ exstant oblongæ nigricantes, in arcum coacervatæ, maiores & minores circiter undecim.

Sac-

Saccus Coli, (fig. 9.) seu *Coecum* breve sed amplissimum ventriculo vastius, a latere orificio Ilei (fig. 9. a.) opposito longitudinaliter subbipartitum, plicis aliquot transversis (imprimis ad insertionem Ilei insigniori una) subcellulosum, extremo retusum, didymum (fig. 9. b.), & a latere insertionis Ilei, cellula magna (fig. 9. c.), ultra didymam prominente auctum.

Orificium Ilei valvula lunata munitum: *Membranae* crassiores quam aut Ileo, aut Intestino spirali. *Fibrarum fasciculi* duo ad proximi latus, Coeci orificio oppositum, longitudinaliter percurrunt & cellulositatis causa sunt. *Vasa* utrinque ad Ilei Insertionem accendentia gemino arcu ad cellulam superam decurrent, & ramos per cellularum utrinque interstitia demittunt, in opposito latere anastomosibus cum comparibus jungendos.

Coecum excipit *INTESTINUM Spirale* in tres spiras compositum ab ortu (fig. 9. d.), superne subdidymo, adtenuatum usque ad initium secundæ spiræ, ubi amplitudinem circiter oesophagi humani acquirit (fig. 10. a. b.) & æqualiter pergit in *Intestinum bicorne*. Totam *Intestini spiralis* longitudinem sesquipedalem circiter æstimabam.

INTESTINUM bicorne (fig. 10.) rectum, amplissima parte in cornua 2 libera (fig. 10. cc.) tripollicaria, recta, conica, apice vermiciformi (fig. 10. d d.), circiter semi-pollicari, acuminata, producitur, & inter cornua *intestinum spirale* continuum recipit. (fig. 10. b.) *Cornuum membrana* crassior quam *Intestini spiralis*, fibrisque, maxime versus apicem, evidentissimis, circularibus prædita est.

Intestinum a cornibus longitudine sex circiter unciarum sensim adtenuatur in *CANALEM excrementitium* (fig. 10. e.) crassitiem

sitium digitii medii æquantem, bipedalem, scybalis molecularibus moniliformem, & fibris longitudinalibus robustissimis externe striatum. *Sphincter internus bicruris.*

Intestina, maxime crassa, *Chymo* copiosissimo, ex stramine & granis comminutis scatebant, imo Intestina, spirale & bicornis, sicciori ejusdem materiæ massa effarta fuere. *Scybala* in extre-
mo intestino erant moleculosa, fusco-lutea.

HEPAR (fig. 11.) totum in dextro hypochondrio positum, nec ultra medium diaphragmatis protensum, pro mole anima-
lis mediocre est, tripartito-septemlobum. *Portio sinistra* semi-
ovata, lata, plana, extenuata, mediis lobis ex parte substrata
(fig. 11. a.). *Dextra portio* (fig. 11. b. c.) in 2 lobos lanceola-
tos invicem incumbentes fissa, quibus adstat in medio *Lobulus*
Spigelii (fig. 11. d.) triqueter, in sinu ventriculi nidulans. *Media*
portio Hepatis in tres oblique fissa lobos (fig. 11. e. f. g.); quorum
superior dexteriorque (litt. e.) major ovato lanceolatus, medius
(litt. f.) exilius lanceolatus, sinistior (litt. g.) triqueter est. *Cy-
stis* fellea nulla. *Ductus Hepaticus* (litt. h.) crassitie pennæ galli-
naceæ, $\frac{3}{4}$ poll. a pyloro distantia intestino insertus (fig. 8. e.).
DUCTUS PANCREATICUS stramineo culmo tenuior, pollicari ab
isto intervallo, diverso lateri intestini implantatur (fig. 8. f.)

Ligamenta hepatis tria arachnoidea, laxa; suspensorium a dex-
teriori parte diaphragmatis, triangulare sinistrum vero a centro
ejusdem, & triangulare dextrum a costis dextri lateris pro-
ductum.

LIEN (fig. 12.) planus, lunatus, extremitatem alteram latus,
rotundatus, alteram adtenuatus, Reni sinistro impositus est &
adnatus.

F

RE-

RENES (*fig. 13. aa.*) Leporinis minores; Sinister paulo crassior, situque inferior & a vasis majoribus remotior dexteriore. Dexter enim venæ cavæ proximus adsidet & quatuor ultimas costas occupat, sinister tantum tres. Hinc *vena emulgens* dextra brevior, simplex; præter eamque venula exigua ex ipso ortu venæ spermaticæ ejus lateris ad renem dextrum deducitur. Sinistri renis *vena* longior, & ante insertionem bifurca est. *Arteriae renales* extra renem bicrures; dextra ortu altior, ita ut utraque recto angulo ad renem suum pergit, cum contra venæ ex adverso ortæ obliquius procedant ad renes. **Ureteres** (*fig. 13. bb.*) paralleli descendunt prope spinam & vesicæ fundo inferuntur.

VESICA urinaria (*fig. 13. c.*) exigua, vix glandis capax, ob ureterum insertionem subbicornis.

GLANDULÆ suprarenales (*fig. 12. dd.*) ovato subglobosæ, flavæ; sinistra situ multo inferior dexteriore.

TESTES (*fig. 13. ee.*) oblongi in lumbis, exterius ad Psoadum caput positi, adeoque paulo exteriores renibus, & semipollicari circiter ab iis distantia. Arcte lumbis adnati sunt ipsi testes, & coronati membranula seu ala ex peritonæo facta, & adipistrata, quæ vasa ex spermaticis accipit. *Ductus deferentes* (*fig. 13. ff.*) membranula, ceu mesenteriolo longitudinaliter adnexi, descendunt & ureteres decussant. *Venæ spermaticæ* ex cava deducuntur; sinistra major, ante testem ramum tribuit musculis hypochondrii, recurvatum, cui comitem arteriolam mittit aorta. Vena sp. *dextra* ramulum exserit deorsum in lumbares musculos absumendum. *Arteriae spermaticæ* ex renalis utrinque ramo inferiore, prope ubi bifurcantur, exeunt (*fig. 13. E.E.*)

Du-

Ductus deferentes inde ab *epididymide* tereti, sensim adtenuantur, versus pelvim, tenuissimi, filo vix crassiores sunt, & approximati pone vesicam decurrunt, ubi in serpentinos mæandros crispati *secundariam* quasi *epididymidem* (fig. 13. gg.) constituant & tandem recto denuo ductu ad urethræ ortum pergunt.

Ibi utrinque assidet *vesicula seminalis* (fig. 13. h.b.) flaccida, subramosa seu potius varicoso anfractuosa, permagna quippe, bipollicularis fere. Vesiculæ seminales e pelvi ad vesicæ & recti latera adscendunt usque in abdomen, & membranula antice musculis adnectuntur.

PENIS (fig. 13. i.) parvus, ligamento adstrictus symphysi, *Ischiūs* implantatus *cruribus* brevibus, quibus desuper *erectores*, inferne tumidi *acceleratores* adcubant (fig. 13. k.k.)

DIAPHRAGMA maximum, perobliquum, amplissimam thoracis aperturam claudit. *Centrum* tendineum cordato-sagittatum, in crura productum, quæ externe adcubant cruribus carnosis, œsophagum amplexantibus. *Venæ phrenicæ* truncis amplissimis radiatim e cava prodeunt, quinæ dexteriores, unica reliquis major sinistrorum ramosa.

COR magnum summum cavum thoracis usque ad quartam costam solum occupat, apice sinisterius ad sternum insistens & sterno atque diaphragmati substrato adnexum. Figura cordis ovato globosa, perobtusa. *Pericardium* strictum.

Aorta e sinu baseos cordis simplici trunco producta, simulac pericardio exit finditur in truncum dextrum minorem, qui carotidibus & subclavia dextra trifidus est, & sinistrum, qui

ad originem subclaviam sinistram edit, & illico arcuatus descendit intra thoracem longissime, utpote a curvatura ad ortum arteriæ phrenicæ insignis 4 pollices æquans.

Arteria pulmonalis subgemina, summis pulmonibus ad bronchia inserta. *Venæ* infra bronchia exeunt.

PULMONES parvi, explet cava ima & postica thoracis, a dia-phragmate antice & superius a corde coarctata, quorum dextrum paulo longius; *dexter* quinquelobus, lobo unico, dorsali, fere disjuncto, & cordi medio substrato; *sinister* trilobus, lobo majori anterius crena bifulco.

Trachea versus laryngem leviter dilatata postice imperfecta. *Larynx* veluti triplex; cartilagine nempe cricoidea latissima, infimam, thyreoidea & osse hyoide lato & singulari, superiores portiones constitente. Epiglottis majuscula, sub qua sinus magnus ante glottidem.

GLANDULA thyreoidea utrinque ad laryngem subglobata, pancreati substantia subsimilis.

VENA azygos e *cavæ* superioris fere ortu producta, cum aorta inferiori hiatu crurum diaphragmatis exit. Superiores rami intercostales, ex *vena cava* superiori ipsa derivantur.

NERVI brachiales in animali omnium reliquarum partium nervis majores & copiosiores.

SCELETON integrum nancisci non potui; capit is itaque & aratum extremorum, in pelle pro *Museo* effarta relictorum, Osteologia carendum nobis est.

Ver.

Vertebræ colli septem. Epistrophæus supra in cristam magnam, compressam, rotundatam adsurgit. Subsequentium processus spinosi exigui.

Dorsi vertebræ 22. septem priores, leporinis similes, spinis dorsalibus longissimis, linearibus, reclinatis; reliquæ spinis sensim latioribus, erectioribus; adeo ut a quartadecima lumbaribus similes fiant, crista pro spina latis, antrorum leviter vergentibus.

Lumbares vertebræ sex. *Sacri* in Coccygem sensim adtenuati, duodenæ, triquetræ. Longitudo spinæ ab atlantis margine ad apicem coccygis deprehensa fuit $12\frac{3}{4}$ poll.

Cofæ dextro in latere 21, sinistro una, inferne accessoria, plures. *Veræ* utrinque tantum septenæ quarum prima robustissima; spuriarum 6 utrinque cartilaginibus sterno adnexæ, reliquæ in musculos terminatae.

Sternum e vertebris quinis & osse ensiformi longo, cartilagine spathulata aucto, compositum.

Claviculæ in sceleto omnino nullæ, quod Caviis peculiare est, quum in universo præterea *glirium* ordine adsint.

In scapulis, humeris, pelvi, & femoribus nihil admodum singulare.



Constat ex his Naturam in interna hujus animalculi fabrica,

F 3

æque

æque ac in externa vidimus, insolita ubique adsestasse. Singularis intestini crassi structura & enormis coecorum vastities, neque non thoracis longitudo & stupendus vertebrarum dorsi atque costarum numerus, imprimis mirabilem ejus structuram reddunt. Ut taceam cystidis felleæ defectum, viscerum, præcipue thoracicorum, situm, pulmonum exilitatem, uréterum insertionem, Epididymides secundarias, aliaque. A congeneribus cognitis, viscerum præterea fere omnium forma insigniter differt, prout anatomen ejus, cum descriptione *Caviarum Cobayæ*, *Acuti* & *Capybara* a BUFFONIO præstata, comparanti patebit.

TÆNIA E T P E D I C U L U S

C A V I Æ C A P E N S I S

Tab. IV. fig. 14. 15.

Inter communiti straminis ramenta, quibus Crassa imprimis intestina in specimine dissecto referta erant, reperi disruptæ TÆNIÆ fragmenta, ad sesquipedalem fere longitudinem. Fragmenta illa variæ erant latitudinis; fragmenti latioris portionem in tabula (fig. 14. a b.) exprimi curavi. Color erat albidos. Oscula ob tenuitatem conspici nequierunt, neque glandulæ illæ opacæ in articulorum substantia aderant. Nihilo tamen fecius habitu & structura externa, totiusque Tæniæ in aqua fluitantis conduplicatione facile perspici potuit, eam ad speciem pertinuisse, quæ LINNÆO dicitur *Tænia vulgaris* (syst. nat. ed. X. p. 280. n. 2.)

In

In juniori specimine, quod in *Museo ACADEMIÆ Lugduno-batavæ* liquore servabatur, copiosissimos inveni PEDICULOS, gregatim, maxime circa caput & cervicem cuti adfixos; magnitudine varia, colore subgryseo, quibusdam fere albo. Talem microscopio auctum, tabula (*fig. 15. b.*) exhibet, & naturalem simul adulti magnitudinem (*fig. 15. a.*) indicat. In altero liquore servato paulo adultiori specimine quod perlustrare datum fuit, inque vivo animali, ne unicum quidem pediculum offendit; an forte pullos tantum infestant?



VESPER.

IV.

V E S P E R T I L I O

S O R I C I N U S.

Vesperti-
lionum
genus.



ESPERTILIONUM numerosus exercitus per omnes orbis partes vagatur, multumque a perfectione adhuc abest hujus generis historia. Rariores ideo *Museorum belgicorum* Vesptiliones subinde *Miscellaneis* meis inseram, huic primo speciem destidans minutam quidem, sed plus quam uno respectu notabilem.

Charakter
ex denti-
bus incer-
tissimus.

Natura *Vespertilionum* genus designavit evidentissimo charactere pedum primorum in alas dilatatorum quadrinervias, membranaceas, pollice unguiculato antice hamatas, & posticis pedibus membrana adnexas. Nec video quare BRISSONIUS evidentissime congeneres species in distincta duo genera *Pteropi* nempe & *Vespertilionis* segregaverit. Dentium primorum numerus solus huic distributioni ansam dedisse videtur. Is vero adeo vagus est in *Vespertilionibus*, ut in quaterna quinave genera discederent, si dentium incisorum numerus & figura hic pro constituendo genere sufficeret. In quibusdam enim, (& plerisque fere speciebus) supra primores dentes duo adsunt maiores, vel latiusculi vel conici, cum minuto extus accessorio ; infra

infra modo bini, modo quaterni, seni, imo octoni æquales plerumque, conferti; tuberculosi. In quibusdam dentes primores supra prorsus desunt. Supra infraque aliis quaterni sunt, æquales, conferti, & hi proprie *Pteropi* BRISSONIO audiunt. Ex iis qui dentes primores supra majores binos cum minuto accessorio habent *Vespertilio murinus*, (*La Noctule* BUFFON. *quadr. VIII. t. 18. f. 1.*) *auritus* (*L'oreillar* BUFFON. *quadr. VIII. t. 17. f. 1.*) & elegantissima species in SEBÆ thesauro (*thes. I. t. 56. f. 2,* 3.) & ab Ill. BUFFONIO (*quadr. vol. X. t. 20.*) delineata Ternatana & Ceylonensisbus *Kiriwoula* dicta eosdem in medio remotissimos & subacutos convergentesque habent. Harum *Kiriwoula* sola inter *Vespertiliones* incisivos infra octonus, minimos, confertos sistit; *V. murinus* vero (cui LINNÆUS *Faun. su. ed. II.* perperam dentes primores supra senos infra quaternos esse dixit,) & *auritus*, (cum quibus species inquilinæ a D'AUBENTONO nuper e tenebris productæ omnes, unica excepta, dentibus primoribus convenient,) infra seni tantum numerantur. Major *Vespertilionum* exoticorum numerus, *V. Spectrum* (a) (LIN. *sp. 2.*), *Perspicillatus* (LIN. *sp. 3.*) *Spasma*, & a BUFFONIO sub nomine *Fer-de-lance* (*quadr. vol. XIII. p. 226. t. 33.*) descriptus, primores supra minus remotos, rectosque & medios plerumque latiusculos, infra vero quaternos exhibent; Unicus *V. Leporinus* (LIN. *sp. 5.*) superiores præcedentibus similis, at infra tantum binos habet. Et in alia specie Americana, quæ *V. Molossus* ab oris figura dici meretur, (BUFFON

(a) *Vespertilio Spectrum*, de cuius, apud SEBAM satis bene delineati, existentia subdubitasse videtur Ill. BUFFON, nimis ubique in Sebae censura durus, quemque pulcherrime conservatum in Museo suo monstrat DN. C. P. MEYER *Amstelodamenensis*, linguam, uti plerique *Vespertiliones* papillosum, glabramque habet; nec ut *V. Vampyrus* hispidam; adeoque *Vampyrus* itinerantium per Americam esse nequit.

FON quadr. vol. X. p. 84. 87. t. 19.) observavi incisores infra quidem quaternos supra vero tantum binos, subacutos, deficientibus minutis exterioribus. V. *Vampyrus* (LIN. sp. 1.) solus supra infraque incisivos quaternos gerit, æquales, confertos; & male BRISSONIUS in V. *Spectro* quoque dentes sic habere putavit, eumque ad *Pteropos* suos retulit. In singulari tandem inquilina specie (Le fer-à-cheval quadr. vol. VIII. t. 20.) observavit BUFFONIUS plenarium incisorum in superiori maxilla defectum, quod & in exotica quadam specie obtinet.

Dentium etiam *caninorum* s. *laniariorum*, quorum *Vespertilio-nibus* præter majores, primarios, etiā accessoriī minores dati sunt, conformatio, proportio, & numerus in variis speciebus varius observatur; quas hic varietates recensere nimis foret longum.

Insignior differentia, qua Vespertiliones in binas maxime Phalanges discedunt, caudæ est in nonnullis defectus, in aliis præsentia. Has phalanges feliciter connectit V. *Leporinus* exigua cauda, membrana, quæ corpus ambit, breviore præditus. Extremum vero quasi caudatas inter species locum tenet V. *Molossus* noster, cuius cauda longissima tertia fere parte extra membranam prominet. Ecaudatarum specierum inter exoticos Vespertiliones insignis est numerus. Deest sic enim cauda V. *Vampyro*, *Spectro*, *Perspicillato*, *Spasmati* (LIN. sp. 4.) *Fer-de-Lance*, aliisque. Parvula quoque, hic describenda species, cauda caret & in eo quoque cum ecaudatis (excepto V. *Vampyro*) omnibus convenit, quod singulari nasi ornamento foliaceo instructa sit; quale in caudatarum specierum nulla fere observatur. Ad specialiorem jam hujus speciei descriptionem transeo; cuius figura ab Optimo EDWARDSIO (Icon. av. tab. 201. f. 1.) exhibita fuisse videtur. Nec enim ad V. *perspicillatum* pertinere hanc iconem

nem cum LINNÆO credam , cum magnitudo dissuadeat, quam proportio in iconibus servata, pariter EDWARDSII verba, muri-
no minorem faciunt, adeoque V. *soricino* potius nostro circiter comparandam.

D E S C R I P T I O

V E S P E R T I L I O N I S S O R I C I N I

Tab. V. ♂ IV. fig. 16-18.

Moles & color fere Soricis.

Rostrum pilosum , productum , subcylindricum ; obtusum , extremitate punctis piliferis sparsis radiatum est. *Maxilla infe-*
rior paulo longior, apice biloba , lobis margine granulosis (*Tab.*
IV. fig. 16. b.). *Rictus oris* longitudine rostri, vel ultra.

Dentes primores utrinque quaterni ; *superiorum medii latiu-*
sculi, truncati , *laterales acutiusculi* ; ex *inferioribus obtusis* ,
consertis, *medii minores* (*fig. 16. 18.*). *Canini primarii* supra ma-
jores & remotiores sunt ; *accessorii* brevissimi, triangulares, su-
pra utrinque 2, infra terni, serratim coëntes. *Molares humi-*
les, colliculosi, in qualibet maxilla utrinque terni.

Palati rugas arcuatas, octonas numeravi, quarum anteriores
integræ sunt (*fig. 18.*). *Lingua* (*fig. 16. c ♂ 17.*) singularis est
& pro animalculi mole maxima ; rostro duplo longior nempe ,
depressa , subtus lœvis , parte intra os semper latente punctis
papillaribus & margine utroque papillis acutis obsessa ; *extre-*
mitate plana, subacuta, supra (*fig. 17. a.*) medio canaliculata,

lateribus vero late hispida villis setaceis confertis, reclinatis, quorum exteriōres sensim longiores sunt; subtus (fig. 17. b.) lāvis prāter fimbria marginis.

Nasus in apice rostri reniformis, supra auctus est foliolo, cordato, acuto, plāno, submarginatoque (fig. 16. a.), cui *septum* inter nares fulcatum quasi pro petiolo continuatur.

Oculi majusculi nafum & auriculas medii interjacent; ante oculos vero adest cavitas seu sinus coecus singularis.

Auriculæ nudæ, intus transversim striatæ, subcordatæ, exteriōri margine convolutæ, capiti adcubant & lobulo intus semi-cordato, acuto, internum marginem crassissimo, quasi pistillatæ sunt (fig. 16. d.d. & D.)

Alæ fuscæ, pollicem tantum unguiculatæ. *Membrana* inter tendines femorum angulo recto excisa. *Caudæ* vestigium nullum.

Pedes postici pentadactyli, in digitos subæquales finduntur, uti Vespertilionibus facile omnibus. *Ungues* majusculi, falcati, lutescunt.

Villus in toto corpore, lanugineus, tener, mollis; in dorso cinerascente-fuscus, subtus albicans.

Quam descripsi, femina fuit, & exhibuit genitale externum scaphæ simile, (quale congeneribus vulgo observatur), antrorum productum, intus rugosum, & in quo papilla prominula cum orificio urethræ conspicua erat. Mari, paulo majori feminæ,

mina, ceteroquin simillimo, *penis* est breviter exsertus, cum
scroto didymo, magno, ante anum.

Iconem totius animalis, tam reptantis quam explicatis alis in
aëre suspensi ob oculos ponit *Tab. V.*

M E N S U R A E.

Longitudo tota a rostro ad locum caudæ	- - -	o. 2. 0.
a rostro ad marginem membranæ inter femora incisæ medium	- - -	o. 2. 6.
capitis a rostro ad nucham	- - -	o. o. II.
rictus sub oculis incipientis	- - -	o. o. 4.
linguæ a faucibus ad apicem	- - -	o. o. 10.
Distantia oculorum a naribus	- - -	o. o. 3 $\frac{1}{4}$.
ab oculis ad basin aurium	- - -	o. o. 3.
Longitudo oculorum ipsa	- - -	o. o. I $\frac{1}{3}$.
auricularum	- - -	o. o. 5.
Latitudo earundem media	- - -	o. o. 4.
Alæ expansæ æquant	- - -	o. 8. 2.
Longitudo humeri	- - -	o. o. 10.
antibrachii	- - -	o. I. 5 $\frac{1}{2}$.
digitus primi uniarticulati	- - -	o. I. 2.
secundi quatuor articulorum	- - -	o. 2. 6.
tertii triarticulati	- - -	o. I. 10.
quarti itidem triarculati	- - -	o. I. 9.
femorum	- - -	o. o. 6.
tibiarum	- - -	o. o. 7.
tarfi cum metatarso	- - -	o. o. 2.
digitorum	- - -	o. o. I $\frac{2}{3}$.
unguium	- - -	o. o. I $\frac{1}{6}$.
vulvæ.	- - -	o. o. I $\frac{1}{3}$.

IV.

SCIURUS

PETAURISTA.

*Sciurus
volans di-
aus.*



NICAM hucusque vulgo notam speciem inter SCIUROS recensuerunt plerique Zoologi, in quo pellis ad latera corporis latam plicam, inter pedes anticos atque femora postica efficit, cuius extensæ ope, dum ex arbore in arborem, transfultat animal, sustinetur lataque superficie quasi innatat aëri. *Sciuri volantis* hinc nomen accepit animalculum hocce, borealibus Asiæ & Americae plagis commune & a multis descriptum.

*De sciuro
Petaurista
Valentyni
locus.*

Sciurus, quem mihi accuratius describendum hic sumo, non tantum similibus, inter pedes extensis velis, sed & magnitudine, qua congeneres omnes longe superat, notabilis est. Rarissima de eo apud autores mentio occurrit; nec mirum, cum in solis Indici Oceani Insulis, quas perpauci observatores adierunt, reperiatur, & ibi quoque pro perraro animali habeatur. VALENTYN, qui, utcunque vitiosus, multa tamen bona habet & cuius fides indies apud me crescit, aliqua de hac *Sciuri* specie reliquit, quæ, quamvis vaga, & minime accurata, ex parte tamen de hac specie intelligenda esse appetet, quæque cum ad illustrandam rarissimi animalis historiam faciant hic inferere juvat. „ In Gilolo inquit, circa Dodingo, dantur Ci-

„ vettæ

„ vettæ volantes. Alas habent adinstar Vespertilionum (*male*)
 „ a prioribus ad posticos pedes extensas, quibus ex arbore in
 „ arborem transvolant. Longissimam etiam habent caudam,
 „ fere ut Cercopitheci. Cum confident animalia hæc alæ ea-
 „ rum non apparent. Vix quinquaginta annorum spatio inno-
 „ tuerunt, ferissima enim sunt & timidissima. Caput habent
 „ rufum, cum obscuri cinerei coloris mixtura; earundem alæ
 „ extus pilis vestitæ sunt, quo a Vespertilionibus differunt,
 „ (*ruditer*). Dentibus pollent & facillimo negotio una nocte
 „ caveam ligneam perrodunt. A quibusdam Cercopitheci volan-
 „ tes vocantur. Hususque certe de Sciuro nostro volante agitur.

Quod deinde addit VALENTYN, potius de *Lemure volante* Lin-
 næi intelligi debere videtur. „ Nautæ navis cujusdam ('t Jacht
 „ van Boero) quæ Anno 1677: *Halemahera Ternatæ*, prope Do-
 „ dingo, adpulerat, omnium primi tale animal viderunt quod
 „ in arboribus versabatur, ex una in alteram volitans. Pro
 „ Sciuro illud primo habuerunt, sed caput *acutius* visum est,
 „ similiusque capiti *Didelphidis orientalis* (*de qua infra*). Villo
 „ erat *cinereo*, stria a rostro per dorsum duæta nigra. Pellis
 „ a corporis lateribus a primorum pedum *digitis*, usque ad di-
 „ gitos posticorum producta erat, veli instar, quod tamen pi-
 „ lo extus vestitum & subtus quoque, uti abdomen albo vel-
 „ lere tectum erat. Cum per arbores saltabant, has pellés si-
 „ mul extendebant, ut toti quasi expansi viderentur. Inquili-
 „ ni similia animalia sibi nunquam visa fuisse afferebant. (*Va-*
 „ *lentyn. Ind. vol. III. p. 269. 270.*)

Fit deinde Sciuri nostri mentio in *Histoire gener. des Voyages*
Vol. XV. lib. IV. §. 9. p. 51. Ibi & Icon ejus adjecta est, desum-
 ta ex epistolis Jesuiticis (*Lettres édifiantes*). Dicitur ibi hoc
 animal, a Philippinensium insularum incolis TAQUAN dictum,
 lepo-

leporis esse magnitudine , sed colore vulpis ; & 30 palmorum distantiam uno saltu emitiri.

Præter VALENTYNUM & citatos *itineratores* nemo de Sciuro nostro egit, donec nuper Celeb. ALLAMAND in *Epitome Enumerationis quadrupedum Brissonianæ*, quam *Lugduni-batavorum* in octava forma excudi curavit, brevem ejus descriptionem ex specimine, quod in *Museo Academiæ Leydensis* servatur, fœmineo adornatam proponeret, sub nomine *Sciuri maximi volantis seu Felis volantis* quo vulgo nomine (*Vliegende Kat*) Curiosis Belgii donatur. (*Brisson. regn. anim. Lugd.-bat. 1762. 8. p. 112. Spec. 15.*)

Ego tria SCIURI nostri , (quem PETAURISTAM vocari debere puto, ob enormes quos edere videtur saltus), specimina vidi; feminea duo, alterum in *Museo ACADEMIÆ Leydensis*, alterum quod pro conficienda iōne & dimensionibus inserviit, in Museo quodam hoc ipso anno hic Hagæ auctionis lege distracto; tertium, ut videtur, masculum, coloribus diversissimum, in dictissimo & splendidissimo *Museo SERENISSIMI PRINCIPIS AURACI*. Ex his quæ annotaverim adponam.

SCIURI PETAURISTÆ

D E S C R I P T I O

Tab. VI. fig. 1. 2.

Moles circiter Cuniculi minoris.

Caput forma Sciurino globosius. *Myftax* rigidus , niger ;
verruca

verruca parotica pilifera. Dentes sciurei, antice fulvi. Auriculae parvae, nudiusculae, acutae.

Pedes antici tetradyctyli, postici pentadyctyli. *Digitii* anticotrum pedum proportione sunt uti Sciuris esse solent; in posticis extimus sive pollex brevior, reliqui subæquales. *Ungues* nigrant; unguis pollicis posticorum pedum reliquis major.

Membrana seu expansæ pellis plica inter pedes extensa, anticos usque ad carpum occupat, versus hypochondria angustatur, & posticorum pedum femora tantum adnectit. A carpo anticotrum pedum producitur hujus membranæ *lacinia triangularis*, oblique truncata, quæ ossiculo a tarso orto tenditur, & pilis densioribus, rigidioribus, inflexis fimbriata est, quales & totius membranæ marginem terminant.

Femora postice *plica* inter flexuram & caudam extensa veluti marginata sunt.

Cauda corpore longior, villofissima, teres.

Villus supra rudior & ex pilis factus, subitus & in cauda molles, laxus, lanosus, ut in cauda Sciuri nostratis.

Color in binis, quas vidi feminis, supra totus nitidissime & saturatissime castaneo-ferrugineus, passim subnigricans. Cauda ab ortu & in apice nigrat, medio saturate ferruginea. Subitus vellus dilute ferrugineum est.

At in specimine masculo, & forte juniori, quod in *Museo*, ut dixi, SERENISSIMI BATAVORUM GUBERNATORIS adservatur, color longe diversus observatur. Truncus nempe supra

H

niger

niger est, pilis tamen longioribus passim canis variegatus; latera capitis castaneo rufa, una cum villo obsoletiori utrinque per cervicem ad armos descendente. Artus castaneo ferruginei, at extremo nigri. Membrana laterum vellus nigrum sistit, margin'e vero pilos rudiores castaneos. Cauda obsoletius nigra est, & villus proni lateris fordide canus, in medio truncu albocantior.

In femina, quam ad descriptionem & Iconem imprimis adhibui, distincte apparuerunt *Mammæ* sex, in thorace & abdomine æquidistantes, papilla longa, linearis, & area lata nuda notabilis.

M E N S U R A E.

Longitudo corporis a rostro ad caudam in effarta

pelle	- - - - -	i'. 6". o.
caudæ	- - - - -	i. 8. o.



GENE



V I.

GENERA MYRMECOPHAGÆ ET DIDELPHIDIS

non esse Novo Orbi peculiaria.

**L**LUSTRISSIMUS BUFFONIUS in Didelphidum historia (*Hist. nat. Vol. X.*) earum in Oriente nullam dari speciem affirmavit & Myrmecophagæ quoque proprium Novo Orbi genus putans *Kolbium* aliosque carpsit, qui de Africana quadam specie locuti sunt. Huic summi Viri sententiæ si contraria hic tradidero, audaciæ me hujus veniam, a tanto veritatis Patrono & candore, judicio atque æquitate supra omnes celebrando Zoologo, facile impetraturum fore spero.

Ipsa, quam *Vir Illusterrimus* in *Historiæ animalium Volumen XIII.* descripsit, *Didelphidis* species, pedum posticorum conformatio-
DIDELPHIS ORIENTALIS.
nem singularis, Orientalis est & in plurimis Belgii Mu-
seis ex Moluccanis insulis adlata extat. Nolle haec tam au-
dañter affirmare, præsertim cum BUFFONIUS specimina sua sub
Rattorum Surinamensium (a.) titulo acceperit; nisi omne circa
præ-

(a) Nomen a coëmptoribus, quibus *Vir Celeberrimus* usus est, subministra-
H 2 tum

prædictæ speciei patriam eximisset dubium, Curiosorum Belgii omnium, qui eam in *Museo* ab amicis in Indico Archipelago habitantibus missam servant, consensus, & testimonium, inter alios *Celeberrimi SCHLOSSERI* apud *Amstelodamenses Medici practici felicissimi & Societatis regiae Londinensis socii*, qui eam ab amico in ultimi Orientis Insula *Amboyna* degente accepit.

Ad confirmandum assertum meum facit quod inter Surinamensia animalia, quæ quotannis copiose in Belgium mittuntur, nunquam hæc species occurrat & quod neque MARCGRAFIUS nec quisquam autorum, qui de Americanis animalibus egerunt, hanc attigerit; quanquam, in loco suo natali minime raram eam esse, crebra ejus, quæ hic in museis ubique occurrunt, præfertim juniora specimina & foetus docere videantur.

Deinde speciem nostram apud *VALENTYNUM*, qui eam certe ex America non habuit, exactissime descriptam invenimus, tanquam animal in Amboyna & reliquis Moluccani Archipelagi Insulis frequentissimum atque sub nomine *Coes-Coes* notissimum, imo, ob lepiditatem forte morum, cicurari quoque solitum.

tum fuit, pari ratione ac *Animalculum COATI SUILLO Americes affine*, in XIII. Volumine *Operis Buffoniani* descriptum, per eorum, qui illud transmiserant, duplarem errorem & perperam pro Americanæ originis animali, productum, & nomine alieno belgico dotatum fuit. *Animalculum* enim illud ipsum, quod BUFFONIUS tam graphice descripsit, elegantissimum, lepidissimum, proprium & inquilinum non Americanæ sed Africæ est, unde in Belgium interdum adfertur, & nuper etiam Promontorio Bonæ Spei in *Vivarium Serenissimi BELGIARUM GÜBERNATORIS* mittebatur, adfirmantibus donatoris litteris, illud in intimis Africæ cum compari, quod in itinere periit, captum fuisse. Deinde vero nomen Belgicum, *Surikate*, non huic animalculo convenit, sed vulgo Lemuri Cattæ & adfinibus adplicatur. Hæc hic incidenter.

litum. Quæ VALENTYN (*Ind. Vol. III. p. 272. seq.*) de Didelphide nostra orientali (quam pessima iconē exprimi curavit,) refert ex aliis certe autoribus exscripta non sunt, quandoquidem a nullo præter ipsum commemorata inveniuntur &, quoad descriptionem animalis, & propriæ & *Ill. BUFFONII* observationi respondeant. „ Colorem feminis adultis tantum & juniores ribus esse dicit leporinum, cum linea nigra per dorsum longitudinali; maribus autem, qui feminis semper majores, inconstantem, semper magis rufescētem, & quandoque candidum” (qualia ipse specimina vidi, quorum unum exstat in *Museo SERENISS. PRINCIPIS AURIACI.*) „ Ex albis aliquos gubernam docet habere flavam; adulorum oculos rubicundos; penem mari retrorsum directum, cum scroto magno; feminis in marsupio mammae 2 vel 4, totidemque pullos saltē in Amboyna, alibi plures. Imperfectos nudosque pullos mammis affixos fere in omnibus feminis reperiiri addit.” Quanquam, uti MARCGRAFIUS atque PISO in Americanis Didelphidibus, putaverit uterus, præter marsupium abdominale, animali suonullum esse, illud Viro anatomicis studiis minime imbuto potius, quam Medicis istis, condonandum erit, nec fidem reliquis, quæ refert, omnibus derogare potest. „ Porro in arboribus vivere narrat animal; viso homine e cauda sese suspendere & quasi librare, fixis simul oculis hominem respiciens, qui si tunc immobilis illud intueatur, soluto caudæ vinculo in terram decidere & a casu syncopticum facile capi vel occidi. Educari & cicurari facile; grunnitum edere uti Sciurus; meticulosissimum esse, urinam foetidissimam ex levissima causa demittens; primoribus pedibus prehendere, iisque ut manus uti; capto autem, si cauda, inter duos bacilloſ ab Indis ligari solita, gangræna abscedat, mori.”

Hæc puto sufficient pro afferenda *Didelphidis* hujus ex Orientali

tali India origine. In Africa quoque dari, non affirmaverim; quanquam vivam hanc ipsam *Didelphidem* Londini olim viam, custodes (rudes in his & ignari, ut solet,) ex Africā adlatam fuisse mihi affirmarent. Erat hæc major quam unquam ex India adlatum specimen viderim, & quamvis feminei sexus esset & insigni marsupio prædita, colore tamen erat *candido*, levissima flavescentis tinctura perfuso.

DIDELPHIDIS OPOSSUM VARIETAS ORIENTALIS. Nescio an stabilita VALENTYNI quoad hanc Didelphidis speciem fide, de altera, quam in Moluccanis Insulis reperiundam describit, Didelphidis specie dubitare deceat. Eam ab animali suo *Coes-Coes* expresse distinguit (*Ind. Vol. III. p. 275.*) & ab Amboynensibus *Coessoe-Aroe* sive, ut a Belgis pronunciatur, *Coussou-Arou*, Malaice *Pelandoc-Aroe* s. *Cuniculum aruensem*, a Belgis vero *Felem Aruensem* vocari dicit. Ex descriptione VALENTYNI mihi vix videtur dubium, Felem Aruensem eandem esse *Didelphidis Opossum* (*) americanæ constantem *Varietatem* cuius specimina duo, in *Museum SERENISSIMI PRINCIPIS AURIACI* sub *Didelphidis orientalis* titulo ex Sebano thesauro translata, lustravi. Similes certe ex America nunquam adlatas vidi. Differt hæcce varietas ab Americana imprimis colore & forte rostro vix evidenter longiore. *Color*, qui in Americanis cinereo fuscus esse solet, his multo dilutior & potius gryseo-ferrugineus dicendus; aliqua tamen in dorso, præsertim versus posteriora, fuscedine obumbratus est, subitusque albidus. Nigredinis circa oculos vestigium nullum; macula supraocularis subliturata & lunata; mystax tenerior quam in Americanis. Reliqua omnia convenient. Evidentius pulli, quos intra memoratorum speciminum marsupium partim hærentes, partim adjacentes

(*) *Didelphis Opossum LIN. Syst. X. sp. 3. Le Sarigue ou Opossum BUFFON. Hist. nat. Vol. X. p. 279. t. 45, 46.*

centes inveni , differunt a pullis americanæ varietatis. Nudiores enim sunt, quam ejusdem magnitudinis pulli americani, rariSSIMA in dorso grySEA lanugine pubescentes , & cutem per totum corpus albam fistunt, cum in americanis pullis, etiam prorsus nudis, dorsum jam nigredine obsoleta perfusum, & maculae supraoculares intra nigredinem capitis distinctæ appareant. Et nisi quis probet, hic memoratam varietatem in America quoque reperiri, ea pro altera *Valentyni* Didelphide habenda erit, & exemplum præbebit animalis cuius species novo orbi &ultiMI Orientis Insulis hodie communis casu forte ex America in Moluccanas Insulas olim transplantata fuerit. Adeoque forte non immerito SEBA Didelphidem , cuius (*thes. Vol. I. t. 38. f. 1.*) iconem dedit, orientalem vocavit (*l. c. p. 61.*), imo credibile est eum ibi , ex prædictis *Musei PRINCIPIS* speciminibus unum indigitare voluisse; hæc enim ex auctione SEBÆ redempta fuisse scio.

Priusquam Didelphidum causam relinquam, liceat aliam apud DIDEL-
SEBAM delineatam *Philandri* speciem, a D. *Opossum*, ad quam ab III. BUFFONIO refertur, distinctissimam, vindicare. Cum PHIS mar-
hanc ipse aliquoties examinaverim, facile agnovi *Sebam* eandem
rudi sua icone depingere voluisse. In hac vero pro orientali re-
censenda certissime hallucinatus est, inter alia enim Americana
animalia Surinamo missam inveni.

Magnitudine est circiter Martis, aut supra D. *Orientalem*, adeoque
congenerum maxima; Caput etiam majus & rostrum productius,
richtusque longior quam in reliquis. *Mystaces* etis crassis, maximi,
quinque ordinum; *verrucae* paroticæ pone richtum setis sex
maximis, dupli obliquo ordine positis; superciliares bifetæ,
gularis setis albis sparsa. *Dentes* prorsus ut in D. *Opossum*. *Auriculæ*
ovales, flaccidulæ, fuscæ, externe basi lobulo duplicatæ, cum in
D.

D. *Opossum* ibi sint bilamellatae. *Vellus* in toto corpore pallidum, at longioribus pilis nigris nebulatum, subtus dilutius; Ulnæ pedesque postici ultra genua nigro pilosa, regio supraocularis paulo dilutior. In dorso longitudinaliter & per clunes pili sparsi longiores e villo prominent, setiformes, apice multifidi, uti setæ porcinæ. *Marsupium* angustius quam in D. *Opossum*.

Vidi quoque marem juniorem hujus speciei, totum saturate ferrugineum, in dorso nigricantem, artubus subatris. Descriptio, quam dedit *Linnæus* *Didelphidis marsupialis*, & ad quam supra citatam *Sebae* iconem cum plurimis alienis synonymis retulit, satis bene hic quadrat.

MYRMECOPHAGA
africana

Describam nunc MYRMECOPHAGAM *africanam* de cuius existentia III. BUFFONIUS dubitavit. Hujus foetus præterito anno, cum aliis animalibus, *Promontorio Bonæ spei* in *Museum SERENISSIMI PRINCIPIIS* missus fuit, cum nomine adnexo Belgico, quod *Porcum terrestrem* (*Aardvarken*) significat, & quo jam KOLBIUS usus est (*Afr. edit. belg. Vol. I. p. 196.*)

Descrip-
tio.

Is foetus *mole* est fere Porcelli recens nati, at prorsus nudus adhuc, præterquam quod pili rari, longiusculi, nigri ad os & in pedibus sparsissimi observentur, crebriores in palpebris & ad talum pedum primorum. *Corpus* crassum est. *Caput* elongatum, magis quam in *M. myosura* (*), & rostrum, pone apicem crassum atque obtusissimum, quasi constrictum est. *Nares* in apice rostri, adproximatæ, lunatæ. *Auriculæ* maiores quam con-

(*) Tamandua-miri PISON. *brafil.* p. 321. Tamandua-J. MARCGR. *braf.* p. 225. Tamandua guaeu f. Ursæ formicaria SEB. *thes. I.* p. 65. t. 40 f. 1. & Tamandua, Murmecophaga, americana EJUSD. p. 60. t. 37. f. 2.

congenerum ulli, oblongæ, acutæ, planæ atque prorsus pendulae. *Pedes* humiles, fere ursini, antici tetradactyli, medio longiore, extimo minore reliquis. *Ungues* primorum pedem longiores, omnium triquetro-subulati, rectiusculi. *Cauda* corpore brevior, adtenuata, acuta.


Ex his *Myrmecophagam afram*, pro distinctissima a M. americanis specie, quilibet facile agnoscat. Convenit cum M. *sciura* (**) atque M. *myosura* numero digitorum in anterioribus pedibus; ultimam etiam auriculis pendulis, & capitis fere figura refert. At pedibus priori similior est. Ab utraque vero, ut & a M. *didaætyla* (***) plurimis notis differt.

Maximam inter congeneres esse, ex magnitudine foetus immaturi facile colligitur. KOLBIUS centum librarum unam memorat; cumque inter Porcos Africæ eam recenseat, magnitudinis nulla facta mentione, ipso silentio eam Sue domestica vix minorem esse innuere videtur. Pilum ei setosum dicit; ejusque carnem sapidissimam esse testatur. Addit eam (uti de Americanis notum quoque est) noctu, exferta lingua formicas colligere, egregie fodere, cuniculisque suis interdiu latere.

(**) Tamandua-guassu PISON. *bras.* p. 320. MARCGR. p. 225. Myrmecophaga tridaætyla (perperam) LIN. *syft. ed.* X. p. 35. *sp.* 2. Le Tamanoir BUFFON. *bijt. nat.* X. p. 161. *t.* 29. Quam jure ob caudæ hirsutiem M. *sciuram* vocabis.

(***) LIN. *syft. ed.* X. p. 35 *sp.* 1. Tamandua s. Coati Americana alba, altera. SEB. *thes. I.* p. 60. *t.* 37. *f.* 3. Le Fourmiller BUFFON. *bijt. nat.* X. p. 165. *t.* 30.





V I I.

GRUS CREPITANS

S E U

PSOPHIA LINNÆI.

Genera
Ardeæ,
Ciconiæ,
Gruis di-
stincta.



VES ab Ill. LINNÆO sub *Ardearum* nomine recen-
sitæ, constantibus & evidentissimis characteribus in-
tria genera, ab antiquioribus jam olim Ornitholo-
gus judiciose adoptata, distingui possunt; *Ardea-*
rum nempe, *Ciconiarum* atque *Gruum*.

Ardeæ.

ARDEÆ omnes habent *rostrum* longum, subulatum, usque ad oculos nudum. *Linguam* longam; *nares* lineares a superiori limbo semitectas, *sulcumque* supra nares longitudinalem. Habent *pedes* minus arduos quam Ciconiæ & Grues; *digitos* multo longiores, maxime posticum; *plicam* insignem inter externum digitum anticum & medium, vix ullam vero inter hunc & internum; *Ungues* tandem elongatos, acutos, maximeque notabilem medium anticum, interiori margine *crenulatum*.

Ciconiæ.

CICONIÆ, (quarum species binas Europa alit, unicam America, a MARCGRAFIO descriptam atque nomine *Mysteriæ* pro peculiari genere a LINNÆO productam,) *rostro* gaudent multo majori, quam

quam est *Ardearum*, lævi, absque fulco; *Linguæ* exhibent in fauclibus exiguum & imperfectum rudimentum; *Pedes* proceros, at *digitis* brevibus instructos, quorum antici interjectis pli-
cis æqualiter connexi, omnesque *unguibus* retusis submuti-
ci sunt.

GRUES denique, inter *Ardeas* & *Orides* quasi mediæ & am- Grues.
biguæ, convenienter inter se *rostro* cranium vix excedente, basi,
ubi nares, canaliculato, extremitate convexiusculo, *linguaque*
gallinacea; *Pedes* habent proceros, *digitos* mediocres, posticum
parvum & a terra remotiusculum, *plicam* inter anticorum tan-
tum externum & medium, *unguesque* tandem mediocres, acu-
tos. *Capite* gaudent plumosiore, quam *Ardeæ*, atque sæpe
vario ornatu insigni; *femora* quoque minus alte denudata si-
stunt.

Species *Ciconiarum*, iisque congenerem *Mycteriam*, *Ardeas* Psophia
facile omnes, & *Gruum* aliquas sub examen ipse revocare po- Linnæi.
tui & constantissimos in omnibus observavi characteres heic
propositos. Ex autopsia quoque didici tandem, avem ame-
ricanam, quam *PSOPHILÆ* nomine indigitaverunt *BARRERIUS* &
post eum *LINNÆUS*, peculiare genus constituendi jure (a) pri-
vandam, & characteribus æque ac habitu, moribusque ad *Grues*
esse referendam.

Juvat hic inferere descriptionem parum notæ & vexatissimæ
hujus Avis, admirandoque sonitu, quem edit, singularis; quam
in

(a) Aliud inter *Grallas* Ill. LINNÆI genus expungendum invenio; nempe
Tantali, qui una cum *Ardea Ibide* & *Ardea equinoctiali* LINNÆI, vere refe-
rendus erit ad *NUMENIOS*, a *Scolopacibus* evidentissime distinctos, & pro fin-
gulari genere a Natura constitutos.

In *Vivario SERENISSIMI PRINCIPIS AURIACI*, ex quatuor vi-
vis speciminibus, & eorum postea cadaveribus adornare licuit,
historicam pariter ac anatomicam. Eamque eo gratiorem fu-
turam spero, cum præter MARCGRAFIUM (*bijl. bras. p. 213.*)
PISONEM & BARRERIUM nemo inter Ornithologos *Psophiam* ex
autopsia descripscerit, & MARCGRAFII quoque, a quo nomine
brasiliensi *Mucucaguæ* appellata fuit, descriptio imperfecta mi-
nimeque fida sit, & tamen a WILLUGHBEJO, RAJO & BRISSE-
NIO transcripta fuerit; quorum iste ad *Gallinaceum* genus, hic
inter *Perdices* eam retulerunt, KLEINIUS vero, ex MARCGRAFII
minime curiosa descriptione tridactylam putans, ad *Otides* s.
Tardas.

Familiarissimæ erant, quas vivas vidi, cicuresque admo-
dum. Gressu & habitu, ut dixi, toto Gruem æmulabantur.
Comedebant comminutum panem, carnem, pisciculosque. Ce-
lerrime sæpe & magnis passibus decurrebant, pugnabantque sub-
sultantes, motis alis. Sonitu proprio maxime notabiles erant;
eum tamen non omni facile tempore edebant, quamvis imita-
tione ejus a custodibus excitarentur. Præmisso plerumque per os
sono rauco & interrupto, (*Scherek, Scherek,*) bis vel ter repetito,
in abdominis cavo respondebant sonitu quodam pluries iterato,
obscurore, Columbi prurientis æmulo; non emisso per anum, sed
ab intus concluso, ut videtur, aëre efformato. Talem subinde etiam
sine prius emissa rauca illa voce edebant, & ad singulum tho-
racis sonitum ventrem movere & rostrum leviter aperire con-
spiciebantur. Altero sæpe pedi insistentes, retracto collo quie-
scebant. Ex adlatis tres, vel alimenti vel aëris vitio intra bre-
ve tempus perierunt; unica etiamnum in Vivario superstes Cu-
riosorum admirationem voce subinde excitare pergit.

D E S C R I P T I O

G R U I S . C R E P I T A N T I S

Tab. I. ē longinquo.

Magnitudo circiter Numenii Arquatae, quo paulo crassior breviorque corpore est; Gruibus etiam omnibus proportiones breviores habet, ceteroquin habitu toto Gruem referens.

Rostrum gruino multo brevius, & fere Otidis simile, conoidem, subcompressum, extremitate convexiusculum.

Nares bafi propiores, oblongo-lineares, depresso, perviae.

Lingua cartilaginea, plana, apice fimbriato-lacera.

Pedes robusti, proceri, ad media femora usque nudi, tetradactyli. *Digitus* posticus brevior a terra subremotus; *plicae* anticos connectentes, crassæ, interioris obsoleta; *Ungues* breves, obtusæ. *Calcaneum* rotundum, ut in Struthione, MARCGRAFIUS (b) huic avi tribuit, & vere sub postico digito tuber convexum seu talus tumet.

Re-

(b) Adponam MARCGRAFI descriptionem verbis candidissimi RAJI, ut meæ comparari possit, quantumque abludat a natura intelligatur: „ *Magnitudo Galli*, „ *næ nostratis*; *Rostrum nigrum*: *Corpus crassum*; *cauda nulla*. *Calcaneus rotundus*, „ ut in Struthione: *Ungues obtusi gryfei*. *Totum caput & collum punctulatum est*, „ *obscure flavo & nigro*; *sub gutture albicat*. *Pectus, venter & dorsum obscuræ*, „ *re cinerea*. *Alæ umbræ coloris per totum, undatæ nigro*, „ *præter remiges penas*, „ *nas quæ totaliter nigrae*. *Pedes cœrulei*. *Carnosa admodum avis*. *Humi currit*, „ *nam pedes inepti sunt ad scandendum arbores*. ”

Remiges latæ, dumque alæ compositæ, urrhopygio paulo longiores; rectrices brevissimæ.

Plumæ capitis lanugineæ, colli squamiformes. Sub cauda lanugo laxa.

Color totius corporis ater, in trunco obsoletior. Pars inferior colli, jugulumque plumis paulo laxioribus præditum, quarum extima pars atrocoeruleo splendidissima. Alæ spuriæ dorsum totum obtegentes, plumbeo cinereæ; interscapulium ferrugineum. Remiges totæ atræ; in binis passim, sine regula, albo inquinatae & nebulosæ sunt. Rostrum e flavo nigricat, seu sordide virescit. Pedes fuscescente cinerei. Irides oculorum fusco-luteæ.

Iconem quæ habitum avis altero pedi innixæ, e longinquo exprimit, in *Tabula I.* hujus operis adjici curavi.

A N A T O M E.

Oesophagus ad ventriculum dilatatus, crassus, musculosus, intus rugis obfoletis, longitudinalibus & glandulis crebris inæqualis.

Ventriculus semitriturans, gallinaceo laxior & tenuior, intus rugosissimus, callo flavo incrustatus.

*Intestinum amplum, breve, utpote vix bipedale. Semipedali a ventriculo distantia coarctatur, tumque cavitatem ampliorem efformat, cui adsidet intestinulum *Coecum* semipollicare, adnatum; per reliquam deinde longitudinem inæquali amplitudine est.*

Coeca duo tripollicaria, trium pollicum ab ano distantia, sensim incrassata versus extremitatem coecam, obtusam.

He.

Hepar magnum, bilobum; *lobi* longitudinales proprio singuli sacco inclusi, quibus insitit pericardium.

Cystis biliaria inter hepatis lobos, nuce major, ductu junci fere crassitie æquante, longitudinaliter ipsi cystidi adnato, & cum hepatico deinde unito, in ampliorem intestini partem sese exonerat.

Larynx extra thoracem calami cygnei crassitie, fereque offeus, ad ingressum thoracis tenuior multo evadit, laxiorque & cartilagineus, unde procedunt canales duo semicylindrici, membrana perfecti, extensiles.


Saccus aëreus dexter usque in pelvim descendit, intraque thoracem septis membranaceis transversis, tribus vel quatuor cellulosus est. *Sinister*, multo angustior, in hypochondrio terminatur.

Glandulæ œsophageæ oblongæ, ad vasorum subclaviorum e thorace egressum positæ.

Glandulæ suprarenales oblongo-lunatae, flavescentes; & sub his *testes* (Januario) exigui, flaccidi, nigri in *Mare*.



APHRO.



V I I I.

A P H R O D I T Æ.

Molluscorum
historiam
imperfetta-
tissimam
esse.



NIMALIUM Molluscorum in Mari degentium vix centesimam partem bene novimus. Tanta autem est Naturæ in eorum forma & fabrica varietas, & tanta non modo inter genus & genus, sed inter generum extremas quoque species plerumque discrepantia, ut vel exercitatissimi in his sæpe dubii hæreant quoniam hoc vel illud noviter repertum ex hac classe animal referant, quove nomine adpellent.

Hinc est quod optimus BOHADSCH pleraque animalia marina, quorum laboriose descriptionem exaravit, ad Genera LINNÆI referre nesciverit & novis ubique nominibus dotaverit, specierum discrepancias pro genericis notis sumens, & nescius fabricam Molluscorum genericam a Natura in plusquam protreas formas per species modificantam esse.

Etiam LINNÆUS, qui primus Molluscorum animalium (sub nimis speciali nomine VERMIUM ipsi venientium) aciem digere re studuit, Naturæ institutum in *generibus* eorum constituen dis non ubique perspexisse videtur, longeque imprimis ab *ordinibus* Molluscorum naturalibus absuit.

Non quidem sperandum est, *ordines* hosce naturales ho-
die

die determinari posse, cum non modo species innumeræ, sed integra forte genera ex Classe *Molluscorum* lateant. Nihilosecius insignes jam nunc methodi a Natura observatæ scintillas adtentus observator passim emicantes percipit. Hæc vero fusius exponendi hic non est locus.

APHRODITÆ, NEREIDES atque SERPULÆ tria sunt a LINNÆO constituta *Molluscorum* genera, inter se valde affinia, ideoque quoad species ægrius disterminanda, quorum tamen ultimum prorsus diverso a prioribus ordine LINNÆUS collocavit atque tubum calcareum, quem parat, *Testaceis* adnumeravit.

Qui a præjudiciis libero animo hunc *Testaceorum* ordinem, qualis a LINNÆO & *Conchyliologis* ante eum omnibus traditur, consideraverit & non in testæ calcareæ accessoria nota consi-
stat, sed animalia, quarum hæ testæ involucrum sunt, perlustraverit, necessario perspicet triplicem hic *Molluscorum* gentem ab auctoribus invita natura congregatam fuisse, quarum singula aliquas species testa destitutas inter marina animalia adgnoscit. Sic enim universa COCHLIDUM seu *Testaceorum univalvium* familia, *Limacum* (a) & *Sepiarum* genera arctissima consanguinitate sibi juncta habet, & cum iis ordinem naturalem constituit, cui forte *Medusæ* adnumerandæ sunt. BIVALVIA *testaceorum* (cum quibus Teredinem conjungi debere judiciose docuit ADAN-
SONIUS)

(a) *Limacum* genus complectitur *Dorides*, *Tethidesque* LINNÆI omnes, adeoque *Lerneam* & *Argum* BOHADSCHII, itemque *Scyllæam*, ut videtur, LINNÆI. In marinis animalibus stupenda varietate species ubique disparavit atque exornavit Natura; unde minime angusti generum characteres hic esse debent. Pes *Limacum* glutinans, cui succedaneus in *Scillæa* fulcus, effentialis hujus generis character est. Ornamenta variarum specierum seu adminicula dorsalia, branchiarum loco sunt, & aliquibus, ut & tentacula, desunt.

SONIUS) analogum & nudum quasi ectypon est, cuius speciem unicum sub *Ascidii* nomine BASTERUS (*b*), plures *Tethyorum* titulo BOHADSCH & PLANCUS (*c*) descripsere. Huic ordini affinis valde est & forte adjungendus multis videbitur is, in quem *Priapos LINNÆI*, *Lepades*, *Echinos*, *Asteriasque*, cum *Encrinis* collocari debere censeo. SERPULÆ tandem pleræque, a reliquis testaceis (quibus testa quasi pro osse est, partemque corporis constituit,) eo maxime diversæ, quod tubo non adnatæ sint; *Serpulae* inquam, cum *Nereide* & *Aphrodita* indolem & fabricam communem habent atque in unum ordinem conjungi debent, qui ad *Zoophyta* gradum efficit, atque cui forte non inepte *Lumbrici*, *Hirudines*, *Ascarides*, *Gordii*, imo *Taniae* adnecterentur.

Ego hic modo dicta tria genera *Aphroditas* nempe, *Nereides* & *Serpulas* conjunctim proponam, ut eorum veri, si fieri possit, limites & characteres eruantur tandem & consanguinitas eo luctulentius adpareat.

Ex comparatis infra describendis *Aphroditarum* speciebus hujus primum generis character satis distinctus confici poterit. De *Nereidibus*, (quorum generi veras aliquas, ut deinde dicetur, *Aphroditas* ad sociaverat LINNÆUS, quarumque species plures idem *Serpulis* atque *Tubiporis* inferuerat,) deque *Serpulis* infra suo loco videbimus.

APHRO-

(*b*) BASTER *Opusc. subseciv. lib. 2. p. 84. t. 10. f. A-D.* BOHADSCH *de animal. marin. p. 128. c. 7. tab. 10.*

(*c*) PLANCUS *de Conchis minus notis. Edit. II. append. p. 109.* Tethya jam RONDELETIO vocata invenias. Pertinet ad idem genus rarissimum Zoophytum a RUSSELLIO in *Actis anglicis* sub Priapi pedunculati nomine & ab EDWARSIO in ultimo iconum suarum volumine delineatum, nec *Priapis* ullo modo adnumerandum, qui simplici tantum apertura gaudent.

APHRODITÆ omnes, uti hujus Molluscorum ordinis natura-
lis supra constituti fere omnia genera, *corpus* habent longum, Aphrodi
tarum ge
neralis de-
scriptio.
in transversa segmenta divisum, adeoque Insectorum simile.

Figura corporis in omnibus subquadrangula observatur & utra-
que extremitate obtusa, angustior tamen versus posticam extre-
mitatem, in qua *ani* apertura exigua. *Os* in anteriori extre-
mitate occurrit, aperturæ instar laxæ, rugosissimæ, quæ in faccu-
lum dicit, ingluviei, ut videtur, loco servientem. Ad os ple-
risque speciebus *cirrhi* quidam, ceu antennæ peculiares, ut & alia
sæpe *ornamenta* observantur.

Per totum corpus in *Aphroditis* vix non omnibus quadru-
plex observari solet series *pedunculorum*, ex pilorum setarum-
ve *fasciculo* factorum. Series nempe una utrinque ad dorsum &
totidem ad ventrem decurrent, & ex qualibet serie, singulum
corporis segmentum (etiam minima extremitatum) plerumque
suum sibi vindicat pedunculum. *Pedunculi* singuli præter peni-
cillum pilorum, *cirrho* etiam setaceo carnoſo vulgo instructi
sunt.

Præter pedunculos, per totum pariter corpus dispositas A-
phroditæ fistunt *Branchias*, in dorso, prope penicillos dorsa-
les positas, singulis fere segmentis, utrinque singulas, elegantissi-
mas varioque modo ramosas.

Hunc externarum partium numerum & habitum in *Aphrodi-
tarum* speciebus satis constanter deprehendimus. At protea
ubique Natura hic quoque, utut parcius, passim a norma de-
clinavit & non tantum modificatione partium, sed demptis etiam
hinc & inde organis atque particulis species distinxit. *Pedunculis*
in quibusdam speciebus *penicillos*, rarissime cirrhos abstulit. Aliis
K 2 bran-

branchiarum sola rudimenta dedit, iisdemque dorsum *squamaram* singulari apparatu munivit. Et quæ sunt alia, melius ex specierum descriptione addiscenda.

Figura quoque & maxime proportio ipsius corporis insigniter secundum species diversa observatur. Quibusdam contractior & ovata fere; aliis longissima, quas ideo ex habitu autores *Nereidibus* adnumeraverunt. Eadem est numeri segmentorum varietas; & hæc quidem non in diversis modo speciebus diversa deprehenditur, sed in quarundam, non tamen omnium specierum, individuis quoque fluctuat.

Internarum partium analogiam quandam inter *Aphroditarum* varias species obtinere vix dubium est. At rariores quasdam species, quas ex Museis aliorum habui, dissectioni subjecere nefas erat. Quas tamen pro anatome comparare potui species, collatae docuerunt viscerum generaliori constitutione sic convenire Aphroditas, ut *ventriculum* carnosum, triturantem, ex oris capacitate cibum recipientem, *intestina* capacia, cellulosa vel appendicibus adaucta, *venam* principalem canali alimentario longitudinaliter adnatam & per corpus ramos spargentem, & *nervum* tandem atque *musculosum* apparatum Erucarum aliquomo- do analogum omnes habere, credibile fit.

In universum, *Aphroditarum* externa & interna structura eas Insectis adfines reddit, unde haud inepte vulgo *Erucæ* & *Millepedæ marinæ* dicuntur. Et sic INSECTA per *Aphroditarum*, *Nereidum*, *Serpularumque* ad *Tubularias* continuatam seriem, cum ZOOPHYTIS cohærere videntur.

Vitæ genus Aphroditis per mare vagum est, nec latebras quæ runt,

runt, tubulosve conficiunt *Nereidum* in modum; sed in fundo maris nudæ versantur, atque ex Fucis forte nutrimentum sumunt. *Propagatio* earundem obscura etiamnum est, & quæ in solia *APHRODITA aculeata* indagari potuerunt, eam magis adhuc paradoxam reddunt. Consistit inde tamen, *duplicem* esse *Aphroditarum sexum*, quum in *Nereidibus* & *Serpulis hermafroditica* natura observetur, in *Molluscorum animalium classe* æque familiaris, ac inaudita inter animalia reliqua.

Species Aphroditarum, quæ mihi hucusque innotuerunt, plerasque huic fasciculo infero; Paucas, notatu pariter dignissimas, quarum tamen icones per temporis angustiam æri nondum incidi potuerunt, proximo spicilegio destinans. Si qui *Curiosorum* hic non commemoratas *Aphroditarum* species in *Museis suis* habeant, ut me certiorem facere velint summopere opto.



I. *APHRODITA ACULEATA*.

Primam hujus speciei distinctam iconem dedit OLIG. JACOBÆUS (*actor. hafn. Vol. III. p. 88. t. 88.*) *Vermemque aureum* vocavit. Rudis quoque ejusdem exstat icon apud BARRELIERUM (*icon. plantar. rarior. t. 1284.*) qui eam *Erucæ marinæ gryseo fuscæ* nomine salutat. Neque multo melior figura occurrit apud SWAMMERDAMIUM (*bibl. nat. p. 902. t. 10. f. 8-16.*) a quo nomine latino *Physali*, RONDELETIO jam usitato, & belgico *Limacis marinæ holosericeæ* (*Fluweele Seeflak*) donata, & anatomice quoque descripta fuit. Accuratius anatomen *Aphroditæ nostræ*, quam *Hystricem marinam* adpellat, prosecutus est REDI (*obs. circ. anim. viv. intra viv. Cf. Opuscul. vol.*

III. p. 276. seq. tab. 25.) cuius observata infra passim adtingam. Tandemque descriptionem quoque Aphroditæ dedit MOLINEUX (*act. angl. vol. 19. num. 225. p. 405.*)

Recensetur præterea *Aphrodita aculeata* apud RUY SCHIUM (*theatr. I. p. 23. n. 49.*) titulo *Erucæ marinæ pilis lateralibus aureis, cœruleis, viridibus, iridis instar fulgentibus præditæ, Hystrix marina dictæ*; & a DALEO (*hist. of Harwich and Dovercourt p. 394.*) *Muris marini* nomine. Extant & complures ejus Icones in SEBAE thesauro (*vol. I. tab. 53. fig. 3. tab. 90. fig. 1, 2. Vol. III. tab. 3. fig. 7, 8.*) Tandemque CELEBERR. BASTERUS eandem nuper iterum descripsit & iconem illustravit (*opusc. subsec. tom. II. lib. II. p. 63. seq. tab. 6. f. 1. 2.*)

III. LINNÆUS, qui primus generi nostro *Aphroditæ* nomen indidit, in prioribus *Systematis Naturæ editionibus* hanc solam speciem, nomine *A. nitentis*, recensere solebat; Eodemque eam titulo in *Faun. su. ed. I. n. 1284. in Mus. Adolpho-Frid. vol. I. p. 43.* inque *Amænitat. acad. vol. I. p. 326.* habet. In *Systematis Naturæ decima editione* vero *A. aculeata* nomine eam distinxit, quem in altera *Faunæ editionen 2199.* servavit, & quo etiam ego, novandi minime cupidus, tantisper hic utar.

Apud accolás littorum maris, in quibus *Aphrodita nostra* frequentius versatur, propria passim nomina obtinuit. *Belgis Mus marinus* (*Zee-muys*) dicitur, eodemque nomine (*Sea-mouse*) inter maritimos passim Anglos nota est. A Norvegiis *Mus auratus* (*Guld-Muus*) vocatur, & passim a Curiosis *Erucæ marinæ* nomen accepit.

Locus nat. talis. In maris fundo arenoso inter Belgiam & Angliam copiosa vivit hæc species, & in Belgii imprimis occidentali ora, inde

a vere adulta, inter Pleuronectes retibus capitur, per totam æstatem copiosa. In Mari etiam Balthico & Mediterraneo (secondum BARRELLIERI & REDII testimonium) reperitur, maxime tamen frigidioribus plagis addicta videtur.

D E S C R I P T I O

A P H R O D I T Æ A C U L E A T Æ.

Tab. VII. f. 1-13.

Corpus APHRODITÆ aculeatæ ovato-lanceolatum, crassum, postice adtenuatus & acutius; longitudine ad summum 4 vel 5 pollicum Parisinorum. BASTERUS septem pollices longas memorat, quantas in maximo earum numero nunquam vidi.

Lateris ventralis area lanceolata planiuscula rugosa, pedunculis utrinque pinnata (Tab. VII. fig. 2.)

Pedunculi utrinque, constanter 40-41. Horum 2 primi minutæ, compressi submutici, ex oris quasi palato antrosum producti, villo barbati, at setis & cirrho destituti; proximus utrinque cirrho reliquis majore, setarumque vix prominulis apicibus instruētus est. Inter hos medii oriuntur *cirrhi* duo carnosæ, setacei, antenniformes, trium quatuorve linearum longitudine; insidentes tuberculo convexo, quod a dorso *cirrbo impari*, minuto notatum est.

Reliqui *pedunculi* crassi, subconici & rugosi; subtus in medio notati cirrho seu mucrone brevi, subulato, carnosæ; apice retuso transversim rugosi, & ex rugis setiferi.

Se-

Setae rigidissimæ, nigræ, acutissimæ. Ex ruga infima transverso ordine 9-11, tenuiores. Proxima ruga setis crassioribus atque majoribus ad summum 6 pectinata, quarum posteriores longiores. Papilla peduncolorum terminalis setis 2 & impari supra eas, maximis armata, & puncto nigro ante priorem setam notata.

Peduncolorum *magnitudo* usque ad par decimum crescit, verum insignius septem priores, quorum & figura compressiuscula. Decrescunt deinde insigniter a 21^{mo}, ita ut aliquot ultimi (sex vel septem) filiformi sint tenuitate, iidemque compressi & confertissimi.

A vigesimo primo pari ad trigesimum etiam setæ numero & magnitudine minuuntur; ita ut trigesimo perpaucæ sint, subsequentibus adhuc pauciores, teneriores; deinde ultimis molles & demum postremis vix ulla hirsuties adsit.

Postremos pedunculos exiles, compressos, mollesque versus anum seu apicem posticum corporis confertos, non connumerasse videatur BASTERUS, unde pedunculos Aphroditis nostris tantum 32 esse dixit. Horum subinde unus alterve deficit, unde, & cum præterea in perfectis speciminibus cirri subulissimi aliquot, corpus supra anum terminantes obseruentur, incertitudo quædam numeri peduncolorum oritur. — Summa numeri setarum à BASTERO data, ob minorem earum in postremis pedunculis numerum, minuenda erit.

Latera corporis (fig. 1.) supra pedunculos, in totidem *lobos* transversales compressos partita.

Paulo supra pedunculos, in singulo lobo, *fasciculus* oritur re-

reclinis *villorum* tenerrimorum, aureo, cupreo, & viridi-cœruleante *splendentium*, quibus Aphroditæ latera nitent. Pone hunc papilla cutacea in quolibet lobo observatur.

Prope eundem fasciculum oritur *cirrus carnosus*, setaceus, longus, velo dorsali plerumque intextus.

Quicquid loborum supra cirrhos & inter villorum auratorum fasces atque pedunculos est, instar cutis Squali, subtilissime punctis acutis scabrum deprehenditur, & horret *setis* sparsis versus dorsum arrectis atque subreclinatis, maximis (peduncularibus enim pleraque majores sunt,) interdum æneo nitore perfusis, inæqualibus. *Setæ* per jugum loborum adscendendo antrorsum declinant, pettinatim digestæ in fasciculos; quorum imus remotior, *villis* sericeis, auratis laxius intertextus; reliqui quasi *serico* sordide flavescente gryseo, nitido, circa eosdem orto, denso implexi. Fasciculus qui ad dorsum est, ex senis ut plurimum, omnium maximis & subæqualibus setis compositus, arctius & largius reliquis stuppa sericea circumtextus.

Stuppa ista sericeæ naturæ circa setarum fasciculos, maxime superiores omnium loborum orta, supra dorsum animalis expansa & densissime commixta & intertexta, *velum* continuum tenacissimum efficit, (fig. 1. 3. 9. 10. ff.) alutæ tenuis subtilis, quod totum animalis dorsum operit, vix ad antennas & anum apertura relicta. Longitudinaliter sectum *velum* & ad latera reclinatum (fig. 3.) a lobis quasi totidem utrinque *pedunculis* ortum videtur, a quibus sericea stuppa per *velum* diffunditur, & inter quos pervius utrinque meatus est.

Remoto *velo* denudatum *dorsale latus* (fig. 3.) adparet in medio longitudinaliter depresso, versus latera vero convexis ju-

L

gis

gis inæquale; quorum alterna crassiora & veluti bilabiata sunt, reliqua *squamam* cartilagineam adnatam habent.

Squamæ (fig. 4-6.) tenuissimæ, albido-hyalinæ, cartilagineæ, planæ, margine integræ, centro & futura a centro versus exteriorum marginem ducta (fig. 4, c. 5, a.) adnatæ sunt. *Magnitudine* ad septimam crescunt; inde ad undecimam maximæ, subcirculares, (fig. 5, 6. c.) postremæ ad 14^{mam}. decrescunt, & quindecima oblongo-lanceolata (fig. 6. a. b.) supra anum prominet. *Situ naturali* alternæ ex utroque latere imbricatim superincumbunt.

Squamifera dorsi juga interstitiis pedunculorum veli dorsalis respondent. Inter *squamæ* utrinque tres priores, prolixiori plicæ adnatas, sacculi bilabiati adsunt nulli. *Primæ* *squamæ* basis respondet *pedunculo* secundo palatino; *secunda* *pedunculo* quarto, *tertia* quinto. Inde alternis pedunculis respondent *sacculi bilabiatæ*, adeoque *squama quarta* respondet pedunculorum septimo, *quinta* nono, *sexta* undecimo, *septima* tredecimo, *octava* quinto-decimo, *nona* decimo-septimo, *decima* unde-vigesimo, *undecima* primo & vigesimo, *duodecima* vigesimo-tertio, *tredecima* vi- gesimo quinto; at *quatuordecima* extra ordinem vigesimo-octa- vo, & *ultima* demum trigesimo primo.

Hæ *squamæ* non sunt branchiæ animalis; etenim harum præterea vestigia adsunt. *Rudimenta branchiarum* sunt quasi cristulæ seu limboli transversi, margine laceri, inter *squamæ* singuli, adeoque 14 parium, in *sacculis* maxime bilabiatis externe & posterius siti. Hujusmodi branchiæ quasi germen fig. 7. magnitudine naturali, aucta vero fig. 8. cum *sacculo bilabiatu*, cui insidet, exhibendum curavi.

Inter dorsi *squamæ* parvulæ interdum *Nereides* nidulantur alia- que

que inveniri solent. REDIUS singularia ibi animalcula, capitata rostelllo & antennulis instructa & postice in caudam adtenuata offendit.

Os (fig. 2.) Aphroditæ nostræ est apertura rugosa, ante tertium pedunculorum par, e qua, ut supra jam dictum est, anterorsum prima & minuta duo pedunculorum paria, hisque interjecti cirrhi antenniformes prominent (fig. 2. 13. e.). Inter hos cirrhos media præterea notabilis est lamella verticalis, parvula, cristæ gallinaceæ forma, at margine integra.

Anus apertura est exigua, in ipso corporis postico apice sita. *Genitales* aperturas proprias nulla adhibita opera detegere potui; nec unquam lympham seu aquam, naturaliter *Aphroditarum* corpus opplenrem, cui certo anni tempore ovula feminis, & in maribus lac feminine innatæ, neque per os neque per anum, vel minima quantitate exprimere potui. Et tamen inter vivas ex mari adlatas Aphroditas multæ contractæ & expulsa aqua vacuae, sine ullo tamen læsionis signo, offendit solent.

A N A T O M E.

In maceratis, *cutis* a musculis facile separari & seorsim secari potest, maxime in dorso, ubi tenerior ex albidoque pellucida est; cum in ventrali contra latere grossior, coriacea & opaca sit.

Muscularum apparatus multiplex. Per totum primo corpus longitudinaliter adnatæ, at continuæ adsunt fasciæ; in ventrali latere utrinque una ad pedunculos sita (fig. 13. c.c.), lata crassaque, angustiores binæ in medio dorso (fig. 13. a.a.) inter se distantem tamen.

Deinde paulo supra pedunculos, inter profundas seu alte prominentes laterum rugas, *musculi breves* (fig. 13. *bb.*) adsunt, lati, longitudinali situ; & his inferius incumbentes *obliqui*, (fig. 13. *dd.*) angustiores. Sub his sinus in cellulis laterum, qui intestinorum coecorum portionem recipiunt.

Musculi alii obliqui adsunt inter pedunculos & fascias abdominales, ipsi fasciae inserti.

Musculosae deinde adsunt *chordæ* (fig. 13.) ex plurimis disjunctis fasciculis factæ, a dorso versus abdomen ductæ, & corio ad internum fasciarum abdominalium marginem infixæ. Harum inter singulos pedunculos singula adest. Hæ cavum laterale abdominis quasi multiloculare reddunt, inque loculis intestinis cœcis nidum parant.

Pedunculi muscularum apparatu proprio instructi sunt. Cujusvis pedunculi *setæ* in fasciculum seu penicillum collectæ sunt circa apicem *spinæ* longæ, subulatæ, auratæ, quæ interiori obtusa extremitate intra cavum alvi prominet, (fig. 13. *gg.*) & motus pedunculorum dirigit. Hanc spinam *antennam* pedunculi vocabimus.

Ab antennæ interiori obtusa extremitate ortæ chordæ musculosæ, superius crebriores, versus cutem pergunt, & aliqua distantia inseruntur. Si antennam malo navis comparaveris, chordæ musculosæ erunt quasi rudentes. Harum nunc chordarum contractione antenna attolli, deprimi, antrorsum retrorsumve inclinari potest, & sic pedunculi in omnem directionem moventur. Quæ antennæ internam extremitatem adtollunt, crebriores sunt; eadem enim pedunculos deorsum dirigunt, & incessui animalis maxime serviant. Verosimile est vaginam carnem

neam singulæ antennæ esse , quæ setas intra pedunculos pro lu-
bitu animalis retrahit. Setis lateralibus Aphroditæ in fascicu-
lum collectis , similis respondet *antenna* , sed multo minor , in
cavo abdominalis tamen pariter prominula & chordis aliquot mu-
sculosis , pro setarum motu , instructa. Minutior musculorum
descriptio ostentationi potius quam utilitati serviret.

Sexta cute & musculis (fig. 9. c.c. 10. e.e.) in plerisque Aphro-
ditis effluit statim copiosissima *lympha* subglutinosa , tenaciuscu-
la , turbida.

Aperto in dorso longitudinaliter abdomine optime in con-
spectum prodit *canalis alimentarius*; cuius naturalem situm fi-
guris binis expressi (fig. 9. 10.). Harum altera (fig. 10.) ex
Aphrodita liquore plena fuit , altera (fig. 9.) in Aphrodita va-
cua & contracta situm viscerum repræsentat.

Ventriculus (fig. 9. 10. a.a. fig. 11. b.c. 12.) in anteriori parte
abdominis situs , per œsophagum (fig. 12. & 12*. d.d.) brevem , supra
laxum & ventricosum , peramplum , membranaceum , utrinque
musculo instructum ori adhæret , & *ligamento* utrinque lato (fig.
11. a.), musculofo anterioris extremitatis adhæret fasciis mu-
sculosis dorsalibus. Figura ventriculi compressa , inferius longi-
tudinaliter crassior , superne obtuse carinata. Anterior extremitas hians , refert quasi rectum Gobii pisciculi (fig. 12.) superiore
marginе bituberculato , fornicato , inferiore rectiore itidem bi-
tuberculato. Undique membrana alba œsophagi circumcreta est.
Interius , supra infraque , molle labium inter substantiæ musculo-
fæ & œsophagi confinia , ex villis confertum , ante tubercula adest.
Postice ventriculus (fig. 11. c. d.) sensim compressior , adtenua-
tur in intestinum.

Substantia ventriculi carneo-cartilaginea, transversim fibrofa; unde extus & intus transversis lineis striata apparet. Ad latera ventriculi paulo crassior est, exterius convexiuscula, interius longitudinaliter levissime excavata; postice sensim adtenuatur in intestini membranam. *Cavitas* ventriculi exigua, perpendicularis veluti rima est, (fig. 12. a.) leviter transversim striata, (fig. 12. * a.) membranaque obducta, quæ versus intestinum (f. 12*. b.) in plicas longitudinales corrugatur.

Ob duritiem substantiæ, & rudem quandam formæ analogiam, *Mentulam Aphroditæ* (*Zeemuystrelletje*) Piscatores Belgæ ventriculum vocant; Ab eorumque quibusdam accépi exemplos & tostos ventriculos comedì solere.

Intestinum (fig. 9, 10. bb. 11. d. e. f.) a ventriculi parte adtenuata obtuse incipit (fig. 11. d.), crassitie calami anserini, cylindricum, postica extremitate sensim versus anum adtenuatum, ex membrana tenui, transversim fibrofa factum. Ventriculi pars adtenuata ab intestino intususcipitur (fig. 12. *) ceu os uteri muliebris intra vaginam. Intestini præterea initium, maxime in contractis Aphroditis, in sigmoideum flexum componitur, cujus curvatura ventriculi posticæ extremitati incumbit (fig. 9, 10.)

In quibusdam speciminibus intestinum, modo in initio, modo circa medium in amplissimum *saccum* dilatatum inveni (fig. 11 e.). *Chymus* in iisdem abundantissimus, contractione unius intestini portionis, alteram sic extendisse videtur.

Intestinum per totam longitudinem pinnatum est *intestinulis* (fig. 10 dd. 11. gg.) transversis, 19 parium, (viginti numeravit REDI, forteque incertior eorum est numerus); Postica tenui-

ex-

extremitate, intestinorum loco, per *septula* utrinque *membra-nacea* integumentis adfigitur.

Intestinula coeca prope originem filiformia sunt, circa me-dium dilatata supra ramoso laciniosa fiunt, tunc denuo filiformia pergunt, & extremitate sacculo oblongo terminantur. Cuncta muscularum perpendicularium interstitiis inseruntur, ramulo partis mediae amplioris insigniori sacculos dorsales effarciant, deinde sub musculis brevibus laterum filiformi collo transeunt, & tota reliqua mole in sinus laterum, parenchymate quodam foetos, descendunt, ubi inter musculos nidulantur. *Pri-rra* confertius ex principali intestino oriuntur, & partem filiformem priorem productiorem habent; antrorum enim elongari necesse erat, ut sacculis & sinubus anterioribus, inde a sacculo bilabiato secundo dorsi, insererentur. *Media*, quæ brevissima via ad laterales sinus transversim pergunt, multo breviora ideo sunt. *Ultimum* coecorum intestinorum inseritur sacculo dor-fali primo eorum, qui inter squamam 13 & 14 sunt. Abhinc, uti dictum est, loco intestinorum tantum ligamenta seu membranulae transversæ supersunt, ad singulos pedunculos singulæ. Insertio intestinorum in saccos dorsales, horumque conformatio, qualis a REDIO describitur, imaginaria est, nec scrutinium sustinet.

Intestinula coeca cum intestino medio libere communicant, imo ubi oriuntur paulo ampliora sunt, quam in progressu por-tionis filiformis. Libere ergo per intestinum inflari possunt, & simili, atque illud, chymo impalpabili, olivaceo-fusco, vel viridi-atro, liquido, subamaro repleta plerumque reperiuntur, quem ex liquatis, ventriculi virtute aperte trituratoria, Fucorum parti-culis oriri credo; quamquam neque in ventriculo neque in œso-phago unquam quidquam integri alimenti invenire potuerim. Rectitudo & brevitas intestini medii, per capacissimum harum

ap-

appendicularum apparatus compensatur. Chymus enim ob angustiam ani diu retentus in eas transit, ibique commoratur, ut alimentum resorberi possit.

Remoto integro canali alimentario, quod, ob intestinula coeca inter musculos transeuntia, ægre sine horum passim disruptione fit, totum *systema nerveum* (fig. 13.) in conspectum prodit, quo summam cum *Erucis* aliisque *Insectis* analogiam prodit Aphrodita.

Truncus ejus communis (fig. 13. *ef.*) in muscularum fascillum abdominis interstitio, per nudam cutem longitudinaliter decurrens est *nervus* depresso, in recenti Aphrodita rubicundus, ex binis quasi funiculis coadunatis compositus & nodis obsoletis seu *gangliis* articulatus. Antice crassiori ganglio & bircruri pone œsophagum incipit, quolibet *crure* adtenuato in *nervum*, oris margines legentem & cirrho antenniformi sui lateris insertum. Per reliquam longitudinem *ganglia* 26, subæquidistantia (exceptis 2 primis paulo vicinioribus) pedunculorum singulis paribus aut potius *musculis verticalibus* respondent. Postica extremitate nervus in caudulam adtenuatam, e *gangliis* 7 vel 8, sensim minoribus compositam, moniliformem desinit.

E *gangliis* singulis oriuntur *nervi* utrinque 2 vel 3, divergentes, per musculos distribuendi. Nec nisi per hos nervos medulla vicinis partibus adhæret, atque in situ servatur; ideoque, cum contrahit corpus Aphrodita, in undulatos flexus compunitur, atque libera supra cutem abdominalis nudam fluctuat.

REDI nodosum nervum spinalem pro trunco systematis va sculosi, ob rubicundum forte colorem, habuit; *ganglia minora* quasi corcula esse putans.

Sy-

Systema sanguiferum difficilioris indaginis est; optime in moribundis atque recentissimis Aphroditis appetit.

Sectis in dorso longitudinaliter tegumentis, occurrit *vasculum* lymphæ sæpe turbidula plenum, e tenuissima membrana fabricatum, filo crassius, intestino principali supra longitudinaliter adnatum, versusque posteriora adtenuatum: quod *venam magnam* vocabo. Inter singulum pinnarum intestini par ab eo *ramulus* longus seu venula, versus dorsum emititur. Venularum anticae longius productæ sunt, versus anteriores enim dorsi partes exporrigi debent (fig. 9 & fig. 10. c.)

Antica venæ magnæ extremitas ab intestino abscedit, adtenuataque simplici ductu supra ventriculum pergit (fig. 9. a. 10.) libera, nec adnata, & ultra œsophagum, ob teneritudinem & partium concretionem pervestigari nequit. Supra œsophagum tamen utrinque ramulo brachiata esse visa est.

Sub intestinis, inde ab œsophago, per totam cavi ventris longitudinem *vagum* aliud observatur *vas*, ad singula pedunculorum interstitia oppositis longis *ramulis*, in musculos absumentis pinnatum. Videtur hoc venæ supra ventriculum pergentis reflexa continuatio esse. Quod si verum sit, dubitari nequit, *vasculosum systema* Aphroditæ simplicissimum esse; ex intestinis nempe colligi in truncum principalem, per reliquas omnes partes distribuendum. Adeoque succum, ex alimentis collectum per radices intestinales trunci sanguiferi, directa via in extremitates ejus arteriosas propelli & corpori impertiri. Hinc circulatio in Aphroditis non magis locum videretur habere, quam in plantis, quarum radicalis extremitas, tota venosa quasi, resorptum succum per truncum in continuos ramos, arteriis comparandos, propellit, in quibus nutrimento & incre-

mento plantæ adplicatur & superfluus terminalibus poris exhalat. Similem systematis vasculosi constitutionem in Nereidibus dari, infra videbimus. Ordinis, in quo *Aphroditas*, *Nereides* & *Serpulas* collocari debere supra docui, adfinitas cum Zoophytis, per *Tubularias* cet. hanc, quæ ad Infecta extendi posse videtur, notabiliorum etiam reddit observationem. Cf. quæ hoc facientia tradidi in *Elencho Zoophytorum* nuper edito p. 8.

Initio maxime æstatis sectæ Aphroditæ permulta exhibent *filamenta* alba, crispula, mollia, intricata, intestino ejusque appendicibus undique obtexta, & supra ventriculi etiam partem aliquando expansa ; qualia fere in Erucarum interaneis occurunt. In multis, & adultiori æstate in plurimis, hæcce filaments in innumera *granula* æqualia, arenularum magnitudine, ceu ovula, vix cohærentia, mutata inveni. Levi tractatione diffuebant cohærentes ovulorum series ; & in quibusdam Aphroditis, ubi forte maturiora fuerant, vix incisis tegumentis, lymphæ abdominali innatantia profluebant.

Eodem tamen tempore quo hæc in multis, nulla magnitudinis fere habita ratione, observantur, aliæ sæpe nullum neque filamentorum nec ovulorum vestigium exhibent.

Junio præterlapsi anni, in magno Aphroditarum ex Mari recons adlatarum numero, *minores* quasvis inveni scatentes *ovulis*, arenulæ magnitudine, tenaci gelatina in strias & glomeres cohærentibus. *Majores* simul pleræque abdomen *lacæ* fluido tenaciusculo plenum exhibuerunt.

Vix dubium videtur granula ista Aphroditarum esse *ovula*; lac autem in aliis observatum *seminalem liquorem*. Adeoque lacte repletas pro *maribus*, granulis vero foetas pro *fæminis* sumere pronum est.

est. At quomodo ovula & semen in cavitate nuda **abdominis** generantur, cum nullo vel sacco vel receptaculo inclusa inveniantur, nec peculiare viscus, parandis iis inserviens, in toto animali reperiatur ullum; quomodo deinde ex abdomine in lucem edantur ovula, & masculorum semen ovulis committatur, cum generationis organa nulla detegi possint, atque in toto animali præter os & anum apertura nulla adesse videatur, per utramque vero liquidi cavo **abdominis** inclusi nunquam vel tantillum vi exprimi aut patientia emulgeri possit; hæc, inquam, cum ignorissimis nescio. Ovula etiam, pro tanto animali producendo, per exigua cuivis videri debent; in eoque cum Ascaridibus & Lumbrico infra describendo Aphrodita nostra convenit.

Vellem, ut plura de *Aphroditarum aculeatarum* natura & moribus addere possem. Verum præter locum earum natalem, & alimentum verosimilime ex Fucis petitum, præterque incessum earum, Erucarum æmulum, & armaturam setarum s. potius spinarum lateralium, qua a piscibus rapacibus defenduntur, nihil certi cognovi. Ad reliquas ergo *Aphroditarum species* transeam, & eas primo recensem, quæ cum hac nostra prima *squamis* imprimis dorsalibus, branchiarum defectu & reliqua fabrica convenient.



2. *APHRODITA SQUAMATA.*

Primus **APHRODITÆ** *squamatae* mentionem fecit *Ill. LINNÆUS* (*syst. nat. ed. X. p. 655.*) & distinctam hujus spe- loca- ciei descriptionem dedit, quam cum præcedenti solam cognovisse videtur. Iconem ejus nuper dedit **BASTERUS** (*opusc. subsec. vol. II. lib. 3. t. 6. f. 5.*) quæ tamen nostram, æri tunc,

cum ultimus *Clarissimi Viri* libellus prodiret, jam incisam, minime superfluam reddit.

Locus nat. talis. Speciem nostram in Pelago vivere LINNÆUS docet. Et vere non in Belgiam & Angliam tantum adluente mari, verum etiam in Fuco Pelagi natante, & circa Promontorium Bonæ Spei habitare eandem scio. Inter Fucos & Sertularias libera vagatur & per maris fundum circumrepit; minus tamen vulgaris est. Quo utatur alimento non magis adfirmaverim, quam quale sit pabulum *Aphroditæ aculeatae*.

D E S C R I P T I O

A P H R O D I T Æ S Q U A M A T Æ.

Tab. VII. fig. 14. a-d.

Corpus ad summum pollicare, linearis-oblongum, depresso, in segmenta subdivisum (*Tab. VII. fig. 14. b.*), pedunculisque pinnatum.

Pedunculi 25 parium (*fig. 14. d.*), breves, compressi, *pedine* subbipartito, perpendiculari, ex paleis rigidis setisve auratis composito armati, omnesque basi subtus *villo* carneo notati.

Squamæ totum obtegunt dorsum (*fig. 14. a.*) 12 parium, planæ (*fig. 14. e.*), punctis gryfeis scabrae, extrorsum parvo disci spatio tuberculis dorsi supra pedunculorum basin adnatæ, alternatim imbricatae. Earum primæ minores, confertiores, transversim ovales; pleræque oblongæ sunt, situ obliquæ; ultimæ binæ reniformes, caudam tegunt. Omnes lamella cartilaginea

laginea constant, quæ dupli membrana; *superiore* punctata; anteriori parte læviore, *inferiore* tenera, lævi, inclusa latet.

Squamæ, excepto *secundo tertioque pari*, segmentis corporis, inde a primo, alternis insident; adeoque *primum* par segmento primo, *secundum tertio*, *tertium quarto*, *quartum sexto*, *quintum octavo*, *sextum decimo*, *septimum duodecimo*, *octavum quartum decimo*; *nonum decimo-sexto*, *decimum duodevigesimo*, *undecimum vicesimo*, *duodecimum vicesimo-secundo*.

Segmenta squamigeris interjecta supra pedunculos utrinque *cirrho* carnoſo notata sunt, qui squamigeris deest. Dorsum medium transversim striatum.

Os animalis constrictum, ante primos pedunculos, labio superiore tripapillari, supra quod eminent verrucula, cui utrinque adstat *cirrus geminus*, seu *tentaculum bipartitum*. Sic LINNÆUS quoque habet. Sic in pluribus vidi. At in quibusdam inveni supra os *cirrhos* 2 crassos, antenniformes, cum interjecto minore, *impari*, utrinque minuto villo stipato; exterius autem ad antennulas *cirrum gemellum*, exilem. BASTERUS tentacula sene indicat, quorum duo majora esse dicit; adeoque imparem majoribus interjectum neglexisse videtur.

A N A T O M E.

Cuticula alba, tenera in maceratis facile abscedit. *Abdominis cavum* lateraliter musculis verticalibus, ceu septis, multiloculare est, ut in *A. aculeata*. *Ventriculus substantia & figura*, fere ut in eadem, compressior etiam, postice terminatus *infundibulo* membranaceo, antice adpensus *œsophago* intus rugosissimo. Septo ventriculo observavi anticæ aperturæ marginem *dentibus* qua-

tuor cartilagineis, fuscescentibus, mucronatis, per paria oppositi in œsophagum prominere.

Intestinum rectum, adtenuatum, ab initio ultra medium utrinque pinnatum est appendiculis 9 linearibus, quarum pleraque, apice multipartitæ, fccculis dorsalibus ad pedunculorum basin fitis inferuntur.

Convenientia hinc viscerum æque ac externarum partium summa inter hanc nostram & *Apbroditam aculeatam*.



3. *APHRODITA LEPIDOTA*.

Locus. Hocce Animalculum specie a præcedenti certissime distinctum, quanquam ob summam omnium partium analogiam ægrius discernendum, delineasse videtur *Cel. BASTER* (*opusc. subsec. vol. I. lib. I. t. 4. f. 3. A-C.*) Certe in Mari inter Angliam & Belgium satis copiose occurrit hæc species & ex fascia plerumque longitudinali nigra facile adgnoscitur.

D E S C R I P T I O

A P H R O D I T Æ L E P I D O T Æ.

Tab. VII. fig. 15. a. b. Tab. VIII. fig. 1, 2.

Præcedente *minor* & *depressior*, ceteroquin forma subsimilis est.

Pe-

Pedunculi 36 parium (*Tab. VIII. fig. 2.*) productiores quam in præcedenti, & evidentius bipartiti, pilisque tenerioribus flavescentibus barbati. Ceteroquin, ut in illa, subtus ad basin *villo* omnes subulato notati, & ad dorsum *cirrho* longiusculo, apice nigricante prædicti, qui in squamigeris segmentis pariter abest, in postremis autem prælongus observatur.

Squamæ dorsales (*Tab. VIII. fig. 2, Tab. VII. fig. 13. b.*) 14 parium, transversim ovales, subtilissime punctatæ, exterioris disci areola supra pedunculos adnatæ, imbricatae & planissime incumbentes, totumque cum pedunculis dorsum obtegentes ceu continuo scuto, quod plerumque lata fascia longitudinali, atra pictum est.

Squamaram decem priora paria alternis corporis segmentis insident; at postrema tantum tertio cuilibet segmento data sunt. *Quartum-decimum* par interdum abest. Ablata magna squamarum parte dorsum nudum animalis sistit *Tabulae VII. fig. 13. a.*



4: *APHRODITA CIRRHOSA.*

Pro distincta Aphroditæ specie tradere minime dubito animalculum, quod nonnisi ex satis imperfecto specimine cognitum habeo. Communicavit illud *Celeb.* GRONOVUS & ex Mari Septentrionali suscepimus suis retulit. Tantam cum præcedentibus, imprimis *Aphrodita lepidota* similitudinem prodit, ut diu hæsitaverim annon pro adultiori & corrupto ejus specimine habenda esset. Peduncularum autem structura diversa, dubium excusfit.

D E S C R I P T I O

A P H R O D I T Æ C I R R H O S Æ.

Tab. VIII. fig. 3-6.

Corpus tenerimum, longiusculum, linearis-adtenuatum, ex te-
reti depresso-sculum adeoque ad Nereides figura accedens.

Pedunculi utrinque 35 productiores, compressi, apice biparti-
ti (*Tab. VIII. fig. 5. 6.*) portione superiore minore, utraque
penicillo ex pilis fulvescentibus (*fig. 6. e. d.*), in superiori (*fig. 6.
e.*) longioribus, in inferiore (*fig. 6. d.*) numerosioribus, barbata.

Squamæ in dorso (*fig. 3.*) undecim parium, subrotundæ, are-
ola in anteriore disci parte, supra pedunculos adnatæ (*fig. 5. a.*);
margine postico scabriusculæ, fuscoque denticulatæ, in *specimi-
ne*, quod descripsi, omnes in *vesiculos* inflatæ.

Squamaram par *primum* segmento quarto insidet, *secundum*
sexto & succendentia ternis quibuslibet segmentis.

Pedunculi squamis destituti omnes ad dorsum *cirrho* longo
(*fig. 6. c.*), filiformi, apice nigro & crassiusculo instructa sunt.
Tria prima paria, ipsa parvula, parvulos quoque cirrhos habent.
Postremi pedunculi itidem exigui, & iconismis (*fig. 3. 4.*), vitio
pictoris, velut remoti (*fig. 4. b.*) a reliquis expressi, cirrhis con-
tra prælongis gaudent. *Squamigera* segmenta cirrhis peduncu-
laribus carent (*fig. 5.*)

Os inter anticos pedunculos (*fig. 3, 4. a.*), *cirrbis* quaternis (ut
vide-

videtur, altero enim a latere deficiunt in specimine,) barbatum, quorum duo medii longiores, filiformes, toti fere nigricant.

A N A T O M E.

In specimine descripto *ventriculus* solus distingui potuit. Erat is cānosus, depresso, *œsophago* membranaceo adpensus, interne membrana albida vestitus, & antice in *œsophagum* prominens dentibus utrinque binis, adproximatis, cartilagineis, muricatis.

Cuticula albida atque iridescens huic speciei, teneriorque est quam ulli congenerum.

Sequuntur nunc *Aphroditarum* species, quæ *squamis* destituta *branchiis* elegantissimis, nudis, per dorsum dispositis, ab hucusque memoratis differunt.



5. *APHRODITA FLAVA.*

Rarissimi hujuscce animalis describendi & delineandi copiam Locus na-
humanissime fecit *Celebris apud Amstelodamenses Medicus A. talis.*
SCHLOSSER Soc. Londinensis Sodal. cet. cuius amico erga me fa-
vori hoc insigne generis *Aphroditarum* adcrementum debetur.

Flava cæfarie elegante branchiarum apparatu ornatissima
hæcce species & a nullo, quod sciam, auctore memorata *In-*
dici Oceani incola est. Specimen enim quod *Amiciss. SCHLOS-*
SERUS pro descriptione præbuit, mercatoriæ belgicæ navis, cir-

ca an. 1758. ad Bengalæ oras versantis anchoræ adhærens inventum servatumque fuit. Pauloque minorem *Aphroditam flavam* in *Nobiliss. DN. VAN HOER Senatoris & Poliatri Hagani* postea MUSEO inveni, qui eam, cum marinis aliis, Amboyna missam accepérat.

Adfinitas
& diffini-
tas.

In hac specie squamarum dorsalium, quas in præcedentibus observavimus, vestigium nullum exstat. E contrario adsunt branchiæ perfectissimæ atque prorsus nudæ, quarum in istis speciebus vix rudimentum invenire est. Pedunculi laterales in *Aphrodita flava* minus distincte prominent, nec rigidis setis armati sunt, sed fasciculo magno pilorum tenellorum constant; cirrhum tamen carnosum exhibit, qui etiam dorsalibus penicillis, e similiumpilorum fasciculo factis, adest. Structura tota *Aphrodita nostra* sequentium specierum magis similis est, quam præcedentium squamiferarum; corporis vero proportione inter utrasque medium locum sibi vindicat & omnes ceteroquin sui generis characteres servat. *Antennis* solis cum *Aphrodita aculeata*, & *crista* pone antennas cum *Aphroditis carunculata* & *complanata* infra describendis, conspirat. *Stylos* vero caudales sibi privos habere videtur, saltem nulli notarum specierum similes datos esse observamus.

D E S C R I P T I O

A P H R O D I T A E F L A V A E.

Tab. VIII. fig. 7-II.

Magnitudinem & figuram speciminis Schlofferiani icones nostræ, maxime fig. 7. ad amissim exprimunt. Longitudo hujus $4\frac{1}{2}$ poll. Parisinorum, alterius, quod vidi, circiter $2\frac{1}{2}$ pollicum fuit.

Cor-

Corpus depresso, supra (fig. 7.) convexum, subtus (fig. 8.) planiusculum, totum in segmenta transversa, in lateribus profundius divisa, partitum, sive Erucæ in modum annulosum.

Segmenta in specimine majori quadraginta, in altero triginta tria; convexa maxime versus corporis latèra, in ventre antice rugula veluti aucta, in dorso paulo latiora. Horum 2 priora inferiori parte deficiunt, in aperturam oris rugosam absorpta; tertium, quartumque subtus in medio coadunata os includunt.

Oris apertura (fig. 8. a.) rugosa antice segmentis primis imperfectis quadrilamellata, lamellis 2 mediis longitudinaliter callo notatis. Os patet in *œsophagum* laxum, sacciformem; intra quem apparet apertura ventriculi longitudinalis, bilabiata, medium laminam crassam, ceu linguam, exferens.

Loco peduncularum in hac specie segmenta lateraliter utrinque prominentiora, media transversim oblonga fossula exserunt *fascem* (fig. 8.) compressam, subreflexam *pilorum* tenuissimorum, flavicantium, $4\frac{1}{2}''$. circiter æquantium; una cum *cirrbo* cutaceo, $2\frac{2}{3}''$. circiter longitudine, pilis immixto.

In singulo præterea segmento, ad dorsum utrinque *areola* transversim ovalis, marginata, quasi callosa, flava, *pilos* flavos, longitudine & natura eorum, qui fasces laterales constituunt, at rariores, quaquaversum spargit, penicilli diffusi in modum. Unde latera animalis tota hirsuta apparent (fig. 7.).

Oritur & ex areolarum dorsalium singula, paulo posterius, *cirrus* cutaceus, $5''$. longitudine, inferiori latere vena nigra notatus, dorsoque adclinis.

Branchiæ 37 parium (fig. 7.), in dorso duplii serie dispositæ, singulo segmento (exceptis 3 primis minutis) *binæ*, subsequenti segmento incumbentes.

Quævis *branchia* (fig. 10. 11.) frondi filicis nondum prorsus explicatæ similis est; fruticum nempe sistit triangulum, in plano fere triplicato-pinnatum. Pinnulæ ultimæ subtilissimorum villorum æmulæ, subfuscæ sunt & in latus branchiarum dorso obversum tendunt; unde illud villosum & flocculentum apparet (fig. 11.) ramique principiores minus distincte ab eo latere cernuntur. *Pinnarum* principaliorum a rhachi ortarum interioris lateris infima, in omnibus branchiis, divaricata seu subrecurvata observatur; reliquæ, bis octonæ fere, suboppositæ sunt, earumque tres utrinque inferiores insigniores notantur, reliquæ subito decrescunt.

Magnitudine *branchiæ* usque ad tredecimum par sensim augentur; inde subæquales pergunt, & in 27^{mo}. demum pari decrescunt, ita, ut antepenultimum par primum æquet, tria postrema autem ab eo gradu minuantur.

Segmenta ex iis, quæ, ut dixi, branchiis quidem, at non penicillis pilorum carent, primum & secundum, a dorso ornamentum singulare, ceu *cristulam* (fig. 7. a. fig. 9. b.) sibi adnatam habent. Ea triquetro compressa, superiori margini dupliciter crenulata, infra autem latiori planoque strato, ceu limax pede suo, aucta est, & libero apice tertio segmento arcte incumbit.

Ante hanc *cristulam* *cirrhi* duo (fig. 7. 9. a.) insignes, antenniformes adsunt, ex cirrhis penicillorum dorsalium primi segmenti

ti

ti forte derivandi; quibus hæc species cum *Aphrodita aculeata* convenit.

Caudam speciei nostræ terminat furca (fig. 7, 8. b. b.) ex stylis binis, cylindraceis, obtusis, adproximatis; qualis in nulla præter eam *Aphrodita* occurrit.

Color pilorum totius animalis, uti jam dictum, flavescentes est; qualis Diones comæ tribuitur, unde speciem nostram APHRODITAM *flavam* dixi. Corporis color, fere qualis in cute volæ humanæ, cuius & similes striæ cutem animalis, in ventrali latere toto longitudinales & subflexuofæ, in dorso medio inter branchias obliquæ, arant. Præterea per latus abdominale media stria obsoleta, longitudinalis, & in dorso medio maculæ, singulis segmentis singulæ, lividæ, striarum expertes observantur. Branchiarum rami majores albicant, villi seu extreimi ramuli vero fuscescent.

In specimine, quod descripsi, majore imprimis singularis erat segmentorum noni & decimi conformatio; quæ sinistro latere, oblitterata intersectione unita, simplici tantum fasce seu penicillo pedunculari illo in latere instructa inveni, dum a dorso alteroque ex latere omnia tamen duplia exhiberent. In minori specimine nihil tale vidi.

Singularis etiam visa est branchiarum 14, 15 & 16 lateris dextri, contractio & parvitas. Verum quum verosimile sit in vivo animali has partes contractoria facultate gaudere, qua in *Nereide conchilega* viva branchiæ pollent, prædictas minores comparibus branchias in puncto mortis contractas obriguisse credibile est.

Plura de hac *Aphrodita* addenda non habeo. Ex conformatione oris probabile est eam, uti congenorum plurimæ, ventriculo triturante instructam esse. Dissectio forte notabilia alia detegeret, eam vero in *Museorum* pretiosis speciminibus instaurare nefas.



6. *APHRODITA CARUNCULATA.*

Autores excitati. Hanc certissime speciem SEBA iconē exprimī voluit ea, quæ in *thesauri* vol. II. tab. 81, septimo numero exstat, & quam ejusdem voluminis pag. 31. *Millepeda marinæ amboynensis* nomine recensuit. Eadem igitur est, quæ LINNÆO *Nereis gigantea* dicta fuit, quamque ejusdem nomen specificum, ex Sebana iconē natum, *triplici ordine fasciculorum* instructam esse perperam innuit.

Quum & rudis sit SEBÆ icon, & descriptio bona animalis nullibi exstet, ad illustrandam *Aphroditarum* historiam necessarium esse credidi ut huic defectui succurreretur, ideoque ejus hic accuratam descriptionem, necessariis iconibus illustratam inferere minime superfluum esse duxi.

Locus nat. talis. Speciem nostram ex Indico mari derivat SEBA; nec disporto. Mihi vero Antigua Insula acceptum specimen nuper cum aliis marinis misit *Amicissimus* DRURY *Londinensium Physiophilorum Praes.* Adeoque Maris Americani eam esse civem majori cum fiducia assero. Liberam in mari vivere, uti Aphroditæ reliquæ, ob similitudinem structuræ, probabile est; pilosi penicilli quadruplici serie per corpus dispositi, minime aptum reddunt animal ad subeundas quascunque latebras.

Lon-

Longitudine corporis & gracilitate hæc species , uti sequentes omnes ad *Nereides* accedit. Verum penicillis ventralibus, fasciculis dorsalibus & branchiis per corpus dispositis *Aphroditam* refert , ideoque huic generi inferenda est. Teneritudine & fere colore pilorum in fasciculis æque ac pedunculis, *Aphroditæ flavæ* comparari debet ; refert quoque eandem crista quadam in antico corporis apice desuper adnata. A sequenti specie , cui figura simillima est , imprimis differt cutis lævre & teneritudine , pedunculorum fasciculo , teneriter piloso , cuius loco in sequenti setæ aliquot rigidæ , ut in *Aphroditæ aculeata* , observantur , parvitatem branchiarum , & tandem defectu cirrhorum in pedunculis ventralibus , quibus hæc sola inter congeneres destituitur.

D E S C R I P T I O

A P H R O D I T Æ C A R U N C U L A T Æ.

Tab. VIII. fig. 12, 13.

Longitudinem in uno specimine 9 pollicum , in alio 14 fere pollicum inveni. Summa in posteriori crassities digito fere virili par erat. *Proportio* utriusque iconibus sequentis speciei (*Tab. VIII. fig. 14, 15.*) optime comparabilis esse videbatur.

Corpus tenerum , depresso-quadrangulum , a dorso convexiusculum , subtus stria obsoleta exaratum , in segmenta profunde subdivisum.

Segmenta ultra nonaginta ; in utroque autem specimine caudæ apex aberat.

P. e.

Pedunculorum loco in singulo segmento ad ventrale latus *papilla* utrinque transversalis, *penicillum* sustinens compressum, e pilis teneris, flavescentibus factum (fig. 13.).

Ad dorsum (fig. 14.) in singulo segmento utrinque *penicillus* similium pilorum alius, ruga annulari cinctus, intra quam postice simul oritur *villus* subulatus, carneus, five *cirrhus*; quem in penicillis *ventralibus* frustra quæsivi. Penicilli *dorsales* non in seriem rectam positi sunt, sed alterni ventralibus penicillis paucio propiores aberrant; quod singulare.

Branchia ad penicillos dorsales singulæ, sessiles, ramosissimæ, tophulo postice penicillis accubant, ramulumque pectinatum versus latus demittunt (fig. 12.).

Os in quarto segmento subtus in aperturam rotundam corrugatum (fig. 13.), in quam confluunt *segmenta* priora, subtus deficientia, interque hæc media *stria*, bilabiata, apice prominens *cirrbis* tribus, quorum medius longior (fig. 12.).

Pone *cirrbos* istos a dorso, usque ad segmentum quartum, adnata est *caruncula* seu *corpusculum* ovale (fig. 12.), depresso, ab utroque latere oblique lamellosum, lamellis subseptenis, crispulis. Idque cristulæ in præcedente pariter ac proxime describenda specie observatæ succedaneum est. Hocce corpusculum SEBÆ quoque iconæ distincte exhibitum est.

Color totius animalis vivi gryseo albus fuisse videtur. *Cutis* tenera est, lævis, epidermide tenui, iridescente albida, obducta, subtusque teneris striis arata.

A N A T O M E.

Solum *ventriculum* structuræ elegantia notatu dignissimum, cum intestini portione, in specimine quod secare licuit, integrum inveni.

Fuit *is* carnosus, gibbus, cordis humani inversi fere similis, subter, versus posteriora, adnatus, antice oesophago adpensus.

Oesophagus e carnosa membrana erat factus, infundibuliformis, intus subvillosum & versus os externum in rugulas exiles, longitudinales contractus.

Intra oesophagum pars carnosa, crassa *ventriculi* prominet area cordato-ovali; anterius hiatu exferens orificium papillare, callosum quasi & rugis intersectum.

Ab orificio *cavitas* partis carnosæ ventriculi incipit compressa, plicis grossioribus tunicae internæ callosæ exarata, sinuosa, lobuloque ab inferiore parte ventriculi adsurgente bipartita & fere oppleta.

Pars hæc carnosior ventriculi postice oblique detruncata exhibet plicas binas, crassas, internum cavitatis prædictæ hiatum coronantes, plicisque secundum earundem directionem decurrentibus, subparallelis, argute striatas. Harum interior lobulo plano versus os ventriculi descendit; exterior crassior, libera intra partem ventriculi infundibuliformem prominet.

Infundibulum ventriculi ex membrana carnosa factum, laxum, intus subvillosum & versus pylorum longitudinaliter porcatum est.

O

Py-

Pylorus deorsum spectans, crassis labiis intra intestinum prominet.

Intestinum laxum, subanfractuosum, sub pyloro sinu cœco antrorum procurrit. Appendices nullæ, quod etiam in sequentibus obtinere crediderim.

Truncus nerveus est stria alba gemina, sub canali alimentario inter musculos longitudinaliter decurrens, filo crassior, in *ganglion* obsoletum ad singulum corporis segmentum connata, quæque ex quolibet ganglio utrinque nervum rectum emittit.



7. *APHRODITA ROSTRATA.*

Locus nat- Curiosissimi hujus animalis specimen pro descriptione benign-
talis. ter obtulit supra jam laudatus Dn. van HOEY, maximumque
nuper aliud in *Museum SERENISSIMI PRINCIPIS AURIACI* de-
latum est.

In ultimo Orientis Oceano habitat, & *Amboyna* maxime adfertur. An vero in mari libera vivat, an vero ullo modo deliteat, de hac non magis quam de præcedentibus adfirmaverim. Prius tamen verosimilius videtur, quum inter pisciculos Amboynenses mitti soleat, cum iisdem forte capta. Tubulum certe proprium colere eam & corporis figura & organorum dispositio dissuadent.

Affinitas & diffini- Differt hæc species a præcedenti, quacum insignem formæ
tas. generalis analogiam prodit, maxime adspicere primum corii ru-
dioris, crassioris & inæqualis; dein pedunculorum lateralium
pro-

prominentia, & quod iidem cirrho non destituti sint ut in illa, nec mollium pilorum penicillo, sed fasciculo setarum rigidarum terminentur; tandemque magnitudine branchiarum insigni, & minutiis præterea plurimis.

D E S C R I P T I O

A P H R O D I T Æ R O S T R A T Æ.

Tab. VIII. fig. 14-18.

Specimen quod descriptioni & iconismis adornandis inferuit *œdo pollices* mensuræ Parisinæ æquavit. Summa latitudo erat semipollicaris, & crassities 4''. At in majorem excrescere magnitudinem *Aphroditam* hanc nostram, docuit exemplum *Musei PRINCIPIS*, pedali majus quodque pollicem fere virilem corporis crassiori extremitate æquat.

Corpus tetraëdrum, depresso sculum, subplanilaterum, (nisi quod a dorso (fig. 14.) convexiusculum sit,) antice obtusum, ante medium longitudinis primo lentius, sensimque magis attenuatum, totum annulosum, seu in segmenta distincta partitum.

Segmenta (fig. 17. d.) perfecta in minori specimine adsunt 66, in majori tantum 55. Horum majora quæ medium corporis & anteriora efficiunt, reliqua cum crassitie corporis retrorsum sensim minuantur, prout in animalibus marinis annulosis vulgo obtinet (fig. 14, 15.).

Pedunculi (fig. 17. c.) papilliformes sunt, rugosi, retusi, terminati

minati fasciculo (fig. 17. f.) ex *setis* aliquot crassis, rigidissimis, fusco-aureolis, inæqualibus, ad summum octonis; subtus vero *notati mucrone carnoſo* (fig. 17. e.), subulato, curvulo, qui pedem unguiculatum Erucæ forma fere refert.

Penicilli ad dorsum (fig. 16, 17. b.) recta utrinque serie adstant cylindrici, conferti, e *pilis* tenuibus, rigidulis, ferrugineofuscescentibus, cincti ruga cutis annulari, intra quam posterius simul oritur *villus* carneus rectus, subulatus, in penicillo latens.

Branchiæ (fig. 16, 17. a.) ad penicillos dorsales postice sessiles & trunculo perbrevi iisdem circumflexæ. E trunco branchiæ rami uno versu circiter seni, subparallelæ, inæquales (fig. 16. a.) sursum subdivisi in infinitum, ut ex ramulis terminalibus confertis oriatur extus (fig. 17. a.) tophus fuscus, villosus, cotyledonem in secundinis ruminantium referens.

Branchiarum adparatus elegantissimus, in posteriori corporis extremitate non proportione decrescit; hinc postica segmenta a dorso fere tota obtegunt geminæ branchiæ. Penicilli quoque dorsales in posticis segmentis justa proportione majores sunt.

In specimine minori caudæ acute adtenuata extremitas (fig. 14, 15. b.) sex articulorum, argute (&, uti videtur, naturaliter) in dorsum reflexa est. *Anus* in apice caudæ a dorso situs, apertura est bilabiata, exigua (fig. 18. a.).

Os in antica extremitate subtus rugose contractum, *segmenta* bina anterius *accessoria* absorbet. Hæc accessoria segmenta ad dorsum penicillis minutis cum insigniori cirrho, itemque pedunculis vix setigeris, at carneo mucrone solito majore conspicuis in-

instructa, utrinque adjacent *palato* quasi elongato, stria longitudinali bipartito, antrorsum prominulo & *cirrhis* rostrato.

Cirrhi carnei subulati, inferne minor utrinque unus; desuper terni, quorum impar crassus, laterales longiores (fig. 14. a.).

Cutis animalis coriacea, in latere ventrali striis longitudinalibus, subinterruptis, quasi callosis, in lateribus rugulis itidem longitudinalibus, in dorso transversis, obsoletis inæqualis. *Color* ex gryseo-fusco lividus, at in recenti forte diversus. *Cuticula* a corpore separabilis, fusco-lutea & mucosa est. *Anatomam* speciminum raritas tentare prohibuit.



9. *APHRODITA COMPLANATA*.

Hanc speciem describendam primo præbuit *Celeberr. GRONOVUS*, a JACQUINO ex Cariæ Insulis adlatam. Eandem postea ipse *Antigua* Insula mislam accepi & quamvis non prorsus incognitam, ad seriem tamen Aphroditarum complendam hic addere consultum duxi, præsertim cum accuratiori ejus descriptione adhucdum careamus.

Satis elegans *Aphroditæ nostræ*, ob depresso corporis figuram, *complanata* nomine distinguendæ, icon exstat apud BROWNIUM (*natural hist. of Jamayca* tab. 39. f. 1.) qui eam (*l. c.* p. 395.) *Nereidem tentaculis capitinis binis tripartitis*, corporis pluribus, penicilliformibus, dupli serie ad latera positis vocavit & inaudito errore pro *Teredine* naves exedente habuit; idque

eam credo ob causam, quod in vacuis Teredinum canalibus interdum hospitari soleat.

Icon PETIVERI a BROWNIO citata, in *Gazophylacii* exemplari, quod ad manus est, deficit; hinc, non determino an hoc vere pertineat. BROWNII vero huc facientem iconem LINNÆUS *Nereidi* suæ *cœruleæ*, quam descriptiones ejus & SEBÆ citata figura longe aliam speciem esse docent, male applicavit.

Differen-
tiae. Ultimo loco hic recensenda hæcce nostra species, *Nereidibus* vicina & *affinis*, reliquas omnes vincit segmentorum numero; eorundemque parvitate, ut & depresso corporis figura, singularis est. Peduncularum atque branchiarum constitutione proxime accedit ad *Aphroditam carunculatam*; cristulæ tamen supra os minutæ forma *Aphroditam flavam* potius æmulatur, quacum ceteroquin parum similitudinis habet.

D E S C R I P T I O

A P H R O D I T Æ C O M P L A N A T Æ.

Tab. VIII. fig. 19-26.

Corpus lineare, utrinque subadtnuatum, (insignius postice,) depresso, annulosum & dupli utrinque penicillorum serie ciliatum (*Tab. VIII. fig. 19. a dorso, fig. 20. subtus.*)

Segmenta corporis angusta, (*fig. 23. subtus, 24. a latere & dorso*) 130 fere sunt, quorum quatuor prima subtus in oris rugosam aperturam (*fig. 22.*) absorbentur, proxima duo subtus co-adunata

adunata os includunt. Segmenta inter quinquagesimum & septuagesimum fere subæqualia sunt, versus extremitates corporis sensim decrescunt.

Pedunculorum loco verrucæ utrinque papilliformes, exferentes penicillum (fig. 23. aa. 24. a.) tenuiorem & rariusculum, pilorum gryseo canescens vel subcinereorum; simulque villum carnosum, crassiusculum, subulatum, penicillo breviorem.

Segmentis prioribus hicce cirrus sensim fit crassior, at penicillus exilior; imo tribus primis penicilli & ventrales & dorsales prorsus absunt: at non cirri.

A dorso singulo segmento utrinque *tuber* inæquale, extimoque *verruca* crassior, e qua *fasciculus* (fig. 24. b.b.) pilorum ventralibus similius, aut forte paulo teneriorum, insignior, subreflexus, simulque *villus* carnosus exilior, brevis, subulatus, in fasciculo latens, at in tribus primis segmentis, deficiente fasciculo piloso, nudus.

Fasciculi dorsales versus posteriora proportione segmentorum crescunt, quod non in ventralibus.

Branchiola (fig. 24. c.) inde a tertio segmento, pone quemlibet dorsalium fasciculorum, minuta, carnosa basi sessilis, filamentis ramosa, & fasciculo postice versus dorsum accubans. Primorum segmentorum branchiæ minores sequentibus, eoque diversæ, quod portiunctula versus latus producantur.

Inter segmenta priora in oris aperturam rugosam absorpta, *palatum* producitur linguiforme, *cirrbis* 2 apicis & utrinque ad apicem minuto quadricorne.

A

A dorso *cristula* adest carnosa, obtusa, tota longitudinaliter adnata, per segmenta tria prima extensa (fig. 21.)


Ani orificium tumidiusculum, in cauda (fig. 25, 26.) terminale.

Color liquore servati animalis sordide gryseo-fuscescens, a superfite cuticula albida iridis passim coloribus relucet. Naturalis color verosimillime gryseo-albidus fuit.

A N A T O M I C A.

Ventriculus carnosus, teretusculus, brevis. *Intestinum* compressum, in rugulas crispatum, dorsoque & ventri longitudinaliter adnatum, ut quasi septum longitudinale constitut, ad cuius utrinque latera, per medium maximamque corporis partem abundant *ovula* in massam longitudinalem congesta.





I X.

N E R E I D E S.

OCEANI Nymphis olim proprium Nomen, Ver- Nereidum genus.
mum marinorum elegantissimæ familiæ commune
esse voluit *Ill. LINNÆUS*, adpellavitque *Nereides*,
animalcula linearia, annulosa, utrinque tentaculis pe-
dunculata & quasi pinnata. Optime vero conditum genus *Vir-*
illustris minus curiose redegit. Namque *Aphroditarum* longioris
figuræ quasdam species, supra descriptas (*Aphroditas* v. gr. *carun-*
culatam & *complanatam*) ad *Nereides* retulit; tubulicolas vero
Nereides, quæ, vel in proprium genus contrahendæ vel *Ne-*
reidibus relinquendæ sunt, passim alienis generibus inseruit.

NEREIDES nempe mihi hucusque cognitæ in duas maxime Divisio-
phalanges discedunt, quæ plus uno respectu discrepant. De
singulis seorsim dicam.

Nereides vagæ partim liberæ inter Fucos aliasve plantas va- Nereides
gantur, & circumnatant, aut reptant, partim in scopulorum *vagæ*
rimis, intraque maris fundum, vel ligna in mare abjecta putri-
da latent.

His in genere *corpus* observamus gracile, plerumque longif-
simum, lineare, attamen inde a *capite*, *cirrbis* antennulato, sen-
P sim

sim adtenuatum, in *segmenta annulosve divisum, pedunculisque singulo segmento utrinque singulis, quasi pinnatum.* Lumborum more terrestrium, hæ Nereides corpus in magnam longitudinem extendunt & pro lubitu contrahunt, per angustissimas rimas exili corpore facile gliscunt, minimasque aperturas pertranseunt. Ab *Aphroditis longioribus* maxime dissident eo, quod branchiarum, quas in Aphroditis per totum corpus dispositas descripsimus, apparatu prorsus careant. Ceteris stru*ræ* momentis extremas species Nereidum atque Aphroditarum ita assimiles Natura reddidit, ut judicio opus sit ad statuendos limites; maxime cum etiam a *branchiarum praesentia vel absentiâ* petitum criterium, non semper constet, adeoque ad habitum externum confugere & comparando, atque affinitates & gradationes ponderando, in deducendis speciebus procedere fæpe cogamur.

Ex hac *phalange* complures species in proximo Fasciculo Miscellaneorum describam, ubi simul earum quæ notæ sunt enumeratio & synonymia dabitur; Etenim aliquæ apud auctores jam paßim occurrunt, *Scolopendre marinae* vocitari solitæ. Quædam & in aquis dulcibus vivunt minutæ, quarum *Eximus* imprimis ROESEL Icones reliquit & paßim alii.

Nereides tubulicole. Altera phalanx est *Nereidum tubulicolarum*, quæ ad *Serpulas* quasi ducere videntur; insigniter tamen ab iis differunt, prout infra prolixius exponetur; numeroque & figura partium *Nereidibus vagis* similiores sunt.

Nihilo secius ab his quoque removeri & in novum genus redigi posse videntur, eodem fere jure, ac *Aphroditas* pro distinto genere tradimus. Aliqua enim propria & priva sibi habent, quæ pro generico charactere sufficerent. Breviori neme
pe

pe corpore plerumque sunt, latentque intra *tubum* quem ex heterogeneis variis compilant. Eo *caput* exserunt, quod, præter *cirrhos*, ad normam *Serpularum*, *branchiis* aliquot elegantissimis ornatum est; quum Aphroditis eadem numerosiores per singula segmenta distributæ sint, *Nereidibus vagis* autem prorsus denegatæ.

Interim tamen satius erit easdem inter Nereides recensere, quam novum nomen effingere; sufficietque affinitates & diversitates earum indicasse ne in posterum dubitandi locus sit.

Ad *Nereides nostras tubulicolas*, (tubulis suis minus addi-
ctas (a) atque adaptatas, quam sunt *Serpulæ*,) præter descri-
bendas statim species referri debet *Serpula Penicillus* (b) LIN-
NÆI (*syst. nat. ed. X.* p. 788. *sp. 702.*) & *Tubipora arenosa* (c).
ejusdem (*ibid. p. 790. n. o.*) neque non *Teredo lapidaria* (d)
(*ibid. p. 651. sp. 2.*)

Ex his *Teredo LINNÆI* nobis *NEREIS lapidaria* dicta, quantum cum *Nereide conchilega* statim describenda analogiam prodat, quantum-

(a) PLANCUS de specie quadam Nereidis, quam in *Alcyonii* cavernis obser-
vaverat DONATI, monet eam in prima ætate tubulum incolere, adultam vero
vagari; & in scopulorum rimis & secessibus, aliisque locis nudam reperiri, (*De
conch. min. not. Ed. II. append. p. 119.*)

(b) RONDELET. *de Zooph.* p. 111. *Penicillys marinus.* ELLIS. *cor. p. 92. t. 34.*
Corallina tubularia melitenis. BÄSTER. *opusci. subsec. vol. I. l. 2. p. 77. t. 9. f. 1.*
A, B. Scolopendra marina, tubularia.

(c) REAUMUR. *aet. gall. 1711.* p. 129. t. 2. f. 17-17. opt. BAKER *micrograph.*
part. II. c. 17. t. 13. f. 2, 3. ELLIS *cor. p. 90. t. 36.* *Tubularia arenosa anglica.*

(d) KÄHLER. *aet. hólmi. ed. 1754.* *ed. german. p. 143. t. 3. f. A-F.*

tumque a *Teredinis navalis* natura & fabrica etiam generali distet, nemo est qui non ex descriptionibus Nereidis conchilegæ nostra, *Teredinis lapidariæ Kaebleriana* & *Teredinis navalis Adansoniana*, comparatis illico perspicere possit.

Tubipora arenosa, quam bene NEREIDEM *tophigenam* vocaveris, cum gregaria in mari vivat, confertis & coacervatis tubulis efficit massas ex arena & concharum fragmentis conglutinatas ; quæ LINNÆO ansam dederunt eandem ad *Tubiporas* referendi. Veram tamen Nereidem secundæ phalangis esse ex adfinitate ejus cum statim describenda *Nereide cylindraria* liquet ; quamquam singularis videri debeat ob capitis structuram.

Nereis
qua Ser-
pula pe-
nicillus
Linnæi.


SERPULA PENICILLUS tandem, destituta cucullo & tuba, quæ infra Serpulis proprios characteres esse videbimus, corpore vere Nereis est, & organa plumaceo pectinata , quæ in anteriore extremitate gerit, non pro tentaculis aut brachiis, sed pro branchiis obtinuisse videtur. Hujus in vitro aqua marina pleno vivæ iconem in *Tabula IX. fig. 1.* adjeci , qualem Curassoa, cum *Serpula gigantea* brevi historia acceptam communicavit CELEBERRIMUS GAUBIUS.

Hæc quam, ob tubi materiam argillaceam vel lutosam, NEREIDEM *lutariam* adpellare posses, in universi fere orbis Oceano reperitur. Ex *Mari* quippe *Mediterraneo* eam RONDELETIUS & ELLSIUS habuere ; Ex *Mari septentrionali* BASTERUS accepit, & mihi quoque nuper in testaceis ad Cornubiam suscepit occurrit ; Ex *Indico oceano* adlatam in Museis vidi. Tandemque circa *Curassoa* inter Fucos & arbusta marina , in lutosis maris tractibus frequentem esse , qui iconem prædictam Cel. GAUBIO misit olim, DOERFELIUS simul retulit. Ex ejusdem relatione constat *Nereides lutarias* Septembri & Octobri maxi-

maxime vigere & pulcherrimas esse, tumque ova sua deponere,
e quibus Novembri pullities nascatur.

Tubos longissimos ex luto conficit ista species, intus membra cornea obductos, per totam longitudinem cylindricos & plerumque liberos, *ima tantum portione testis aliisve corporibus longitudinaliter adglutinatos*; quod imprimis monendum est, cum excepto RONDELETIO auctores omnes de modo quo in mari hujus Nereidis tubuli affixi sint, dubitent.

Adjicio hæc ad complendam historiam animalculi jam satis, optimeque ab ELLISIO & BASTERO descripti. Et eodem animo ejus in aqua marina *vivi* imaginem, qualis nondum exstat, æri incidi curavi. Curiosius de binis aliis animalculis ad Nereidum secundam phalangem referendis, elegantissimis nunc agam.



I. NEREIS CYLINDRARIA.

Pulcherrimæ hujus Nereidis binas, ut puto, varietates, magnitudine fere tantum & tubi maxime materia diversas describam, numero, figura & proportione vero partium simillimas, adeoque specie non bene distinguendas; quarum altera *Maris Europæi* incola est, altera *Promontorio Benæ Spei* mitti solet. Ab hac, utpote majori, incipiam; cuius si accuratam descriptionem dedero, eadem alteri, facta magnitudinis concessione, illustrandæ inserviet.

a. V A R I E T A S C A P E N S I S.

Tab. VIII. fig. 1, 2.

Giganteæ hujuscæ varietatis plurima specimina Promontorio Bonæ Spei missa præterlapso anno accepit Clariss. A. VOSMAER Museo SERENISSIMI PRINCIPIS AURIACI præfetus cet., qui eorum aliqua mihi, pro humanitate sua, describenda concessit. In aliis quoque Orientalis Oceani tractibus reperiri e tuborum fragmentis inter Conchylia subinde adlatis concludo. Videturque RUMPHIUS (*Mus. Amboyn. ed. belg. p. 120. n. 4.*) sub *Penicilli marini tertia* specie, hanc nostram Nereidem Capensem intellexisse.

Tubi de-
scriptio
fig. 2.

TUBUS (fig. 2.), quo continetur, sæpe quincuncialis occurrit, tantusque is est quem coram habeo. Sectiones ejus perfectissime circulares sunt; figura ab anteriori extremitate ad alteram, ubi abrupte definit, ita adtenuata, ut lumen a diametro $7\frac{2}{3}''$. ad $3\frac{1}{4}''$. decrescat. Constat tubus e lamina grossioris chartæ crassitie, quæ ex fibrarum circularium fragmentis invicem superstratis coalita videtur, ex cinereoque albi est coloris, sicca albidior fragiliorque. Aceto macerata, deposita fragilitate, mollescit & lenta evadit. Candelæ vel alcoholis flammæ admota illico nigrescit, crepitat, cornu combusti odorem spargit, & fibrillatim diffilit in particulas s. *aciculas* subtilissimas, albantes, incombustibiles, duras, figura lineares, utrinque truncatas.

Harum particularum homogeneitas & combustibilis tubi portionis indeoles animalis docent, substantiam tubi non foris advenire, sed ab animali ipso suppeditari, æque ac miculæ hexaëdræ in tubo Brachioni a SCHÆFERO descripti (*Blumenpolypen der süßen Waffer. Regensp. 1755. 4o. c. fig.*)

Sed

Sed videamus animal ipsum elegantissimi hujus tubi auctorem & incolam. In quo describendo promiscue icones Belgicæ & Indicæ varietatis ad illustranda verba adhibebo.

D E S C R I P T I O

Corporis (fig. 1.) forma cylindracea paulo depresso, versus posteriora sensim adtenuata est. *Dorsum* (fig. 5.) semicylindrica fere convexitate turget, totum læve, subtilissimeque transversim striatum; *ventrale* latus (fig. 1. b, 4.) minus convexum, transversimque rugosum. Per *latera* (fig. 1.) decurrit *fimbria* crassa, quæ obtuse nodosa videtur, vere autem transversim fissilis, & per *pedunculos* statim describendos hinc inde intercepta est.

Caput (fig. 7, 8, 9.) crassissimam & carnosissimam animalis partem antice terminat. Maxime insignes in eo sunt *palmulæ* binæ (fig. 1, 2; 7, 8, 9. a.) rotundatae, factæ ex *paleolis* seu aciculis planis, auratis, linearí-acutis, interioribus in qualibet palmula sensim minoribus & angustioribus, exterioribus pariter decrescentibus, at latioribus; omnibus versus dorsum leviter recurvatis. Hæ paleolæ ita carnoſo capiti implantatae sunt, ut imbricatim (instar remigum in ala avis) exterioreſ interiorebus super-adcubent.

Pone palmulas in Capensi varietate a dorsali latere tantum adest *zona* crassa transversa, subrugosa, (fig. 1. F.); in Belgica vero Nereïde, ut infra dicetur, *area* concava, marginata (fig. 5; 8, 9. f.), lævis.

Sub palmulis *limbus* semicircularis, ciliato-lacerus, (fig. 8, 9.
A.)

A.) expansus est, & ambit aream tumidulam (*fig. 7.*), in cuius medio hiat *os animalis*, labio rotundo in quibusdam expansionem, & utrinque stipatum & occultatum agmine oblongo *cirrhorum* (*fig. 7, 8, 9. d.*) filiformium, inaequalium, contratorum.

Utrinque ad palmulas e latere capitis protenditur *cirrus* (*fig. 1, 7, 8, 9. bb.*) setaceus, membranaceus. Hi antennularum munere fungi videntur, adeoque *antennulae anteriores*, vocari possent, duo enim alii paulo posterius adsunt (*figg. citt. cc.*).

Capiti a ventrali latere (dorsale enim totum uniforme est,) succedunt *segmenta tria* prominentissima & carnositate duriuscula, quae in Capensi Nereide (*fig. 1. f.*) prorsus se habent, ut eadem ex varietate belgica *Tabulae nostrae figura quarta* distinctius exprimit. Tubere in medio prominente inter se convenient, sinibusque inter tubera coecis profundiusculis & fulco discreta sunt.

Horum segmentorum *primum* utrinque ad dorsum exserit *cirrum* antennis anterioribus tertia fere parte breviorem, seu *antennulas posteriores* (*fig. 1, 7, 8, 9. cc.*).

Secundum segmentum utrinque ad dorsum auctum est callo albo, molli; *tertium* vero a medio tubere utrinque adsurgit in eminentiam subcartilagineam, obliquam, compressam. His segmentis a latere insident branchiae.

Branchiarum duo sunt paria, quae ambo structura piscium aut potius astacorum branchias emulantur (*fig. 1, 5, 6, 7. ee.*). Carnosae sunt, falciformes, basi adnatæ, parte libera lateraliter dorso adclines, *lamellis* secundis, confertis antrorum pedicinæ;

tæ. Lamellæ in prioribus branchiis numerosiores sunt, in singulis centenis plures, versus apicem liberum branchiæ sensim minoræ, unde hæ falcatæ & acutæ evadunt. In prioribus branchiis lamellæ angustissimæ, subtriangulæ sunt; in posterioribus, quæ contractiores magisque curvatæ, lamellæ latiores atque semiovatæ.

Post segmenta branchialia sequuntur duo (fig. 1. g.) angustiora, minusque tuberosa, ad latus terminata papilla crassa, aliquot paleolis aureis armata.

Reliqua ventralis lateris pars transversim rugosa & rugulis insignioribus in quatuordecim *segmenta* obsoletius partita est; quibus respondent *pedunculi* totidem, fimbriæ laterum papillari interjecti.

Primum e quatuordecim segmentis pedunculo papilliformi utrinque proxime præcedentia æmulatur. Reliquorum *pedunculi* constant *fasciculo paleolarum* auratarum, ad dorsum reclinato, piano, inclusoque vagina carnea, quæ basi tuberculo molli notata & longitudinaliter subtus aucta est *lobulo singulari*, carnosø, piano, marginato & aliqualiter referente extremitatem lunatam pedis ventralis Erucæ.

Pedunculi sex priorum parum subæquales, at sensim magis distantes, reliqui subæquidistantes crescunt. Paleolæ s. aciculæ auratæ singulo ad summum novenæ, postremo pari minutissimo nullæ.

Lobuli, *fimbriam* laterum *papillarem* constituentes, interjecti pedunculis prioribus quinis singuli, reliquis terni, quaterni, seni, octoni; pone ultimum pedunculum nulli. Inter pe-

Q dun-

dunculos posteriores subæquidistantes, uti numerosiores, ita minores sensim lobuli evadunt.

Terminus corporis truncati subcallosus, auctusque est *appendice* (fig. I. b; 10, II. a) scaphoidea, quæ subtus (fig. II.) convexa & sulcis ramosis venosa, supra (fig. 10.) subexcavata, margines crassos crenata, ligula rotundata, deflexa terminatur. Hujus scaphæ crenæ marginales corpori proximæ utrinque binæ, singulæ intus notatae sunt stylo minutissimo, linearí, carnoſo, procumbente. In hanc scapham *ani* apertura quasi effusa patet, defuper munita linea aureodenticulata, obtus-angula, & a latere utrinque denticulo carnoſo.

ANATOME in speciminibus Varietatis Indicæ, utpote liquore diu maceratis, distincti nihil patefecit. Intestini portionem posteriorem repletissimam deprehendi fabulo albo, calcareo, quem in mari Indico & Americano corallia & testacea comminuta suppeditant. *Epidermis* facile secedens, albicanti-pellucida, iridis coloribus nitida, in hac sola splendorem vivi animalis, in Belgica quoque varietate observabilem, residere docuit.

B. V A R I E T A S B E L G I C A.

Tab. VIII. fig. 3-13.

Venio nunc ad elegantissimi Animalculi varietatem aliquoties minorem, & Europæi maris incolam.

Hæc *Nereidis cylindrariae* varietas apud KLEINIUM a SCHEUCHZERO leviter descripta & delineata occurrit (*Klein. echinodermat. p. 62. not. tab. 33. A. B.*), ejusdemque tubus ali-

bi

bi quoque ab eodem proponitur *Solenis fragilis* nomine (*Klein. tubul. marin. p. 7. n. 2. tab. 1. f. 5.*)

Tubos istos vix non toto anno fluctus in occidentalem Hollandiæ oram copiose egestant, maxime ubi Favoniæ tempestates, imas fundi arenas cientes, graviora quælibet in Mari sidentia everrunt. Tunc haud raro viva in his tubis animalia legere datur, variæ & eodem anni tempore diversissimæ magnitudinis, magnoque sæpe numero. Distinguas facile tubos animal continentes a vacuis, ex colore rubicundo translucentis animalis. Et hoc bene norunt *Corvi*, qui, littori belgico omni tempestate fidelissimi, æstu recedente præter *Asterias rubentes*, *Tellinas*, *Cancros*, & *Lumbricos echiueros*, imprimis Nereidem hanc nostram magna aviditate colligunt.

Reperitur quoque non raro Nereis nostra inter *Squillas* quæ retibus densis, maris fundum verrentibus conquiri solent. Et cum ob elegantem formam & frequentiam non potuerint pisca torum oculos non adlicere, ab iis, nomen belgicum *Tubos arenaceos* significans (*Zandkookers*) acceperunt.

In universo mari Germanico *Nereidem cylindrariam* habitare credibile est, cum referente mihi *Dottissimo BRÜNNICH* in Insula *Fanoe* Cimbriæ vicina quoque reperiatur. Solitariam autem vivere ex perfecta forma & constanti simplicitate tuborum patet; cum alias ad instar supra (p. 116.) memoratæ *Nereidis topigenæ* in massas concrescere debere videatur.

TUBI Nereidis nostræ confecti sunt ex communi & subtili litoris belgici arena versicolore, plerumque tamen maximam partem homogenea, raro exilibus testaceorum miculis intermixta. Figura & proportio Capenses tubulos referunt; magnitu-

dine vero nunquam 2 $\frac{1}{2}$ pollices excedunt. Per exiguos interdum reperias ex tenerrimo arenæ flore confectos.

Constant tubi ex simplicissimo *arenularum* subæqualium, contiguarum & confertissimarum strato, interfuso glutine quodam animali conferruminato, & interius eodem glutine, non obducto quidem, sed æquato seu lævigate. In adultis subinde reperitur membrana tenuis, lutescens, e glutine quasi orta, in aqua mollescens; quam in maximis tubis interdum insignem, obscure luteam & ab arenaceo strato facile abscedentem deprehendi.

Gluten arenulas continens a spiritu vini & aceto destillato non magis, quam ab aqua, mutatur; siccatione fit fragilius; in spiritu ammoniacali vero aliquot horis maceratus fere solvitur. Alcoholis flammæ admoti tubi, cornu combustum fortiter olen; & glutine in carbonem aterrimum mutato, arenulæ levissimo adflatu dilabuntur.

Credibile est Nereidem nostram statim ubi ex ovulo nascitur in arenosum maris fundum perpendiculariter se se insinuare, & exfudante glutine arenulas corpori contiguas in tubulum conferruminare; succrescente vero corpore ex adcumulata circa extremitatem arena tubum successive augere. Tenera tuborum initia, quum hi, diruentibus circumfusam arenam fluctibus, loco suo nativo exturbantur, diffringi, adeoque tubos semper postica angustiori extremitate truncos reperiri necesse est.

Hæc probat primo tubi figura; deinde tubi nonnulli, quos in ampliori extremitate Tubularia muscoide circumcirca horrentes subinde inveni, quosque tubulorum polypiferorum, seges, ex fabulo aliqua parte prominentes, obduxisse videtur; in

in projectis enim tubis non sic æqualiter in omne latus excrescere ea potuisset.

Probant id etiam experimenta cum viva Nereide cylindraria instituenda. Si enim horizontali situ tubos in aqua marina reponas; animalia angustiori tubi extremitate magna vi egredi conantur, eidemque se se incuneant, ut liberari sine fractura tubi non possint. Contra si perpendiculari situ tubos in arena defixeris & aquam marinam superfundas, animalia tranquilla & naturales, ut videtur, solitosque motus exercentia observabis; argumento hunc potius naturalem eorundem in mari esse situm.

Hoc ergo situ composita animalia sæpius per biduum domi, in phialis aqua marina repletis, viva observavi. Solent tunc intra tubum, quo, viva contractaque vitali elatere, multo breviora sunt, continuo moveri, subinde descendere, plerumque tamen in superiori tubi parte hærere, exsertis tantum quatuor antennulis, palmulisque & cirrhis capitis ultra tubi oram dependentibus; quod *figura nostra tertia* optime exprimit. Hos ori circumjectos cirrhos tunc variæ longitudinis, & apice crassiusculos esse apparet. Pro lubitu extendit & quaquaversum movet eos animal, aut prorsus contrahit. Ea est eorum indoles, ut corporibus, quæ tangunt, uti polyporum brachia, facile adhærescant.

Circum axin etiam intra tubum circumvolvit sæpe animal, & si inferior tubi pars fabulo oppleta sit, hunc undulatorio quodam motu sursum egerit. Aqua intra tubum contenta leviter glutinosa fieri mihi videbatur.

Si tubum ampliori orificio deorsum directo fortiter succutias,

facile elabitur animal. Vehementi tunc agitatur motu; contrahit, extendit, vermiculatim movet, in dorsale latus recurvat corpus; pedunculos simul leviter motitat. Appendiculam cæudæ semper immobilem fere & versus ventrale latus inclinatum gerit, prout *figura 5 & 6.* expressum est, eandem tamen levissime alternatim explanat & carinat. Branchias fere continuo & pro lubitu movet; nunc elongatas in rectitudinem exporrigens, nunc breviores reddens atque intensius curvans; interdum & extrorsum easdem revolvens, maxime posteriorem. Antennulas quoque dirigit & curvat in omne latus, maxime antrorsum.

In acidum, spirituosumve liquorem conjectum vivum animal convellitur & in dorsale latus curvatum illico moritur, vi nempe dorsalis musculi præpollente. Hunc statum & lateralium animalis partium simul plenissimum adspicuum sistit *figura nostra sexta.* Ex levissima aquæ marinæ corruptione, & elemento naturali exemptum aut in aqua dulci servatum moritur quoque, sed laxatis musculis, flaccidoque corpore, quale illud *figuræ 4 & 5* exprimit.

D E S C R I P T I O

NEREIS *cylindraria Belgica* structura externa fere tota similis est *varietati* mox descriptæ *Capensi.* Differt autem *impri-*
mis magnitudine, triplo enim minor est; *deinde* capitis figura.
Belgica nempe varietas antice quasi oblique truncata, faciem
obliquam exhibet semi-discoideam, cavulam, acute marginatam
(*fig. 8, 9. ff.*), quæ cum palmulis discum perficientibus exac-
te opplet tubi lumen, cui se se adaptat modulumque quasi præ-
bere videtur, circa quem arenulæ glutinantur quique formam
exakte cylindricam tubo conciliat; præfertim cum circa hanc
quoque carnosam animalis partem exsudare videatur gluten,
quod

quod arenulas compingit, nisi illud ex ipso ore animalis derivare mavelis. In Capensi contra Nereide palmulæ capitis magis versus dorsum arrestæ sunt, & concavæ planitiei loco, ut supra jam monui, tantummodo adest rugosum vestigium; quod soli contractioni moribundi animalis attribui nequit, cum talem formam belgicæ Nereis, etiamsi convulsa in aceto moriatur, nunquam induat.

Tertia & insignior differentia Belgicæ Nereidis in extremitate corporis magis elongata, accessorio quoque, pone ultimum pedunculum, callo instructa, & in appendicis scaphoideæ figura elegantiori & breviori consistit. An hæc pro distinguenda specie sufficient haud dixerim; magnum pro distinctione argumentum certe est tubi substantia, quem in Capensi varietate constanter ex incognitæ naturæ particulis homogeneis confectum esse vidimus, quum tamen animal arena non caruisse, ex contenta intestinis copioso sabulo calcareo pateat.

Tabulæ nostræ octavæ figura tertia NEREIDEM cylindrariam belgicam intra tubum arenaceum, folis palmulis prominentem & pendulos cirrhos exferentem sistit. Figura 4 a ventrali latere conspicendiā, adeoque segmentorum & peduncularum diversitatem distincte exhibet. Figura 5 eadem est, partim a dorso partimque a latere conspicienda, ut peduncularum lateralium forma pateat; simulque antennulæ ad caput, & cirrhi oris, & branchiæ appareant in situ naturali. Sexta figura exprimit Nereidem in aceto aut spiritu vini mortuam, contractam & curvatam.

Capitis varias partes distinctæ figuræ illustrant. *Fig. 7* illud inferne conspicendum præbet, ubi apparent, palmulæ *a*, antennulæ majores *bb*, minores *cc*, atque cirrhi circa os contracti & crispati. *Fig. 8* a latere exprimit caput, *a.* palmulas, *A.* limbum

limbum sub palmulis expansum, lacero fimbriatum, *b.* antennulas majores, *c.* minores, *d.* cirrhos oris, *e e.* branchias, *f.* faciem concavam Nereidi belgicæ peculiarem indicant. In fig. 9, superius capitis latus referente, *a.* itidem palmulas, *A* limbum, *bb.* & *cc.* antennulas, *d.* cirrhos oris, & *f.* superficiem capitis cavulam denotat.

Appendicem scaphoideam caudæ ex Nereide belgica depingunt fig. 10 a dorsali & fig. 11 a ventrali latere visam.

A N A T O M E.

Interanea pinguedine nulla impedita, distinctissimaque in terrimo alias animali facile scrutari possunt.

Cutis tenuissima, hyalino-albicans, tenera, a musculis facile secedit, maxime in maceratis; inque vivo animali eleganter iridescit.

Dorsum *fascia muscosa* longitudinalis totum occupat; in ventrali vero latere utrinque ad pedunculos decurrit *tænia* muscularis. Pedunculi ipsi propria carnositate prædicti sunt.

Viscera maxime in ventrali latere, nempe in musculosarum tæniarum intervallo longitudinali, translucent. Ibi trans cutem distincte apparet *stria* albicans, a capite ad caudam ducta, paucim serpentinula, quam *vena æqualis*, rubra, maximam partem sinistrior comitatur. Hæc *stria* filum medullare est, nervorum origo.

Sexta per longitudinem cute, *liquor* viscidulus, limpidissimus

e

e cavitate corporis effluit. Intestina tunc imprimis oculos ferunt.

Oesophagus fili instar ab ore per bulbum carnosum capitum procedit & ubi cavum corporis adtigit dilatatur in ventriculum.

Ventriculus (fig. 12, 13 cc.) exiguus, oviformis, carnosus, Melonis instar longitudinaliter canaliculatus.

Intestinum triplex. Primum (fig. 12, 13. c. d.) plerumque lutescens, dorso proprius & sinisterius situm, a ventriculo ad tres quartas partes longitudinis animalis extenditur; tunc sensim dilatatum reflectitur efficitque intestinum *secundum* (d. e), quod peramplum, tenue, aurantioque colore insigne, dexterius sub priori adscendit, adtenuatumque ad caput dexterius (fig. 13. e.) reflectitur. *Tertium* intestinum (e. f.) collapsum & excolor inter duo præcedentia transit, & eorundem relegens decursum, recta ad anum pergit. Hoc ultimum intestinum semper arenulis scatet. Interdum etiam duo priora arenoso luto oppleta observavi.

Intestina inter se *membranula* hyalina, tenerima, ceu membranolo connexa sunt; & tertii intestini ad anum descendens portio simili membranula longitudinaliter integumentis adhæret.

Intestino primo longitudinaliter exterius adnascitur *ductus* crassus, subflexuosus, *ruberrimo* liquore plenus, qui mihi *cordis* seu trunci systematis vasculosi vice fungi videtur. Is in integro animali circa medium corporis a dorsali latere, a ventrali autem versus posteriorem extremitatem translucet, & rubore totum animalis subdiaphanum corpus perfundere videtur. Systolicum quendam motum, nec tamen regularem & levissimum in eo sub-

inde percipere mihi visus sum. Idem ductus adtenuatus secundo quoque intestino comes est, & tertium exilis venæ rubræ instar ad anum usque comitatur. Crassioris trunci anterior extremitas supra ventriculum adtenuatur in venam, quæ ramum utrinque insignem recto angulo branchiis mittit, venuulis 2 alijs œsophagum comitatur, & tandem azygon ex bifurcatione ortam suppeditat, quæ in abdominale latus demissa, nervo medullari comes, subflexuose decurrit. Venæ binæ aliæ in ventre utrinque longitudinales apparent, & exilissima utrinque una per dorsum prope pedunculos procedit. In cirrhis oris plerisque etiam exilis vena rubra ad aliquam longitudinem conspicua est. Insignius vasculum rubrum per rhaches branchiarum incedit; foliola branchiarum vero æqualiter lutescunt, nec conspicua vaſa monstrant.

Videtur truncus systematis sanguinei in hoc animali ex ipso intestinali canali venis absorbentibus, ceu radicibus, colligi, & ramis arteriosis succum nutritum per corpus diffundere. Similem fere in Aphroditis & forte in Insectis plerisque structuram obtainere probabile est; eaque systematis succiferi constitutio magnam cum vegetabilium fabrica analogiam proderet.

Pone carnositatem capitis, ad œsophagum, utrinque situm est viscus (fig. 12, 13. b b.) intestiniforme, in arcum compositum, fuscescens, mollissimum, tenerum, cœca ut videtur extremitate in capitis carnositate definens. Ad ventriculum utrumque concurrere & intestino inferi videtur, forteque hepatis aut pancreatis analogum quiddam est.

Ante hæc intestinula & in eorum quasi sinu, *corpuscula ovalia* bina (fig. 12, 13, a a.), ante venarum branchialium insertionem lateribus animalis adfixæ, collocatæ sunt, quæ per maximam anni par-

partem milii grano vix duplo majora sunt & velut acinos aliquot opaciores, albantes intus continent; primo vere autem adole-scunt in magna ovaria seu massas e granulis albis, arenula haud majoribus coacervatas, anticam cavi corporis partem, effar-cientes.

Præterea pone insertionem branchiarum, supra fascias ven-trales, ad pedunculum secundum tertiumque sitæ & adnatæ sunt *vesiculæ* utrinque binæ, subrotundæ, fuscescentes, tenerimæ; e quibus disruptis effluit liquor bilis colore fuso-flavus. An hæ forte seminalem humorem parant? Hermaphroditicam certe Ne-reidi nostræ naturam esse, uniformis in omnibus individuis fabrica innuit. Magnum singulæ hæ *vesiculæ nervum* a medul-lari trunco accipiunt; quatuor earum nervi recto angulo a trun-co oriuntur, eodemque albanticiores sunt. Similem fere *ner-vum* medulla utrinque venæ branchiali comitem mittit.



2. NEREIS CONCHILEGA.

Tab. VIII. fig. 14-22.

Tubos e testaceorum fragmentis compilatos *Nereidis conchi-legæ*, qui nomini ejus ansam dederunt, mare omni fere tem-pe-state in Hollandiæ oram egerit. Adeo copiosa in proximo fa-lo est hæc species, ut magni sæpe tuborum acervi a fluctibus in littore relinquuntur, semperque multo copiosius hujus, quam *Nereidis cylindrariae*, tubi reperiantur.

Rarius tamen occurrit animal ipsum, cuius cummaxime

accuratam descriptionem datus sum, quum auctorum prorsus nemo de eo vel verbulo egerit, & tubi quoque solus, quod sciam, KLEINIUS mentionem fecerit (*de tubul. marinis p. 7. n. 1. tab. I. f. 4.*)

*Animalis
motus.*

Vivum aliquoties inveni animal ejusque in aqua marina servati motus per plures horas contemplatus sum. Dum in tubo hospitatur, caput suum cum cirrhis & branchiis exserit & in aqua varie movet. Branchias, quae fruticulorum corallinorum adinstar rubent & rigent, coccineo sanguine repletas, animal modo erigit atque exporrigit, modo (si tangas) contrahit, ut evacuato sanguine pallescant. Cirrhos seu tentacula oris continuo convolvit & glomeratim miscet, longiores subinde in semipolicarem longitudinem exporrigens. Corporibus, quorum in contactum veniunt haec tentacula, facilime adhaerescunt, suetoria quadam facultate praedita, & levissima vi abrumptur.

Exturbatum animal lumbricoideo suo motu fugit & tubo sponte elabitur. Tunc pigrius movetur & in aqua spiraliter curvatum jacet, uti figura tabulae *Septemdecima* indicatum est. In spirituoso liquore illico moritur, eodem quem figura sistit statu, sed branchiis imprimis atque cirrhis contractioribus.

*Tubi de-
scriptio.*

TUBI *Nereidis* nostrae parvuli rarius reperiuntur (*fig. 16.*). Vulgo calami anferini crassitie & semipedalis ad summum longitudinis esse solent (*fig. 14, 15.*). Cylindrici semper sunt, aequali per totam ferme longitudinem lumine, postica tantum extremitate paulo angustiores. Constant autem ex *membrana*, & glutine quasi orta, fordide lutescente, in aqua flexili, siccatione obrigescente, quae extus velut studio collectis & adglutinatis *fragmentis testaceorum* saepe majusculis, imo integris testis, passimque admixtis grossioris glareæ particulis undique munita &

ro-

roborata est, adeo ut siccatione minime collabascat (fig. 14.). Majora testarum fragmenta plerumque transversim tubo adplicata, & saepius imbricatim conferta sunt. Posterior adtenuata extremitas pollicari circiter longitudine membranacea sive nuda esse solet. Rariuscule reperias tubos extus tantummodo arena coopertos (fig. 15.) ; frequentius per portiones e fabulo aut glarea, testarumque miculis alternatim compositi videntur. Rarissimi omnium sunt, qui sola nuda, sine heterogenis, membrana constant. Tales subinde *Ovariis Buccini undulati* (a.) s. *Alcyonio vesiculoso* antiquorum innatos inveni.

Tubularia muscoides (b) & *Sertularia halecina* (c) Nereidis nostræ tubos saepius hinc inde obseruant. Unde, saltem magna pro parte, liberos in mari fluctuare tubos, nec vulgo nisi altera extremitate adnatos esse crediderim. Quid quod plures saepe tubos caudis conglutinatos invenisse mihi visus sum, qui gregariam indolem hujus speciei indicarent.

Membrana quæ tubum proprie constituit, si comburatur, insig-
gnem foetorem animalem diffundit.

Magna structuræ adfinitas occurrit inter *Nereidem* nostram *conchilegam*, & *Animalculum* in exesis Maris mediterranei lapidibus repertum ab accuratissimo KÆHLERO, descriptumque *actor. holmiens. an. 1754.* (edit. germ.) p. 143. t. 3 f. A. Huic pariter branchiæ ad caput ramosæ, cirrhone circa os & reliqua fere corporis figura analoga est. Incertum videri potest, an hæc KÆHLERI *Nereis* lapides vere cavit, aut potius in exesis niduletur; & anne a nostra specie differat? LINNÆUS cum

KÆH-

(a) LINN. *Syst. ed. X.* p. 740.

(b) PALLAS *Elench. Zoophytor.* p. 82. sp. 39.

(c) Ibid. p. 113. sp. 64.

KÆHLERO prioris sententiæ fuit, & eam solam ob causam animal, quod haud dubie Nereidibus adnumerandum est, Teredi-ni adsociavit, cuius veram fabricam a Nereidibus alienissimam ita luculenter exposuit & Pholadibus ad finem esse docuit ADAN-SONIUS, ut dubium de ejus ordine naturali nullum supereesse possit.

Branchiarum apparatus in Nereide nostra, æque, ac in KÆH-LERI *Lapicida*, imprimis me permovet ut apparatus fibroso-plumaceum *Nereidis lutarie* supra (p. 116.) memoratæ, *Serpularumque omnium*, & *Tubulariarum quoque*, non pro tentaculis, sed pro branchiarum analogis organis habeam, præser-tim cum tentaculorum usum in animalibus enumeratis rarissime vel prorsus non præstare videantur.

D E S C R I P T I O

N E R E I D I S C O N C H I L E G Æ.

Tab. VIII. fig. 17-22.

Corpus albidum, translucido viscerum rubore perfusum, sub-quinquepollicare, lumbriciforme, tereti-depressiusculum, ver-fus posteriora sensim adtenuatum & spiraliter sese convolvens. *Dorsum* convexius, transversim striato-rugosum; latera turgidula.

Subtus tænia prominens, plana, pulchre rubra ad caput ro-tundato initio incipit, ultraque medium corporis longitudinem producta, angustatur tandemque evanescit. A latere conspectam eam exhibent *fig. 18. c, 20 a.* Hæc tænia secundum pedunculo-rum seu plicarum lateralium numerum in segmenta partita est, & prope anticum initium exhibet foramen contractum, quod *ovarii apertura* esse videtur.

Per

Per latera longitudinaliter decurrit *fimbria* moniliformis, seu *farcimen nodosum*, aut *papillarum* proprie series. Harum aliquæ certis intervallis majores, ad dorsum *seta aurea*, subgemella, arrecta distinctæ, respondentes sibi habent *plicas* laterum, transversas, bilabiatas (fig. 17.). Eæ pedunculorum loco sunt. Setigeras papillas plicasque laterales in omnibus fere specimenibus utrinque *septemdecim* numeravi; Harum tres priores confertæ, capitique proximæ sunt, reliquæ retrorsum sensim magis distant a $\frac{1}{3}''$. distantia ad 2''. vel ultra. Prima seta loco plicæ lateralis respondentem sibi habet squamam utrinque lateralem capit.

Setigera corporis portio *tertiam* circiter totius longitudinis, *partem* efficit; *reliquum* corporis insignius adtenuatur, inque acumen desinit, totum teretusculum, subannulosum, longissime extensile & *papillis* laterum transversalibus utrinque ultra 150, versus extremam caudam sensim confertioribus, bifariam quasi denticulatum.

Caput animalis *squamis* quatuor planiusculis, carnosis inferne munitum est; quarum binæ (fig. 18. b.) majores, semiovatae, contiguæ; exteriorque ad latera utrinque una (fig. 18. d.) cui setæ dorsales primi paris respondent.

Os inter squamas labiatum (fig. 19.) squama subturbanata, sursum expansa, rotundata.

Circa oris squamam epiglottiformem adstant *cirrhi* numerosi, albidi, filiformes, in vivo animali contortiles & quasi glutinosi; horum superiores longissimi, inferiores gradatim breviores, brevissimi sub ore.

Bran-

Branchiæ quasi e nucha capitis, senis truncis, dupli ordine oriuntur (fig. 17. 8.) ruberrimæ. Arbusculæ seu arteriæ instar ramosissimæ & in tenuissimas extremitates infinite subdivisæ sunt. Singula branchia vera est arteria omnibus suis ramis libera & cute obvestita, quæ in vivo animali sanguine plena omnibus ramulis subriget & abscissa liquorem tenaciusculum, coccineum effundit, post mortem vero animalculi flaccescit. Sinistræ seriei branchiæ (fig. 21.) omnes longiores; dextræ (fig. 22.) breviores, at ramosiores; in utroque latere posteriores gradatim minores & aliquantulum reclinatae sunt. In omnibus ope microscopii sanguinis quandam circulum egregie conspexit *Amiciss.* SANDIFORT M. D. cuius experimentum vivis destitutus speciminibus iterare nunc non possum.

A N A T O M E.

In quibusdam speciminibus quæ viva liquori immiseram, *epidermis* passim, maxime ad fimbriam lateralem, bullulatim acute secesserat, ob effusam gelatinam crystallinam; apparuitque crassiuscula, albida.

Cutis musculofo apparatui adnata est atque cum eo simili secatur.

Dorsum seu branchiale latus totum occupat *stratum musculorum* latum. Inferiori lateri quatuor sunt fasciæ longitudinales, quæ exiguo inter se spatio distant; interque extimam utrinque tæniam & dorsalem expansionem pedunculares setæ implantatae notantur. *Expansio dorsalis*, æque ac tæniæ abdominales, constat fibris continuis longitudinalibus, tendinea albedine nitentibus. Transversæ fibrillæ musculosæ nullæ notabiles.

Viscera in corporis majori parte satis libera, fibrillis leviter adnectuntur, ne fluctuant.

Tra-

Traetus intestinalis ab ore incipit, canali carnoso, fili crassitie; qui eundo crassescit paululum, proprius dorso decurrens, eidemque magis adnexus. Is *canalis* crassior factus, inter septimum & 8^{um}. pedunculorum par, dexterius contorquetur semel, factoque inter octavos & nonos pedunculos brevi arcu, & sigmoidea flexura deorsum, degenerat in *Intestinum laxius* sed tenue, membranaceum, coli ad similitudinem, sed quadrifariam, cellulosum: Hoc *coliforme Intestinum* a nono ad 14 par pedunculorum animalis circiter extenditur, ubi, extremo paulo angustatum & versus dorsum in secundum sigma reflexum, mutatur, fitque *intestinum carnosum, cylindricum*; quod e regione 16^{mi} pedunculorum paris denuo, brevi versus dorsum flexura facta, continuatur *Intestino longissimo*, membranaceo, paulo ampliori, s^æp^e arenulas continente; quod ad anum usque pergit & tenuiorem posticam corporis partem totam occupat, undique adnatum.

Vas rubrum intestinalem tractum concomitans in hac *Nereide* æque ac *cylindraria* inveni. Truncus ejus insignior intestino coliformi & cylindrico subtus in medio longitudinaliter adnatus est, ad flexuram canalis œsophagæ f. anticam intestini coliformis finem deflectitur atque sinistro a latere œsophagi, propiusque dorso pergit, adtenuatum versus branchias, quibus maxima ex parte impenditur & exilem venam usque ad os comitem œsophago mittit. A posteriori vero parte, versus longissimum f. postremum *intestinum extenuatur*, & sub eodem venæ instar decurrere pergit.


A capite usque versus pedunculorum par nonum, fasciis ventralibus musculosis incumbit atque adnatum est corpus album, depresso, postice in bina crura acu separabile, & extenuatum definens. Hujus substantia tota quanta granulis arenulæ

magnitudine suffertum est , unde ovarium esse nemo dubitabit . Hoc omnibus (quodquod saltem habui) speciminibus inesse inveni . In hoc dicit orificium , quod in antica parte tæniæ prominentis , ventralis , hujus Serpulæ notavimus . Decembris mense , & autumno quoque has albas strias turgidas inveni cum contra in *Nereide cylindraria* ovaria Martio demum mense maturescant .

Ab utroque ovarii latere quatuor adstant tenellæ *vesiculae* , membranaceæ , lutescentes , linearî oblongæ , subacutæ ; quarum 2 utrinque anteriores minutæ , reliquæ fere duplo majores sunt . Hæ pedunculorum , a tertio ad sextum par , interstitiis implantatae sunt ; postrema inter 5 & 6^{um} cujusvis lateris pedunculum , & sic reliquæ . Harum minima oscula instar rimulæ transversæ extus apparent , inter fimbrias pedunculorum memoratorum , vix nisi intentissimo oculo notabiles .

Has item vesiculas omnibus Nereidibus hujus speciei inesse observavi , vixque dubito pro seminalibus organis habenda & animal hermaphroditicæ esse naturæ .





X.

S E R P U L A

G I G A N T E A.

ACCEDO ad ultimum e tribus illis *Molluscorum Animalium* generibus, quæ supra Naturæ lege in unum ordinem, cum pluribus forte aliis, cogenda esse affirmavi. SERPULAS volo.

SERPULÆ, alias *Vermes tubulicoli*, *Vermiculi marini*, Gallis *Vers à tuyaux* in genere dicti, sunt animalcula addicta *tubo* seu *vaginæ* plerumque testaceæ, longitudinaliter adnatæ, & versus posteriorem clausam extremitatem sensim adtenuatae. Ipsa animalcula corpore & imprimis antica extremitate tubis veluti adaptata eosdem exacte explet, & ad Nereides tubulicolas accedunt pedunculis per latera dispositis, branchiis ad caput collectis & corporis adtenuata forma. Fabrica inter se ita conveniunt, ut unius speciei descriptio paucis mutatis reliquis fere applicari queat.

III. LINNÆUS animalcula marina plurima, tubulosis testis instructa, fabrica tamen corporis longe diversa, Serpulis suis immiscuit. Sic enim *Serpula lumbricalis* (LIN. *syst. ed. X.* p. 787.)

docente ADANSONIO animal e Limacum familia continet eorumdemque ordini naturali (p. 73.) adnumerari debet ; quorsum & S. anguinam (LIN. l. cit.) referendam esse existimo.

S. arenaria (LIN. syst. ed. X. p. 788.) autem, seu *Solen arenarius* RUMPHII, nullo modo a *Teredine navalis* differt, nisi quod tubo suo non, ut ista, in lignis excavatis, sed in arenoso mari fundo niduletur. Hinc eam a RUMPHIO judiciose juxta hanc ipsam *Teredinem navalem* collocatam invenimus. *Serpula Penis veneris* LINNÆO dicta, & ex testa sola nobis cognita, tantam cum hisce *Teredinum* speciebus similitudinem prodit, ut iisdem jure adjungi debere videatur.

Penicillum a LINNÆO inter Serpulas relatum supra (p. 116.) jam Nereidibus tubulicolis vindicavi, & *Serpulam ringentem* ejusdem ad Brachionos HILLII referendam esse in *Elencho Zoophytorum* nuper edito (p. 91.) docui.

Illis ergo tantum animalculis Serpularum nomen adpropriari vellem, quæ forma & fabrica corporis heic describendam giganteam speciem æmulantur & in tubo plerumque testaceo, longitudinaliter adnato libera vivunt, eundem tamen nunquam derelinquunt. Dico plerumque testaceo, quia in nostro mari vulgo occurrit vera Serpula quæ tubo ex arenulis conglutinato gaudet, & forte sui generis non sola est quæ tubum compilatum inhabitat.

Serpula
giganteæ
patria,
nomina,
cet.

Serpula, quam heic describendam mihi sumsi & cuius insigniter contractæ iconem dedisse videtur SEBA, (thes. vol. I. t. 29. f. 1, 2. ubi *Urticæ marinæ singularis*, nomine, Insula S. Thomæ missa, proponitur) inter congeneres facile maxima & in mari corallifero Insulas Caribæas adluente minime infrequens est.

est. Ob formam & colorem branchiarum flores plenos æmulantium, apud Europæos in istis insulis degentes nomen *florum animalium* obtinuit hæc species. Magno numero *Antigua* insula missam accepi, sub eodem nomine (*Animal Flowers*), addito alio, quo a pescatoribus Anglis ibi vulgo adpellatur (*Punches.*).

Ex relatione supra (p. 116.) jam citata Curaßavica, quam, una cum iconे colorata, heic (*Tab. IX. fig. 2.*) adjecta pro humanitate sua communicavit *Cel. GAUBIUS*, constat Serpulam nostram circa Curassoam Insulam in Coralliis frequenter occurrere & coloribus insigniter ludere. Reperiuntur enim alba, rubra, flava & violacei coloris specimina. Tubi earum semper rupibus vel coralliis adnati observantur, corallioque ut plurimum toti incrustati. In hos, minimum ad tactum, cum impetu se recipiunt, nec nisi remoto periculo denuo prodeunt. Exsertæ, branchiarum adparatum pulchre explicant (*fig. 2. a.*) & pendulos in tuba rubros continuo movent.

Tubi, quos inhabitat hæcce Serpula, ob magnitudinem in Americanis Coralliis facile dignoscuntur, digito minimo enim plurumque æquales & semipedalibus longiores sunt. Longitudinaliter in rupibus crustisque corallinis exorrecti, subflexuosi & per totam longitudinem adnati esse solent. Qui *Millepora alcicorni* (*Elench. Zooph. p. 260. sp. 161.*) adcreverunt, ab ejusdem substantia vulgo penitus incrustati sunt (*fig. 2.*), ut vera eorum forma conspici nequeat. Ab orificio lente adtenuati & teretiusculi proprie sunt; subtriquetri tamen videntur, ob latus adnatum planiusculum, & costam extus longitudinalem, obsoletam, obtusamque, quæ ad orificium producitur dente magno

Tuborum
descrip-
tio.

(fig. 2. a.) conico subulato, obtuso; a quo margo tubi versus adnatum latus convexe descendit. Lumen tubi ubique perfectissime circulare & interior superficies laevis, lutea, in orificio tamen alba & tenerrimis striis undulatis scabra est. Dens & exterior orificii margo semper violacei coloris deprehenduntur. Substantia solide lapidea, duplex; exterior rarius extus late violacea est, eaque a latere adnato tubi fere deficit. Interior compacta & quasi vitrea lamina perfecte circularem canalem efformat.

D E S C R I P T I O

S E R P U L Æ G I G A N T E Æ.

Tab. IX. fig. 2-10.

Consideranda in descriptione Serpulae erunt *corpus*, (fig. 3. b. g. k.), thorax cum *cucullo* (fig. 3, 4, 5. a. b. f.), & *organæ* (fig. 3, 4, 5. c. d. D. cum E. E. e. e.).

CORPUS (fig. 3. b. g. k.) albido, tereti-depressum, dorso planiusculum, versus posteriora lente adtenuatum, apice complanatum, obtusoque angulo acutum. In speciminibus omnibus *corpus* versus abdominale latus incurvatum inveni, prout *fig. 3.* docet.

Latus corporis abdominale (fig. 3, 4. b. b.) late, fibris obsoletis longitudinalibus substriatum.

Latera & dorsum, relicto tantum lato fulco (fig. 5. i.), occupant

pant *fascia* utrinque lata , striis transversis , creberrimis , imo contiguis , parallelis arata (fig. 4. 5. gg.).

Numerantur vulgo *striae* ultra 250. Ad dorsi planitiem singulæ *striae* insidet *penicillus* exilis e flavescente argenteus , *antrorum* inclinatus , compositusque e pilis tantæ teneritudinis , ut totus fasciculus vix capillo humano crassior fit.

Pars corporis *summa* seu THORAX (fig. 5. k. f.) carnositate durior , cylindrica , involuta est CUCULLO in dorso late adnato (fig. 5. f. k.) imbricatoque *lamellis* utrinque senis (fig. 3 ♂ 4, 5. ll.) planis , carnosis , obliquatis , quibus respondent totidem *pedunculi* (fig. 3. i.) carnosí , depresso , setulis mollibus , fusco æneis fimbriati , versusque caudam inclinati.

Limbus Cuculli antice longitudinaliter dissecti (fig. 4.) liber , lutescens , maximam partem integer (fig. 4, 5. ff.) atque subrepandus , ad tubam (fig. 3, 4. dd.) prolixior efficit *foliolum* (fig. 3, 4. bb.) intus coloratum & extus in medio disci *seta* aurea notatum . A dorso cucullum perficit *membrana* magna , distincta , cordata , intus colorata , media plica branchiis fere interserens (fig. 3. 5. aa.). Hæc cum duobus prædictis foliis (fig. 4. bb.) efformat quasi *calycom* (fig. 3. 6. 7. a. b.) organorum (d. cc.) *florem* mentientium .

ORGANA sunt branchiæ duæ (*corolla* gemina) & tuba cum corniculis (*pistillum* eccentricum).

Branchiæ (fig. 3, 4, 5, 6. c.) sunt pedunculi bini crassi albi , e carnositate thoracis adsurgentes , turrem babelicam octo fere spirarum forma mentientes (fig. 7.) Harum bases connectit membra-

branula alba, media tæniola purpurea, longitudinali picta. *Anfractuum* turris marginem coronat *limbus* (fig. 7. d d d.) latus, striatus, in *fimbriam* filamentosam fissilis. *Filamenta* (fig. 8, 9, 10. a.) compressa, subcoriacea, parallela, interiori latere ciliata seu barbata (b b b.), extus colorata. Limbi eique continuæ fimbriæ latitudo, cum anfractibus sensim decrescit.

Color fimbriæ, quam animal vivum in infundibuli spiralis formam & floris quandam similitudinem (fig. 2. a.) pandit, in diversis individuis diversissimus est. Plerisque limbus continuus & magna fimbriarum pars, dilutius saturatusque *violascit*, extrema filamentorum vero alba, purpureo variegata sunt; Aliis fimbriæ totæ violaceæ, extremitate albo interruptæ (fig. 6.); demum aliis totæ fere branchiæ flavescent vel albent, aut vix violaceo nebulosæ sunt.


Cum in tubum redit animal, branchiæ ambo simul in cylindrum comprimuntur.


Tuba branchiarum cylindracearum intervallum (fig. 4.) exalte replet. Oritur *tubo* carnoſo depresso & utrinque alato (fig. 3, 4. d d.) a latere qua branchias respicit fasciolis longitudinalibus albis, purpureisque variegato, qui extremitate dilatatur in *squamam* rigidam (fig. 3. D.) tenuem, planiusculam, extus albam, intus rubicundam, undique marginatam. *Squama* in loco ortus tuberculo notata, cui adstant *corniculum* utrinque corneæ duritiei, tubulosum bipartitum; cuius portio major (fig. 3, 4. E E.) extremo uncinulis muricata, curvula est, minor (e e.) erecta, tantum apice uncinulata. Oris apertura in tota squamae superficie non adparet.

In

In aliquo specimine tubam casu detruncatam inveni. In binis aliis eandem exiguam, recrescentem & repullulantia cornua observavi. Unde facultatem membra trunca redintegrandi Serpula nostra habere videtur.

Dissectum corpus uniformem ubique carnositatem & canalem exhibuit per medium longitudinalem, compressum, membranaceum, lateraliter striis transversis opacis, externi corporis striis respondentibus præditum. Hic in thorace amplior, cum tubæ cavò communicare videtur ; versus caudam adtenuatus definit exigua ani in summo apice corporis apertura. *Epidermis* a corpore & cucullo in maceratis facile abscedit, tenuerrima.





X I.

L U M B R I C U S E C H I U R U S.

Lumbri-
corum
species.



UMBRICORUM genus multo numerosius est, quam ab *Ill. LINNÆO* traditur. Præterquam enim, quod terrenos inter Lumbricos vere specifica intersit differentia, quam *Divus RAJUS* bene observavit; Multa in mari dantur vermiformia animalia huic generi adsocianda, quorum e censu sunt bina ista apud RONDELETIUM sub *Vermium macrorhynchoterorum* nomine occurrentia, quorum alterum nuper BOHADSCH *Syringis* nomine accuratius retractavit. Ipse quoque complura ex mari nactus sum, ad Lumbricos referenda. Ex his *unum* parvulum, totum atrum, lave & in plusquam Proteas formas corpus mutans *Tabulae nostræ undecimæ figura nona* illustrat. *Aliud*, interaneorum imprimis constitutione notabile & olim in Sussexiæ littore, cum ibi anno 1762. versarer, observatum *figuris septima & octava* obiter expressum est.

Lumbri-
eus oxy-
rus.

VERMIS erat subsesquipollicaris, teretiusculus, postice sub

- latus & acutissimo *apice* definens, anterius crassior, obtusus, ex-
- serens *rostrum* teres, truncatum, subtiliter granulosum, lute-
- scens, quod quaquaversum curvare, intra corpus retrahere aut
- pro lubitu exserere valet; reliquum corporis minus bene mo-
- vens,

vens, & tantum leviter curvare visus. Superficies, præsertim caudæ, striis teneris *annulosa*. Color ubique livescente-albidus. *Porus* in crassiori extremitate, haud procul a rostri basi, vix conspicuus, contractus; qui ani apertura est. *Intestina* tenera, verme aliquoties longiora, in antica maxime cavi corporis parte glomerata, libereque innatantia liquido corpus explenti. *Ventriculus* constat ex tubo crasso, carnoso, crispulo, qui quasi introrsum subversum rostrum est, & pro lubitu animalis per os extrovertitur. Ab interna hujus extremitate, cui intestinum continuatur, *fasciæ* tres *musculosæ*, robustæ oriuntur, adtenuataeque tegumentis implantantur. Ventriculum longitudinaliter legit *vasculum* album, opacum, crispulum, vasculis seu fibrillis eidem adhærens. *Intestinum* definit ad porum anticæ extremitatis. *Medulla* s. *truncus nerveus* animalis simplex chorda est, albida, nec nodosa. E servatis speciminibus perfundtorie animal describo, quod nunquam nisi semel legere datum fuit.

Species Lumbrici cujus imprimis icones *Tab. X.* exhibui, quamque accuratius describere molior, prorsus nova est; nec enim, quod sciam, apud auctores ullibi occurrit, quamvis in Belgico littore vulgatissima sit & a piscatoribus Belgis, (penes quos obscenū Phalli marini nomen obtinuit,) subinde, deficientibus *Sprattis*, conqueratur pro captandis hamo *Gadis Morrhuis.*

In Mari intra arenam latent hi Lumbrici & hybernis imprimis Observa-
mensibus crebro, omnium magnitudinum a fluctibus egeruntur. ta in L.
Inveni quandoque innumeros, qui in littore, durante æstu, sese in echiuco.
arenam abdiderant. Videas tunc quosdam apice prævio semi-
defossos; plerique vero altera extremitate deorsum directa, vix
apice extra fabulum prominere solent; unde subverti intra are-
nam credibile est. Recedente mari immobiles sunt; si vero are-

na eos extrahere tentes, egregie s^ape resistunt, dum intra canalem, quo continentur, crassescunt. Nudi quoque & relaxati in littore jacentes, si contrectentur, contrahi & durescere, utut lentius, solent & sic aliquamdiu remanent; aquæ maris vero commissi statim exporriguntur & per aliquot dies vivi servari possunt, etiam si aqua corrupti incipiatur. In aqua dulci, uti marina omnia, statim pereunt, mortui in informes tumores pa^ssim relaxantur, brevique sponte, vel levissima vi disrumpuntur, interanea effundentes & computrescunt, cum tetrorimo foetore carnis corruptione dissolutæ. In aqua fervida subito pereunt contracti s^ape ad rupturam usque, & exsertis omnibus aculeis. Lentius minusque contracti, sed retractis aculeis, in spirituoso liquore moriuntur.

Plerique eorum, qui in littore occurrunt, carent lingua deinde describenda (*Tab. XI. fig. 2. 4.*), eamque fluctuum agitatione amississe videntur. Sed quos retibus in mari captos habuit appendicem istam plerumque exhibuerunt, unde eam naturalem animali esse adparet.

D E S C R I P T I O

L U M B R I C I E C H I U R I

Tab. XI. fig. 1-6.

Corpus cylindraceum, molle, in omni punto contractile & mutabile, utrinque obtusum, annulatum striis crebris, quæ in latere ventrali & versus extremitates maxime glandulis mucifluis granulosæ sunt &, per intervalla insigniores, quasi in segmenta partiuntur corpus. Series transversæ glandularum insigniores,

gniores, inter extrema corporis, numerantur circiter 19, quibus interiectæ ternæ, quinæ, pluresve exiliores.

Os instructum lingua (fig. 2, 4.) carnosæ, crassiuscula, fæphoidea, intus versus os (cui constricto isthmo adhæret,) stria crassa longitudinali (fig. 4.) notata. Ejus apicem & margines pro lubitu animal involvit & explicat. Deficiente (fig. 1. 3.) ut sæpe solet, lingua, os papillæ in modum contractum est.

Pone os a latere corporis granuloſo *mucrones* insignes seu paleas binas (fig. 1.3. 4.) auratas, curvulas, convergentes exsertat animal, quas *uncinulos genitales* vocabo, quia generationi inferire videntur.

Altera corporis extremitas (fig. 5. 6.) truncata, dupli corona spinarum s. palearum aurearum, rectissimarum horret. Ordo spinarum uterque a latere granulosiore corporis deficit (fig. 6.); in priore circiter octonæ, in extremo septenæ numerantur. Ultima corona cingit aream planiusculam, in qua exigua ani apertura est.

Color animalis, qui cutis humanæ maceratae, gryseo-albidus; at translucentium viscerum fulvedo per vivum aut recentem Lumbicum aurantium ruborem diffundere videtur.

A N A T O M E.

In aqua fervida & liquore maceratis *tela* quædam mucosa acute externe abscedit. Secta cute copiosus effluit *liquor* turbidus, cui intestina & genitalia viscera innatant.

Cutis cum panno musculoſo unita, in medio corpore multo-
T 3 te-

tenuior quam ad extrema. *Pannus musculosus* fibras minime distinctas exhibet.

Oesophagus dilatatus in sacculum, nonnunquam luto arenoso repletum. *Ventriculus* primus est ingluvies laxa, coriacea, curvato-crispula. *Ventriculus* secundus teres, carnosus, laquei vel laryngis similis, & mesenteriolo in sigmoideam flexuram compositus. In mesenteriolo longitudinaliter decurrit *stria* mollis, crocea, cuius colore intestina omnia tincta sunt.

Intestinum incipit canali tenui, ad 4 fere pollices albicante & arenæ subtilissimæ sæpe glebulas continente, incertisque gyris circum genitalia viscera fluitante. Excipit tunc *intestinum* paulo capacius ubi inflatum, calamo gallinaceo subpar, 4 spithamas æquans, *luteum* vel *jejunum* vocandum; aurantii enim coloris est, striis longitudinalibus opacioribus distinctum, totumque præter aquulam nihil continere solet. Hoc, æque ac prius, membranula longitudinali in parvos gyros crispatur, & plerisque suis voluminibus in medio corpore & versus posteriora libere fluctuat. Extrema intestini portio subspithamea denuo angustior, minusque crispata, versus ventriculos ascendit atque inde satis recto tractu redit ad anum, qui est in centro areolæ coronatæ. Hæc quoque intestini pars glebulis arenosis, & versus anum luto arenoso soluto sæpiuscule scatet.

Ad anum concurrunt *ductus* duo filiformes, crispati, dilute lutei, pollice longiores, liberi, quorum me usus latet.

Vesiculæ genitales duum parium, cuti, lineæ fere ab uncinulis genitalibus distantia, æquidistantes inter se, implantatæ sunt. Hæ Novembri & magis adhuc Decembri mense albissimo lacte turgent, tumque in sacculos cylindricos, pollicares & ultra, sæ-

pe

pe subcaudatos elongatæ reperiuntur. Harum duæ anteriores, breviores, ductu adtenuato cuti insertæ esse solent. Oscula harum vesicularum externa nullo modo detegere potui. E tenerrima, arachnoidea membrana factæ sunt. In quibusdam, Novembri mense sectis, inveneram liquore turbido corpus opplenti innatantes globulos albos innumeros, nec nisi pro ovulis habendos; vesicularum lactiferarum loco supererant his bullæ exiguae, ovatae, hyalinæ. In Februario sectis vix 3, 4^{ve} lin. longas & limpide albidas easdem inveni; verum prædicta intestinula seu ductus lutei ano inserti heic erant elongati, humore semipleni & in superficie granulosi.

An forte vesiculis lactiferis parata ovula in cavum abdominis effunduntur, & ob situm Lumbrici verticalem in posticam cavi corporis partem congesti, a ductibus luteis suscipiuntur?

Uncinuli, quos vocavi, *genitales* curvula tantum extremitate extra cutem prominent, intus longæ antennæ instar producuntur, & a truncata extremitate fibras, tendinei adspectus, certissime musculosas versus cutim radiatim dispergunt, quæ ipsorum motui inserviunt. Inter utriusque uncinuli internam extremitatem tensa transversa fibra easdem connectit, eorumque externos apices ab invicem deducere videtur. Alia fibrilla cuti oppositi lateris implantata pro retractorio musculo habenda est.

Linguæ substantia carnosa, homogenea deprehenditur.



ACTI-

X I I.

A C T I N I A
D O L I O L U M.

Generis
nomina
varia.

 QUOD RONDELETIUS *Urticarum*, communi cum Me-
dusis hodie dictis, nomine vocitavit, animalium ma-
rinorum genus, nunc, ut est hodiernum Historiæ
naturalis fatum varias apud varios autores adpel-
lationes obtinuit. Præeunte primum HILLIO, BROWNE & BA-
STER *Actinias* illa vocaverunt. LINNÆUS aliquas eorum species
sub *Priapi* titulo obscurius descripsit. Et tandem *Dociissimus*
GAERTNERUS *Hydræ* nomen huic generi adpropriavit, & quin-
que ejus species elegantissimis iconibus illustratas descripsit (*Act.*
angl. vol. 52. p. 75.)

Divisio in
ACTINIAS
fixas,

In binas phalanges bene distingui poterit genus nostrum, cui
aptum & usitatius ACTINIÆ nomen servandum esse existimavi.
In prima *phalange* militabunt species eæ omnes, quæ lata basi
adglutinatæ & ano destitutæ, corpus breve, *molle*, tentaculis
coronatum exhibent. Harum quaternas species optime descrip-
fit Cel. GAERTNERUS, a quibus distinctissimæ binæ aliæ in
mari Zeelandiam & Essexiam adluente dantur.

Et ambu-
lantes.

Altera *phalanx* continet species corio crasso & subcartilagi-
neo

neo vestitas, nec basi adfixas, sed in extremitate ori opposita ano instructas, quæque pedunculis, ad normam Echinorum & Asteriarum per totum corpus distributis, cornua limacum mentientibus obambulant. Talis est *Hydra corolliflora* GAERTNERI loc. cit. tab. fig. 3. Tale animal a PLANCO nomine *Echini coriacei* describitur (lib. de conch. minus not. ed. II. app. p. 99. cap. 6. Tab. VI. f. D. E. F.) Eodemque pertinet *Veretillum APULEJI* in *apolog.* quod *Priapum marinum* VALISNERI (Oper. tom. III. p. 442.), *Cucumerem marinum* BARRELLIER (icon. 1293. n. 2.), *Hydram* BOHADSCH (anim. marin. cap. 4. tab. 6.) & *Mentulam marinam* PLANCUS (lib. de conch. ed. II. app. p. 108. c. 17. tab. 8. f. A, B.) vocarunt, cujusque simile ex Oceano Antiguam Insulam adluente accepi, ubi a piscatoribus Anglis *Mentula marina* (*Sea-prigg*) vulgo dici solet.

Ad hanc *Actiniarum ambulantium* phalangem, quæ summam hujus generis cum *Echinis* atque *Asteriis* adfinitatem (a) efficit, numeranda pariter species, quam hic pro nova & a supra dictis distincta producam, & quæ inter *Hydram corollifloram* GÆRTNERI & *Echinum coriaceum* PLANCI medium sibi locum poscit.

Inter varia marina *Promontorio Bonæ Spei* in liquore spirituoso missa inveni aliquot *Actiniæ* hujus nostræ specimina, quorum

(a) Supra (pag. 73, 74.) quosdam ex mea sententia tradidi Molluscorum animalium *Ordines naturales*. Distinctus inter ibi constitutos Ordo & naturalissimus *Centroniarum*, prout l. cit. dictum est, confici posse videtur, e generibus *Actiniæ*, *Echini*, *Asteriæ* & nuper in mari detecto atque a GUETTARDO in *Aëtis Parisinis*, ELLISIOQUE in *Aëtis Anglicis* vindicato genere *Encrinorum*, quorum plus quam denas dari species ex petrefactis eorum articulis, sub. *Entrochorum*, *Asteriarum* & *Caryophyllitarum* nomine apud Lithologos notis, constat.

rum maximum erat , quod *Tabula nostra X.* exprimi curavi .
Vagam in mari vivere eam , ex structura minime dubium est.
Nec plura de ejus vitæ genere mihi constant . Structuram er-
go externam & internam adumbrasse sufficiat .

D E S C R I P T I O

A C T I N I A E D O L I O L I .

Tab. IX. fig. 10-12.

Corpus cinerascens , quinquelaterum , subdecaëdrum , postice adtenuatius , utraque extremitate truncatum (*fig. 10.*).

Latera corporis tria planiuscula , inæqualia ; bina subconfluentia , convexiuscula .

Anguli bini planioribus lateribus interjecti , prominentiores , obtusi , geminati , seu fulco longitudinali scabro canaliculati & vix conspicue porosi . Reliqui obsoleti , punctati *osculis* numerosis subpapillaribus , in quincunces inordinatus seu dupli or- dine dispositis , versus extrema corporis minoribus rarioribus que (*fig. 10.*).

Antica corporis extremitas (*fig. 11.*) calyculata *præputio* cu- taceo , tumidulo : cingente *discum* convexiusculum , medio *ore* perforatum , & in ambitu florefcentem brachiis decem parium .

Brachia oriuntur trunco singula brevissimo , carnosof , bipartito in portionem externam & internam , utramque multipartitam & quasi acinosam , seu villis fuscis confertissimis granulosissimam . Refe- runt

runt primo adspectu brachia vix prorumpentem & contractissimum Vitis florescentis racemum.

Extremitas postica (fig. 12.) truncato-excavata & foramine hiante ani pertusa est.

A N A T O M E.

Partium numerum & naturam eandem fere deprehendi, ac in *Mentula marina* s. *Hydra* sua descripsit BOHAD SCH. Cavum corporis liquore plenum erat.

Ingluvies ab ore incipit ampliuscula, intus rugosa, sensimque tenuior facta pergit in *intestinum* ampliusculum, fibris circularibus musculosum, in anfractus collectum mesenterio, per quod longitudinaliter adnectitur medio e tribus planis lateribus corporis. *Intestinum* definit in *cloacam* per amplam, posticam corporis cavitatem occupantem & undique per fibras, ut videtur, musculosas adnatam & distentam. Color intestini erat lutescens, totumque arena e miculis testaceis scatebat, qualem etiam in *Nereidis cylindrariæ Capensis* interaneis invenisse me supra monui.

Infra œsophagum innumera adhærebant *intestinula* filo crassiora, ad insertionem exiliora, teretia, lutea, serpentinis flexibus vaga, nec adnata, maxime in anticam cavi corporis partem collecta. Hæc forte digestioni necessarium liquorem parant.

Ab ingluvie oriri videbatur *vas* insigne, e tenui membrana albida factum, ramosissimum, dichotomice subdivisum, per totam corporis cavitatem distributum & extremis ramulorum coecis, obtusis passim fibris musculosis, involucro corporis applicatis intersertum. Non procul ab ortu *vesica* clavata, acumine nota-

ta, alba, huic ductui adpensa erat. Totus plenus erat liquore, qui in ramis passim coagulum pallidum deposuerat.

Simile viscus in *Hydra* sua invenit BOHADSCH sed multo minus ramosum, minusque prolixum. Pro ovario illud habuit, neque alienus sum ab ejus opinione.

Totius corporis involucrum seu theca e *corio* subcartilagineo, albido facta est; exceptis tantum area oris & præputio, quæ tenui membrana obducta sunt.


Interior corii facies ad quinos angulos exhibit adnatas *tænias* longitudinales atque, ut videtur, tendineas. Inter eas transversim tensæ corium stringunt *fibræ musculosæ*, justis interyallis distantes.

Quinæ præterea *fasciæ musculares* planæ, retrorsum adtenuatae, angulos longitudinaliter legunt prorsus liberæ & tantum postice adnatæ; antice inseruntur *coronæ*, officulis quinis planis, calcareis suffultæ, cui insident brachia animalis, quæque *lanternæ* in *Echinis* quasi analoga est, nisi quod amplior sit & dentes deficient, quibus ea in *Echinis* armata reperitur.

Fasciæ istæ recondendæ intra præputium coronæ cum brachiis inserviunt.



TÆNIA



X I I L

TÆNIA HYDATIGENA.

MIRABILEM Naturam Animalis, quod TÆNIAM HYDATIGENAM vocavi, a primæ inventionis tempore negligetam fere, hodieque vulgo ignoratam resuscitare & novis minutioribusque observationibus illustratam denuo evulgare neque scientiæ inutile nec injucundum curiosis fore spero. Præterquam enim quod vix existimem dari in rerum Natura animal, monstrosæ & singulari hujus nostri fabricæ ullo modo comparabile, nisi forte *Conchas anatiferas*, maximo musculofo intestino, aqua salsa turgido adpensas, citare velis; præterque lucem, quam generationi & mutationi Vermium viventium intra viventia, adferre poterit Tæniæ nostræ historia; nemo erit qui non evidentissimam observationum hic tradendarum utilitatem in theoria hydatidum elucidanda, & explicando maxime ortu cystidum solutis hydatidibus effartarum, perspiciat.

Priusquam proprias observationes enarrare adgrediar, videamus quæ apud autores passim circa Tæniam hydatigenam occurrent, & quidnam imprimis EDV. TYSON, hydatidum animata-

rum inventor, quique solus *Tysoniana* observata confirmavit,
HARTMANNUS prodiderint.

Autores varii. Ante *Tysonis* inventum, aut ejusdem certe ignari, Hydatides hasce vivas viderunt auctores varii, non tamen pro vero animali agnoverunt; non celebrarunt saltem. REDI (*opusculor. ed. belg. tom. III. p. 196. seq.*) in mesenterio *leporis* invenit vesiculas lucidas, oblongas, *candido acumine* seu corpusculo instratas, similesque sub peritonæo intestina obvolvente per alvum vagas, magnitudine varias, non tamen semine peponis multo ampliores; majores autem intra hepatis membranam & ipsum parenchyma.

Dein TH. BARTHOLINUS (*hist. anat. cent. II. 49.*) memorat hydatides in *Capreæ* hepate & mesenterio; aliisque alvi locis repertas, splendentes, fero falso seu mucilagine, instar vitrei oculorum humoris, plenas, aliamque præterea *flaventem substantiam* continentibus. Et HARDERUS (*apiar. obs. III.*) habet similes, in Epiplo *Hinnuli* subito extincti repertas, omnes liquore, ut dicit, non coagulabili plenas, & quasdam in duplicatura omenti libere fluctuantes.

Porro PEYERUS (*Miscell. nat. curios. dec. I. an. 7. obs. 206.*) refert ex vena Portarum *Porci* mactati, se intuente, prodidisse hydatidem mollissimam, pellucidissimam & *flavo crassoque vestigio* notatam. Denique STENONIUS (*Act. Hafniens. vol. I. n. 36. p. 68.*) in omento *Rhangiferi* morbo extincti inventas tradit binas, alteram gallinaceo, alteram columbino ovo parem, aqua purissima plenas; quarum majorem gryseam quandam materiam mole pisí exhibuisse, minorem vero in majore quasi prægnante contentam fuisse perobscure adjicit, monetque sibi tales hydatides pluries occurrisse & *Cervino* generi naturales videri.

EDUAR-

EDUARDUS TYSON Hydatides nostras invenerat primo in ^{TYSONIS} _{observata.} *ovium* morbosorum & hydropicorum cadaveribus, in *aliis* deinde animalibus & demum in dissecta *Gazella* ovum columbinum æquantes, adhærentes omento, inclusaque peritonæo, maxime inter vesicam & rectum. Is tunc princeps ab Hydatidibus ovariorum muliebrium, aliisque simplici tantum membrana gaudentibus, has, intra peculiares folliculos undique liberas, adeoque duplarem membranam exhibentes & præterea appendicula vermiculi habitum referente & vitam evidenti motu prodente singulares distinxit & *Lumbricorum hydropicorum* nomine salutavit. Observata TYSONI propria hæc fere sunt. Appendiculam seu corpusculum Lumbrici granulosum & annulosum describit, cœcoque velut ore in extremitate instructum esse dicit, e quo apex acutus pressione protrudi possit. Corpusculum illud ad ellychnii calorem vitæ evidentissima signa dedisse vidit. Docuit hasce vivas Hydatides membranaceis ventris partibus, v.gr. omento, aut peritonæo ventriculum, diaphragma, hepar, intestina obvestienti, inhærere frequentius, quam viscerum parenchymati inclusas reperiri. Intus ex corpusculo *filamentum duplex* oriri & in bullæ cavo fluctuare dixit atque *figura sua quarta* expressit, quod mihi nunquam nisi simplex adparuit. Conf. *Actor. anglic. n. 193. p. 506. seq.*

Tysonis vestigia pressit solus atque historiam hydatigenæ Tæ- HART-
niæ satis fuse prosecutus est PHIL. JAC. HARTMANNUS Medicus MANNI
Borussus. Invenit is hydropicos *Tysonis* Lumbricos (quos in ta.
tepida aqua evidenter moveri & bullæ membranam crispare vi-
dens, pro veris animalibus afferere minime dubitavit,) pri-
mum in *Capreæ* ascite mortuæ omento macro, tenuissimo-
que, majoribus venis vicinos, intra proprios folliculos ex peri-
tonæo factos. In eo cadavere vidit binas interdum hydatides
eodem folliculo contineri, quandoque & simplicem bullam cor-
pusculis

pusculis binis, velut axibus, instructam fuisse; lympham autem in omnibus invenit limpidissimam nec coagulabilem. Alia deinceps *Caprea* dissecta HARTMANNO exhibuit hydatides similes venis circumtextas, at lympha iisdem contenta plus minusve sanguinolenta fuit. Monet bullarum nonnullas moleculam velut adiposam, latam, utroque extremo acutam continuisse; alias minorem cum sua bulla Tæniam; quod ultimum adeo paradoxum mihi videtur, ut nunquam credam nisi postquam meis oculis video Tæniam hydatigenam prægnantem, idque in tanta earum copia a me perlustrata nunquam contigisse miror. Et quamvis simile quid STENONIUM observasse ex supra allegato obscuro loco elici posset; tamen eum de folliculo hydatidem ipsam continente locutum fuisse verosimilius est. Aliud HARTMANNI, de quo subdubito, illud est, quod in *Bovis* non hydropici pulmonibus veros (ut vult) *Lumbricos hydatoideos* invenisse se dicat, quinquagenis plures, nec pauciores in hepate & quosdam in diaphragmatis superficie. Scio equidem frequenter in *Ruminantium* pulmonibus & hepate folliculos undiquaque solutos, lymphaque turgidissimos reperiri, de quibus postea fusius dicam; verum hos Tæniæ hydatigenæ originem suam debere, ægre ut credam induci potero, cum adeo diversi sint figura & natura tota. Adlatæ HARTMANNI observationes exstant in *Miscell. nat. cur. dec. 2. an. 4. obs. 73.*

Tænia he-
patis mu-
rini ob-
servata.

Idem postea in *Ovibus* quoque Tæniam hydatigenam inventit & in citatorum *Miscell. dec. 3. an. 2. obs. 193.* refert, in *Mure* foeta sibi oblatum fuisse folliculum, prope cardiæ per diaphragma transitum enatum & molem fere ventriculi animalis æquantem, in quo invenit *Lumbricum capite*, ut sunt ipsius verba, *lunato*.

Similes in *Murium* hepate Tænias inventas, at pro hydatigenis

genis non agnitas prodiderunt, primo RUY SCHIUS (*obs. anat. IX.*
ad calc. Diff. de valvul. Operum vol. I. p. 17.) in pendula e cavo
 hepatis vesicula repertam, spithameam, quam in *Thef. anat. II.*
aff. 5. n. V. 1. describit straminis latitudine, albam, digitalem,
 figura vulgaris Tæniæ. Deinde FRISCH in *Miscellan. Berolinens.*
Tom. VI. part. I. pag. 121. Neque non HALLER in *program-*
mate de calculis bilariis (*Conf. Opusc. pathol. p. 81.*) & VAN
 DOEVEREN in *Diff. de vermibus intestinalibus hominum. Lugd.*
bat. 1753. habitâl, a' Jos. ONYMO repertam & nuperrime *Ac-*
curatiss. D'AUBENTONUS, qui earum bonas exhibuit icones,
 in *Histor. natur. Buffonianæ vol. VII.* (*Edit. minor. vol. XV.*
p. 153, 154.) *Tab. XL. fig. 4, 5, 6.*

Et hæc fere sunt quæ apud auctores evidentius huc pertinen-
 tia reperiuntur, quibus proprias quasdam observationes olim
 in *Dissertatione Lugduni batav. 1760. edita* adjeci & hic plura &
 curiosiorem imprimis descriptionem iconibusque illustratam sub-
 jungam.

Crebras habui Tænias hydatigenas ex *Suum & Ovium* perito-
 næo; videntur enim in solo *abdomine* animantium hospitari, &
 nunquam hydatides pulmonum aliarumque extra alvum par-
 tium, vel mihi, vel aliis, quod sciam, Tæniæ vestigium exhi-
 buerunt. Laniones Germani Hydatides nostras vivas in quibus-
 dam magis regionibus, & imprimis æstivis mensibus abundare
 perhibent, adeoque a nimio æstu & fatigatione pecoris a potu
 venientis oriri autumant. In sanissimis æque ac hydropicis ani-
 malibus persæpe occurrunt, modo solitariæ, aut paucæ, inter-
 dum magno numero; Unde eas vix morbificas magis dixerim,
 quam solet esse Tænia aliive vermes, qui sæpe per totam vi-
 tam sine magno incommodo feruntur.

Continentur semper folliculis membranaceis, saepe vasculosis aut adipe striatis, inter peritonaei duplicaturas aut in ejusdem cellulosa, vel tandem a peritonaeo in sacculi formam producto factis, interdum e pedunculo vasculoso pendulis. Locus in abdomine incertus: sparsas invenias per omentum, per mesentrum, perque involucra intestinorum & abdominis internos parietes, praesertim circa venas; frequentissimae tamen sunt in omento.

Conditiones variae. In folliculis suis irregulariter sphæroideis aut subcellulosis, interdum bilocularibus, plerumque negligenter plenis, rarius turgidulis, natant Hydatides nostræ ab omni nexu liberæ, parco humore circumfusæ, ipsæ quoque vulgo flaccidæ, atque vix ultra dimidium capacitatis lympha repletæ. Hinc in plano positæ humili æqualiterque convexo tumore sese sustinent, fistulæ sphæroidem vitello ovi in patinam effuso paulo planiorrem. Inveni saepe in cystide mesaraica perangusta hydatidem primæ magnitudinis, sed parcissimum liquorem continentem, adeoque collapsam, ut vix angustum folliculi sui spatium bene expleret.

Singulæ plerumque folliculis singulis continentur, nec nisi semel in eodem sacco oblongo binas absque intermedio pariete inveni; quod & Hartmanno videre contigit. Rarius intra folliculum sanguinis guttulam effusam aut Tæniæ corpusculum sanguine tinctum, rarissime gelatinam flavam bullam incrustantem observavi. Lympha in folliculis recenter & dum calentis animalis e visceribus educuntur apertis vix ulla adest. At refrigeratae & moribundæ Tæniæ bullæ lympham suam transudat. Hinc in patella positæ Hydatides vivæ, proprio suo liquore intra breve tempus circumfunduntur, & intra folliculos quoque diu

diu relictæ maximam sæpe lymphæ suæ partem per poros emit-tunt.

Magnitudo Hydatidum varia est. In omento uno vigenis sæpe plures vidi, diversissimæ molis. Maxima earum magnitudo plerumque ea est, ut super manum positæ volam totam occuperent, imo excedant. Et in his corpusculum nunquam lenticula aut semine cannabis majus. Proportio ex *Tab. X. figuris 1-4* colligi potest, quæ, ut & *sexta* & *septima*, naturali dimensione dimidio minores sunt. Inveni autem in Porcellis asciticis & quandoque in Ovibus bullas nuce juglande minores, quæ plerumque corpora non minora, quam maximæ quas vidi, exhibebant. Quid quod sæpe mediocribus hydatidibus corpora majora fuisse vide-rim; qualem *figura 5.* naturali magnitudine refert.

Bullarum figura multis modis variat; corporum vix unquam. *Bullæ* modo æqualiter sphæroideæ sunt (*fig. 1.*); modo oblongo-ovales vel pyriformes (*fig. 4, 5, 6.*), imo nonnunquam longissimæ & lanceolatae fere; modo transversim ovales (*fig. 3.*) aut (majori gradu, utut rarius) transversim ellipsoideæ. Vidi & quasdam, quibus a folliculo subbiloculari figura obsolete cordata sive scrotiformis impressa esset. Oritur autem bulla a corpusculo vel sessilis i. e. statim in amplum expansa (*fig. 1.*), quod in sphæroideis & ovalibus vulgare est, sensimve dilatata (*fig. 5.*), quod ovalibus & lanceolatis fere solemne; vel *collo* pedunculata, in variam, sæpe insignem longitudinem producto (*fig. 2, 3, 6.*), eoque nunc tereti, qualem transversim oblongæ bullæ semper (*fig. 3.*) & sphæroïdeæ interdum (*fig. 6.*) exhibere solent, nunc sensim ampliato (*fig. 2.*); minus frequenter collum in oblongi intestinuli formam dilatum versusque bul-lam strictius (*fig. 4.*) reperitur.

Membrana bullam efficiens lactea est, subpellucida, fibris circularibus, prominulis ubique subtiliter annulata, aspectuque tenurima. *Striae* annulares bullæ plerumque evidentissimæ sunt; versus collum tamen seu corpus semper insigniores. An pro rugis tantum cutaneis, an vero pro muscularibus fibris sint habendæ, incertum. Rugis tamen hæ cutaneis Tæniarum potius analogæ videntur. In non omnibus hydatidibus fibrarum interiorum translucet species, quæ longitudinaliter vagæ, rete inordinatum conficiunt; prope collum insigniores, verosimilime *musculosa*. A radice colli vel corporis in latere superiori & inferiori per bullam decurrit lineola tenurima, undulata, pellucidior, veluti rhachis, quæ figuris non bene exprimi potuit, per breve modo spatium & in quibusdam vix conspicua. Totius bullæ membrana, utut adspectu tenurima, tamen tactu crassiuscula & cum mollitie duriuscula, tenax, at flexilissima & in universum vesicæ suillæ in aqua maceratae æmulæ substantiæ percipitur. Elasticitate quoque madidam membranam vesicæ æquat; siccata tenuissima fit & fere diaphana.

Contentus li-
quor.

Lympha, qua bullæ semiplenæ circiter esse solent, utplurimum limpidissima est; raro tamen exemplo flavescentia, rarissime sero-sanguinolenta mihi visa. Dissecta longitudinaliter bullæ membrana lymphæ albuminosa tenacitas, seque quodammodo sustinens, notabilis fit. Saporem lymphæ, subsalfo-albuminosum, fere insipidum percepi. Gelatinam, quamvis saepe parcissimam, certissime aliquam admixtam habet; quandoquidem, contra HARDERI, REDII & HARTMANNI experimenta humor adfusa bulliente aqua aut acido spirituoso liquore evidentissime lactescit & in nubeculas cogitur gelatina. Integra quoque cum contento liquore Hydatis, in spiritu quolibet suspensa, intus generat massam albissimam informem, tenaciusculam, polyposam fere, idque non raro insigni quantitate; qualem per-

mem-

membranam bullæ translucentem exhibit *figura sexta* ad
litt. b.

Bulla ex modo necatis animalibus recenter extractæ, intra Bulla vi-
folliculos suos e pellucente peritonæo factos, evidentissime mo-^{va.}
veri cernuntur. Folliculis exemptæ & in aqua præsertim tepi-
da positæ, violento peristaltico motu agitantur, qui regulari-
bus intervallis modo a corpore versus bullam, modo a medio
bullæ versus extrema, plerumque vero a posticis versus ante-
riora propagatur. Constringi autem bulla zonatim solet, &
tunc ante & pone zonam constrictam pars bullæ laxior in ru-
gulas longitudinales breves crispatur; ovales, imo sphæroideæ,
vivæ, sæpe oblongi intestinuli in formam gracilescunt, longitu-
dine vix mutata. Cuspide aut acido stimulatæ localiter con-
velluntur, & tum membranæ contracta areola opacescit ambi-
tusque ejusdem rugulis brevibus radiatus appetet, ut in motu
qui zonatim fit. Sponte quoque nonnunquam irregulares passim
areas constrictas videas, dum vivit Hydatis. Ubicunque agitatur
membrana, albescit seu opacescit & supra indicatum *rete* areo-
las suas contrahere videtur. Bulla integra in spirituofum liquo-
rem mersa in minorem molem irregulariter convellitur, ea sæ-
pe vi, ut, si liquore pleniuscula fuerit, rumpatur; In frigidam
non minus aquam subito immissa egregie contrahi solet. Col-
lum viva Hydatis, si is adsit, pariter constringere & dilatare va-
let. E quibus vita & musculosa textura dilatatae in bullam sub-
stantiæ fatis liquet.

Corpusculum seu ipfa Tænia hydatidem adpensam gerens in Corpu-
Vervecibus & Suibus, ut dixi, proportione bullæ perparvum ^{fculum.}
est (fig. 1-7.) & in vivis plerumque reperitur in perbrevem de-
pressamque moleculam contractum, apice seu capite, de quo
postea, adhuc subexerto. In refrigeratis vero semper api-

cem involutum & velut in sinum reconditum, & corpus in papillæ oblongæ crassæ aut noduli speciem contractum invenias. Singulari autem modo non in se redit apex, uti Limacum tentacula contrahi videmus; sed dum viva Tænia corpusculum in quantum potest brevitatem corripit, apex cum capitulo retrahitur, & rugis seu plicis lateralibus sese invicem supercendentibus obruitur rugaque extimæ arcte incubentes orificium cœcum, connivens contra directionem latitudinis corporis situm consti- tuunt (fig. 8.). Nec absconditum hoc modo Tæniæ caput in conspectum educi facile potest, nisi dum corpusculum aut bullam leniter comprimis, simul volvella plicas, imbricatum sibi superimpositas, leviter, cœcum orificium dilatando, patienter protractare & sic in intima velut pulsum apicem producere & liberare allabores; quo facto caput, intra apicem corporis seu collum retractum, leni compressione facile propellitur. Collum bullæ ipsum in hydatidibus pedunculatis saepè per introfusceptionem subvertitur, in modum digiti chirothecæ, vel ex parte, vel totum, ut corpus tandem intra bullæ cavum noduli instar ex subverso collo pendulum reperiatur. Quomodo hoc fiat explicari nequit; sed vidi collum in medio primum intussuscipi & sensim cum corpore absorberi. Si bullas in hoc statu inter utramque manum molliter & succussatim premas extroverti collum & corpus emergere solet.

Evolutum corpus teretiusculo depresso, figuram refert ru- diter lanceolatam (fig. 6.). Rugis indistinctis crebris annula- tum est & in apice terminatum capitulo, quale in omni Tæniæ specie, excepta Tænia vulgari (LIN. *Syst. ed. X.* p. 820. *sp. 2.*) observatum fuit. Hydatidis e vervecino peritonæo desumptæ, figuraque sexta propositæ caput *nona figura* exhibet: quatuor papillis nodosum est & rostello truncato, in vertice leviter excavato, uncinulisque reflexis, retractilibus coro- nato

nato definit. Semel in hydatide mortua, quam ex porcino mesenterio habebam, suspensa & vix compressa apicem corporis sponte exporrigi & caput protrusum fuisse vidi tale, quale figura 10. a. cum corpusculo naturali, & fig. 10. aucta magnitudine adumbratur, in eo nempe singulare, quod collo elongato, lineari & tereti insideret.

Dissectum corpusculum Tæniæ nostræ præter homogeneam & albam substantiam nihil exhibet. Intra bullam vero a corpusculo oritur principio infundibuliformi, non duplex filum ut TYSON voluit, sed simplex *stria*, chalazæ ovi mucoso adspectu, tenacitate, fereque figura subflexuosa, irregulari & subnodosæ similis, nonnunquam tæniolæ instar depressa, initio ut plurimum extenuata vel filiformis & extremo diffusior aut flocculenta. Hæc per microscopium visa homogeneæ itidem substantiæ videtur & in quibusdam, præsertim minoribus hydatibus, defuisse observata. PELLUCENTEM exhibit fig. 1 & 3, nudam vero, secta longitudinaliter bulla figura 7. ad littoram c. In viva hydatide, quantum quidem discernere potui, iners & sine motu hæc est.

Non raro in bullis uno, pluribusve locis alba glandulosa quasi molecula, membrana bullæ vix crassior &, glandularum Peyerianarum in intestinis more, explanata reperitur, vel solitaria, vel 2, 3, quatuorve in unum aggregatæ. A compositis aliquoties intra bullam, pendulum inveni chalazæ secundariæ quiddam simile, nodoso-subclavatum, cuius exemplum fig. 7. litt. b. exhibit. In eadem bulla, quæ huic iconi inserviit delineandæ, libera inventa fuit molecula informis (fig. 7. a.) adipis vervecinæ speciem habens; quod mihi semel tantum in tanto sectarum hydatidum numero apparuit. Semel & chalazam bullæ veram, ut hoc nomine *striam* supramemoratam adpellem, tali glandulae

læ quaternatæ & fere in oposito bullæ latere sitæ insertam, intraque bullam chordæ instar tensam inveni. An similis forte glandula insignior atque chalaza propria prædicta HARTMANNO bicorporeas Hydatides commemorandi ansam dedit?

Tænia hy- Egi de Hydatibus animatis in *Ovium* & *Suum* abdomen oc-
dat. mu- currentibus. In *Murium musculi* præsertim atque *Ratti* hepate
rini hepa- fæpe inveniuntur Tæniæ hydatigenæ, quæ bulla perexigua do-
tis. tæ , reliquo corpore vulgo omni respectu multo majori &
perfeſtiori insignes sunt. De causis quæ incrementum corporis
in his & bullæ in prioribus promovere possint nihil determino.
Forte huc facere videri posset, quod animalia ex ordine Gli-
rium parcissime aut vix unquam bibant.

Locus. In supradictis itaque e murino genere animalibus diffeſtis he-
par non raro *cystides* albas, globosas, steatomata mentientes,
proque tantillo animali prægrandes monstravit, plerumque fo-
litarias, nisi quod semel binas simul in *Muris campeſtris* foetæ
hepate viderim. In variis hepatis locis, alterutra ejus facie vel
inter lobos fitas invenias, parenchymati modo altius & non
nunquam fere totas, modo vix immersas, vasculis sanguineis
vulgo eleganter piętas. Hæ cystides peritonæo hepar vestienti
inclusæ esse aut videri solent. Semel tamen in *Mure Ratto* præ-
gnante cystidis, desuper hepati immersæ, membrana facili ne-
gotio deglubi ex hepatis fossa potuit, quæ nihil secius peritonæo
adhuc integerrimo vestita remansit, ut membrana Tæniam hy-
datigenam includens fossæ veluti adglutinata fuisse videretur;
in fundo fossæ hepatis insignis venæ portarum ramus, solo pe-
ritonæo tectus apparuit, nec tamen, preſſo hepate, ex vasculis
liquor ullus in fossæ cavum exſudavit.

Hæ murini hepatis Tæniæ folliculo, in quo violenter compactæ
funt

sunt; liberatae primum corpus versus anteriora in cucurbitæ seminis similem figuram, ovato-lanceolatam & in multam crassitatem abbreviatum ostendunt, caudam vero valde extenuatam & compressione velut exsuccam & marcidam, utpote quæ intra cystidem ut plurimum multoties conduplicata jacuerat. Aquæ frigidæ immissæ totum corpus in lanceolatam formam corripiunt. Verum in tepida maceratae in insignem longitudinem exporriguntur, vivo feruntur motu, innumeræque figuras adsumunt, omne corporis punctum contrahendo dilatandove. Tum quoque, minutum plerumque bullæ rudimentum, resorpta aqua repleri & notabile fieri, imo caudæ extenuata extremitas, bullæ proxima, in hydatidulas articulatim tumescere & moniliformis evadere solet. Habui ex Muribus Tænias ab unius pollicis ad semipedis longitudinem, ubi in aqua sese exporrexerant; & tantas saepe ex folliculis hepaticis piso non majoribus extraxi, quod stupendum videatur necesse est. Exporrectas tales Tænias *figura 12.* & *13.* exhibui. Præter linearem, antorsum latiorem & per reliquam longitudinem sensim adtenuatam corporis figuram, notabilis in iis est varia segmentorum proportio, caput & bullæ.

Corporis segmenta versus caput angustissima sunt & subtilissima transversis striis similia apparent; hinc justa successione sensim majora evadunt, usque versus medium longitudinis corporis; unde iterum, sed minus insigniter, decrescunt, ita, ut versus bullam multo majora sint, quam in anteriore Tæniæ extremitate.

Caput ex Tæniis hydatigenis murini hepatis, in quibus evidenter tissimum & omni ex parte nudo oculo conspicuum est, eo aptius describi poterit, quam in vervecinis aut suilliis. Tæniæ vivæ & adhuc contractæ caput in minimum nodulum collectum appetet. Sed

Y

in

in aqua tenuipa expansæ aut mortuæ partes omnes extrorsum rigent. Occurrunt tunc *papillæ* osculo hiantes *quatuor*; apparet ex intervallo papillarum ad surgens *rostellum* fere cylindricum, per breve, truncatum, cuius vertex discus est planiusculus & a centrali area in ambitu radiatus costis obsoletis, quas latentes in vaginis suis unguiculi, seu falculæ circumcirca per oram disci exferendæ, efficiunt. Rostelli itaque ora seu limbus subextenuatus, ubi falculas exseruit *Tænia*, ciliatus uncinalis appetet. Sunt spinulæ longiusculæ subulatae leviter recurvæ & reclinatæ. Hæc in mortuis *Tæniis* modo totæ & insigniter, modo vix exsertæ, interdum in vaginulas per discum rostelli dispositas totæ retractæ deprehenduntur.

Tænias
omnes ca-
pite gau-
dere. *Hæc*, nudo oculo satis bene discernenda, inspectio microscopi-
cica confirmat; & hoc est capitulum quo ad genus *Tæniæ* per-
tinere *Lumbricum hydropicum* docemur, quodque, quamvis

Tæniis denegaverit *Ill. LINNÆUS*, persuasissimus tamen sum unicum characterem stabilem generis præbere. In *Tæniis cucurbitinis* Canum intestina infestantibus illud multoties vidi; vi-
derunt & *TYSON* qui ejus figuram non pessimam dedit, &
ROEDERERUS in *programmate de Tænia*, & *ROSENIUS* in *Actis Holmiensibus*, nuperque *VAN PHELSUM* in *Traçatu belgico de Vermibus animalium*. *WAGNERO* etiam in *Novis litter. mar. balthici ann. 1699*, & *FEHRIO* in *Analect. de absinthio verum* caput hujus speciei apparuisse credibile est. In *Tænia vulga-ri* *LINNÆO* dicta a nemine visum invenio; neque mihi unquam integrum talem nanciscendi copia facta est. In *Tænia* vero *lata eleganter* descripsit illud *BONNETUS* (*Memoires présentés à l'acad. de Paris vol. I.*). Inque *Tæniola* sic dicta *canina*, centies mihi ipsi oblatum fuit caput. Obscurius inveni illud in *Tæniis pi- scium*, neque sic ut in reliquis speciebus efformatum. *Tæniæ nostræ hydatigenæ* e murino hepate depromptæ caput *T. cucurbitina*

bitinæ & canine simillimum habent. Idque naturali magnitudine figuræ 12. & 13. exhibent; aucta vero omnia fig. 11. a vertice & a latere conspicienda fistunt; ubi *bb.* papillas prædictas, *a.* vero rostellum radiatum denotat, quod in *T. lata* constanter deesse ex *Tæniis* equorum didici & in humanis hujus speciei observavit BONNETUS.

Bulla in Lumbricis hydropicis murini hepatis vestigium plerumque minutulum, collapsum & exsuccum occurrit; præferunt in majoribus. In variis speciminiibus ad variæ magnitudinis hydatidem auctam eam inveni. In *Mure* olim *terrestris* (LIN. *syst. nat. ed. X.* p. 61. sp. 7.) prægnante, duas in hepate cystides observavi pro animalis mole maximas, alteram sinistrius parenchymate circumfusam & in utraque superficie emergentem piso majorem; alteram in medio minorem superne emergentem. Ex majori secta prodiit vermis parvulus, vix pollicaris cum se se exporrigeret, sed hydatidem magnitudine fere pisi trahens; altera edidit *Tæniam* dimidio fere majorem, sed bulla multo minore præditam. In variis deinde variam magnitudinem notavi. Nuper in *Muris musculi* hepate inveni hydatidem fabæ fere magnitudine, cum corpusculo cylindraceo, vix dimidium pollicem æquante; & quod singulare fuit, rostulum propriæ adpensæ bullæ ita tenaciter infixum erat, ut nulla opera divelli potuerit.

Talis est in *Ovium*, *Cervini* generis *Suumque* peritonæo, & in *Murium Ratti*, *musculi*, *terrestris* atque aliarum forte specierum hepate, generata *Tænia* hydatigena; talem ego vidi. Qua ratione secundum in intimos & vasculis solis exhalantibus adeudos recessus cellulosi contextus perveniat, ignorare fateri malo, quam hypothesis ludere. Vermium intra animalia repertorum, *Tæniarum* præcipue & *Ascaridum* verus ortus si unquam, sa-

De Ver-
mium ori-
gine quæ-
dam.

ne non hypotheses fabricando aut ornando , sed per assiduas observationes perque experimenta nobis patescet. Quæ nuperi de eorum origine ex aquis , deque Tæniis in aqua reperitis docuerunt, non magis satisfaciunt, quam volitantia in aëre vel cibo admixta antiquiorum seminia. Et licet concedas LINNÆUM, GADDIUM in Suecia, UNZERUM in Germania, & VAN DOEVERENII atque TISSOTTI amicos veras Tænias in fontibus alibive reperisse , nec amore hypotheseos tales sibi finxisse ; hæ tamen prudentius ab animali quodam excretæ , quam elementi illius naturales incolæ dicentur. Si enim ex aquis in nostra corpora transferri debent, in aquis abundant & frequenter ovula aquæ admisceant necesse est. Verum rarissimæ sunt, quum paucis tantum supranominatis auctoribus, in tanta hodie sagacissimorum naturæ scrutatorum turba se obtulerint. Ascari des quidem lumbricoideæ quæ Piscibus, Avibus, Amphibiis, Quadrupedibusque communes sunt, aquarum potius incolæ dici possent, & tamen a nemine unquam extra animalium corpora, in quibus abundant, visæ. Tæniæ vero, si quadrupedibus ex aquis venirent, cur nulla in istis repertarum specierum pisces æque infestat? Qui Tæniis quidem frequentissime , ast specie diversissimis scatent.

Hydatides Dealia *Hydatidum* folliculo proprio inclusarum specie huc pauca singulares. In *Ruminantium*, *Bovum* saltē atque *Ovium*, hepate & pulmonibus non raro occurrunt tumores aqua turgidissimi, ad dūritiem usque, cum Tæniis hydatigenis minime confundendi. Hos, ut supra innueram, HARTMANNO imposuisse credo. Continetur *cavernis* prædictorum viscerum parenchymati insculptis, callosis, anfractuosisque & in miras figuræ atque directiones flexuosis. Totos sæpe pulmones talibus hydatidibus e parenchymate passim emicantibus quasi variolosos habui. Amplissimæ subinde reperiuntur. Plerumque aliquot uncias *lymphæ*

phæ limpidissimæ, prorsus non coagulabilis, faporis subfalsi, albuminosi, coërcent. *Cystis* lympham proprie continens, cavernæ visceris leviter velut adglutinata est, nequaquam tamen adnexa, sed undiquaque facili negotio separabilis. Figuram cavernæ, qua continetur, accuratissime exprimit, irregularēm, semper tamen subcapitatam seu ab altera extremitate, per ampla, in anfractuoso nodosam caudam gracilescēt, cujus extreum tenerrimum evadit ita, ut finis mihi obscurus semper fuerit. *Membrana* quæ hydatidem constituit alba, crassiuscula & lamellæ cartilagineæ, pertenui simillima est. Ei si vulnusculum infligatur, labia scissuræ illico & intense extrorsum revolvuntur, singulari elatere; & si cystidem longitudinaliter disseces, tota subvertetur. *Membrana*, in ampliori cystidis parte satis crassa, in opposita extremitate, ut dictum est, in tenuissimam laminam tenerascit. Hydatis integra ita violenter turget, ut compuncta lympham in plusquam pedalem columnam satis diu ejaculetur. Intus tota *membrana* velut *arachnoidea* tenerrima atque tenuissima vestitur. Hæc, agitatione in aqua, facile secedit, una cum moleculis crebris oblongis, subglobosisve, albissimis, quibus tota sparsa est, quæque eidem leviter tantum inhærent. *Moleculæ*, si lente inspicias, singulæ ex atomis innumeris, oblongis compactæ, horumque atomorum substantia iterum globulis, non composita, sed sparsa seu punctata, appetet. In visceribus hujusmodi hydatidum vi obsessis reperias steatomatum similes cystides, quæ apertæ membranam cartilaginosam, in minimam molem complicatam & compressam, hydatidis olim ruptæ reliquias, tanta vi coercent, ut ea per factam aperturam illico protrudatur.


Hæ in Ovium Boumque pulmonibus & hepate Hydatides frequentissime occurrunt. Et in homine quoque reperiri

solent (a). Eas a Tænia nostra hydatigena ortum ducere, non pertinaciter negem quidem, ita tamen omni respectu alienæ sunt ab hujus fabrica & natura, ut mihi ne minima quidem inter eas necessitudo intercedere videatur. In eo tamen, quod utraque propria nullibique adnata membrana gaudeat, inter se conveniunt & ab hydatidibus in multis aliis animalium partibus ori-ri solitis, *Hydatidibus v. gr. cerebri, ovariorum, placentæ* in ca-*su molæ vesicularis &c.* distinguuntur.

Circa Hydatides generatim sed præsertim circa solutas in ca-vernæ viscerum aut tumoribus externis interdum latitantes aut alvo urinave excretas, multa obscura Medicis enucleanda super-sunt. Ex iis quæ retuli, & ex observationibus quæ apud BID-LOUM, TULPIUM, inque monumentis variarum societatum pas-sim leguntur hoc saltem patet: multifarium esse ortum, mul-tifariam naturam tumorum lymphaticorum, qui sub generico Hydatidum nomine veniunt; & in certis visceribus, corporisque partibus certæ tantum speciei hydatides generari solere.

(a) Magnam cystidem in hepate Feminæ quadragenariæ, ubi dolorem acu-tum & tandem mortem causarat, observatam refert Chirurgus in *Phil. Tranſ.* vol. 43. n. 475. p. 305. Ex cavitate hepatis aquæ limpidæ 4 mensuræ efflu-xere, & contracta membrana *cystidis propriæ* & *non adhaerentis*, quæ antea aquam continuerat, dilatabilis, in fundo reperta fuit. Similes fuere Hydatides in he-pate juvenis 24 annorum, qui quadriennio tumore epigastrii laboraverat, in-ventæ a *Cel. DE HAEN rat. med. vol. II. part. 3. cap. 16. §. 2. (edit. leydenſ.)* p. 282. Membranam hydatidum comparat albumini ovi in patinam effuso & igne co-acto. Si hydatigenam nostram Tæniæ vivam in animalibus vidisset, non, ut fecit, generaliter & solita sua severitate, de sententia hydatides a vermibus de-rivante pronunciaſſet, *l. cit. p. 291.*





X I V.

PENNATULARUM B I G A.

PENNATULAS esse Zoophyta vaga, vario spontaneo motu progredientia, parenchymatosa, intra parenchyma Ova seu semen conficientia, & floriformibus organis ceu totidem capitibus atque osculis, obsita, *Accuratisissimi BOHADSCH & Incomparabilis* nuper ELLISII observata extra omnem dubitationis aleam posuerunt. Horum adeoque theoriam in edita haud ita pridem *Zoophytorum Enumeratione* adoptare haudquam dubitavi. Quas hic descripas & delineatas sistam, species Pennatularum eam theoriam præprimis illustrant. Pennatulæ penniformes enim, in pinnis successive excurrentibus, flosculos seu polypos ob parvitatem & situm minus distinctos monstrant, multosque incertos relinquent, qui visa & per pensa nostrarum Pennatularum structura, mox laudatæ-sententiæ tesseram haud cunctanter adjicient.

Pennatularum natura.

Utramque hic propositam speciem in memorato *Elencho Zoophytorum* p. 373. n. 220 & 221. breviter descripsi, ibique

que de altera monueram ab ELLISIO delineatam prodiisse ; quum jam Tabulæ huic operi destinatae magna ex parte æri incisæ essent. Et certe ut superfluam neglexissem ejus iconem, quam alterius speciei figuris adjici curaveram, nisi ELLISII icon multis , qui eum cum specimine meo contulerunt , nimis, quod vocant, durus visus fuisset. Minus feliciter enim hujus quam reliquarum *loc. cit.* propositarum, Pennatularum faciem Chalcographus expressit. Tabulam ergo , ut erat , adjeci. Neque actum egisse videbor, si præter iconem, adcuratam ejusdem Pennatulæ , descriptionem hic inferuero ; cum aliqua ab ELLISIO non observata occurrerint , & notabilis imprimis ossiculi defectus.



I. *PENNATULA CYNOMORIUM.*

Auctores apud quos occurrit. *Celeberrimus ELLISIUS in Actor. anglicor. vol. LIII. p. 434.* Pennatulam nostram optime comparavit Cynomorio , plantæ anomalæ, cuius illa habitum egregie exprimit. Inde origo nominis trivialis, quo hic & in *Elencho Zoopbytorum* usus sum. ELLISIUS ipse *Pennatulam digitiformem* vocavit & icones ejus in *vol. cit. tab. 31.* adjecit.

Videtur nostram quoque Pennatulam RONDELETIUS indigicare voluisse , ubi in *Histor. aquatil. edit. Lugdunens. 1554-55. fol. part. II. p. 130.* *Malum insanum marinum brevissimis verbis & rudi icone* depingit. At in nullo præterea auctore quidquam de ea proditum invenio.

Patria hujus Zoophyti Mare est Mediterraneum. Specimina Patria & duo, quibus pro iconē & descriptione adornanda usus sum, ex eodem mari adlata, una cum sequentis speciei aliquot individuis, aliquoties jam laudatus *Expertiss.* VAN HOEY suppeditavit.

Pennatulam nostram vivam locomotiva facultate gaudere & corporis saltem eam partem, quam stipitem voco, vermiculari motu agitare probabile est. Hoc solo momento ab *Alcyoniis* differt, quibus alias, defectu ossiculi, propinquior est, quam congeneres omnes.

Flosculos singulos motum voluntarium proprium in vivo Zoophyto exercere, docent varii eorundem in hoc uno specimine status, e quibus simul ratio, qua se intra parenchyma recondunt, discitur. Tubus nempe primo in rugas contrahi occipit, & simul extremitate paululum in se redit, ut Limacis cornua solent; demum radii s. petala intra inferiorem partem tubi ceu intra vaginam, & cum hac ipsa vagina intra parenchyma retrahuntur, ut extus tantum *plana papilla* osculo stellatim rugoso centrata supersit. Exsertus præterea polypus tubum & tentacula pro lubitu extendere aut contrahere, atque haec latiora angustiorave reddere valet.

D E S C R I P T I O

P E N N A T U L A E C Y N O M O R I I

Tab. XIII. fig. 1-4.

Longitudo Zoophyti in uno specimine erat *quatuor pollicum*;

cum; crassities quæ medii digiti ad metacarpum. Alterum $3\frac{1}{2}$ pollices longitudine & unum pollicem crassitie æquabat.

Corpus cylindraceum, altera extremitate retusum, altera conico-adtenuatum, subacutum.

Adtenuata extremitas ultra tertiam totius longitudinis partem (circiter $1\frac{1}{4}$ poll.) lævis est atque longitudinaliter rugosa (fig. 1. a-b.). Hanc stipitem vocare posse.

Reliqua Zoophyti pars (fig. 1. b-c.) ubique punctis confertis prominulis, linguæ humanæ ad instar, teneriter papillosa est; quæ versus stipitem puncta rarescunt.

Flosculi per papillosam Zoophyti partem sine ordine sparsi, passim crebriores, magnitudine diversi, plerique tamen subæquales. Omnes, ubi exserti, versus retusam extremitatem vergunt (fig. 1.). *Tubus* flosculi exserti (fig. 3, 4. aa.) intestiniformis, longitudine ad summum 4-5 lin. æquat, extremoque circa osculum stellatus est laciniis octonis, non penitus discretis (fig. 2 & 3, 4. bb.) *Laciniae* (3 ad $3\frac{1}{2}$ lin.) in setaceum apicem adtenuatae, planæ sunt, bifariam profunde serratae seu pinnatifidæ, denticulis versus apicem inclinati. *Os* inter petala s. lacinias papillare, ubi contractum; alibi scyphi fere forma patens atque intus rugosum.

Color totius Zoophyti pallidus; at a spirituoso liquore forte alteratus fuerat.

Parenchyma Zoophyti molle, fibrosum, cavernulis oblongis, singulis flosculis respondentibus cavatum. *Cavernulae* scatent *globulis*

globulis corporis substantiae concoloribus, papaveris grano minoribus; qui forte *ovula* sunt. *Officulum* intus nullum; verum ligamentum quoddam in axi longitudinale. Substantia fibris creberrimis subtendineis, ad axin perpendicularibus intertexta. Totam Pennatulam, quanquam diu spiritu servatam, satis mollem deprehendi.

Flosculorum tubi longitudinaliter aperti cellulam rugosam ad os, & fila aliquot longitudinalia, moniliformia, flavescentia exhibuerunt.



2. *PENNATULA PHALLOIDES.*

Hujus Zoophyti patria est ultimus Orientis Oceanus; plura Patria, enim simul specimina missa, in nitidissimo *Museo* DN. VAN HOEY prostant, quorum maxima duo ad descriptionem adhibui, alterum $4\frac{1}{2}$ ". alterum $6\frac{1}{2}$ ". longitudine æquantia.

Ad præcedentem speciem figura & structura proxime accedit hæc, & Zoologis hucusque prorsus ignota manisit. Plures dari species Pennatarum istis forma subsimiles, vix dubito. Huc enim referendum esse credo corpus, cuius JONSTONUS (*lib. de pisc. tab. 8.*) sub *Amphisbæna marinæ* nomine, exhibuit iconem, ex eo, ut videtur, in *SEBÆ thesaurum* (*vol. I. t. 90. f. 3.*) translatam. Idem JONSTONUS *lib. de Serpentibus p. 25.* ex GESNERO neque ipso autopta, de eadem, vel subsimili *Amphisbæna marina* refert, eam in Mari Anglico captam fuisse atque exhibuisse capita duo simillima, quatuorque fascias longitudinales

nales rubras, in quibus flosculi Pseudosycomori similes essent dispositi.

D E S C R I P T I O

PENNATULÆ PHALLOIDIS

Tab. XIII. fig. 5-9.

Corpus subcartilagineum, cylindricum, obtusissimum (*fig. 5. b-c.*) leviter adtenuatum in *stipitem* (*a-b.*) mollem, vacuum, corpore fere longiore, scabriuscum, apice subclavatum, obtusumve.

Superficies corporis seu partis flosculiferæ adspersa *punctis* minutis, prominulis, crebris, & *osculis* papillaribus, sine ordine positis, a stipite aversis, equibus exseruntur flosculi. Puncta osculaque versus stipitem sensim rariora evanescunt.

Flosculi seu polypi exigui; *tubus* (*fig. 8. a.*) brevis, cylindricus, coronatus *filamentis* (*fig. 8. b & 7.*) octonis, fluitantibus, bifarium dentatis seu pennaceis, longitudine ad summum 2 linearum.

Color totius Zoophyti, in liquore servati, maximam partem cinerascens; isque naturalis videtur.


Substantia corporis optime comparabilis consistentiæ glandularum conglomeratarum seu *Alcyonii lobati* (*Elench. Zooph. p. 351. sp. 205.*) *Cavernulae* osculis polypiferis respondentes (*fig. 6.*) magnæ, inæquales, oblongæ, ad axin leviter inclinatae, refertæ mo-

moleculis globosis flavescentibus. Exterius præterea punctis superficie respondentes *striæ* ad axin perpendiculares in substantia notabiles sunt. *Stipitis* substantia musculosissima, cava, versus apicem extenuata, ex fibris maxime circularibus facta.

Officulum (fig. 9.) in media substantia longitudinale, quadrangulo-depressum (fig. 9. a.), planilaterum; obtusiore extremitate ad retusum fere corporis finem pertingens (fig. 6. c.) adternuatiore extremitate intra stipitem cavum inferitur, laxioribus ibi factis periostei vaginis loricatum (fig. 6. a.), multoque brevius est stipite.

Polyporum tentacula intra tubas ceu in vaginam retracta; cum tubis in cellulas redeunt; tumque oscula rugose contracta superesse observantur.





X V.

A N O M I A R U M

B I G A.

 *NOMIARUM* familiam satis numerosam esse ex petrefactis earum reliquiis constat. Paucissimæ tamen hucusque per recentes testas innotuerunt. Hinc operæ pretium erit, si earundem interdum specimina ex Museis huc introduxero. Complures enim apud Belgii Curiosos latent.

Hoc nunc loco primum binas proponam species, quarum *prior*, omnium adhucdum cognitarum facile maxima & crassissima, ex *Orientali Oceano* præterito demum anno in Belgii Musea delata & Balanorum majorum fragmentis adhærens reperta fuit; *altera* in *Maris Mediterranei* antiquis Coralliis non infrequenter occurrit.



I. A N O M I A R U B R A.

Tab. XIV. fig. 2-11.

TESTA crassa, variabilis, modo suborbiculata (*fig. 2, 3, 4, 9, 10.*),

9, 10.), s^epe fere semiorbiculata (*fig. 5. 7. 8.*), versus marginem imbricata, convexe porcata, striis ad nates non concorrentibus.

Valvula inferior gibba, postice late excisa & ad cardines oblique detrita (*fig. 8. 10. 11.*); superior (*fig. 2. 5. 7. 8.*) minor, planiuscula, antice devexa, postice truncata, margine fere rectilineo.

Furca intus in valvula planiore ex trabeculis linearibus, planis, tenuissimis, truncatis, recto angulo divergentibus (*fig. 8. a.*)

Cardo consistit in denticulo utrinque ad incisuram valvulae convexioris obliquo, obtuso; quem planioris valvulae utrinque fossula recipit.

Color testae intus albus, externe plerumque ruber, ambitu saturatior, basi albicans; in quibusdam, præsertim junioribus (*fig. 11.*) ex rubente albus.

In paucissimis & saturatissimi coloris speciminiibus porci longitudinales scabri sunt, maxime in valvula gibbosiore (*fig. 9.*).

Vitia exesarum aut læsarum testarum non raro in hac specie occurunt (*fig. 9, 10.*).

ANIMAL totum fere situm est inter furcam atque foramen cardinibus interjectum, clausum cartilagine qua testa adnascitur rupibus aliisve. Testa intus periosteo obducta; & furca obiecta est ab animali plicam

plicam ibi transversam efficiente, pone quam magna *oris* apertura, (binis quasi circuli segmentis inclusa), hiat.

Furcæ extremitati imposta utrinque *branchia* lunata, pilosum branchiis simillima; hæc postica curvissima extremitate ante *oris* aperturam corpori incumbit, altera libera versus testæ aperturam prominet. Constant branchiæ singulæ ex *arcu* carnofo, externo s. convexo latere *fibris* planis, parallelis, flexilibus, longissimis confertim barbato s. fimbriato.

Musculi subtendinei valvulas colligant trium parium. Primum (fig. 8. b.) e sinu valvulae convexæ ortum, prope posticum marginem planioris testæ in medio inseritur. Alii conici, duum parium, ex planiori valvula pone furcam orti, oblique in sinum valvulae convexioris implantantur. Horum furcæ propiores maiores sunt.

Interjectum tendinibus *intestinum*, compresso conicum, angulofo facco valvulae planiori insitit, œsophagumque recipit, totum materia quadam nigra circumdata.



2. ANOMIA DISCULUS.

Tab. XIV. fig. 1. a-g.

TESTA magnitudine ad summum unguis digiti medii, lutescens, fragilissima, tenuis, semiorbiculata (fig. 1. c. d. e. f. g.), planiuscula (a. b.), postice truncata.

Valvulae æquales, striis teneris scabriusculis longitudinalibus &

& sulcis exilibus, æquidistantibus, concentricis obsolete clathratae; intus granulosæ.

Valvula inferior (*litt. d. e.*) paulo convexior, extus obsoletius striata & intus tantum margine granulosa, postice (*litt. e. b.*) incisura circulari hiat & detrita est.

Superior valvula (*litt. c.*) convalle obsoleta, longitudinali sæpissime lubbiloba atque intus per totum ambitum seriatim granulosa (*litt. f. g.*).


Furca curvula, e lamellis 2 erectis, crassiusculis, informibus facta (*litt. g.*).

ANIMAL (*litt. f.*) fere ut in præcedenti; at branchiæ elegantes, subfultæ arcu albo, calcareo, extus scaberrimo & palati piscis instar stridulo, si acu tangas.



A a

D E



chido autem nihil non oligat (a. 1711) et idem obversus
(a. 1711) et idem via yedigum ex hoc etiam modis
XVI. ex dell' Indio 5 milioni

DESCRIPTIONES

INSECTORUM.

DER PAUCA hoc volumine Insecta propono, quamquam innumerā in promptu sint, quorum amplam messem in proximo *Fasciculo Miscellaneorum* Lector inveniet. Præter *Cicadam globuliferam*, rari aut ignoti nihil inter Insecta *Tab. XIV.* delineata occurrit. *Acarum marinum* quem olim genere distinguendum putaveram & *Polygonopi* nomine salutaveram, post *STROEMIUM* (*sundmor. p. 209.*), *BRÜNNICHIIUM* (*entomolog. p. penult. tab. fig. 4.*) & *BASTERUM* (*opusc. subsec. tom. II. lib. III. p. 140. tab. 12. fig. 3.*) describo. *Oniscorum* aliquot species ideo adjevi, ut *Pulices aquaticos* (ad genuinum genus tandem revocarem & novam eorum speciem illustrarem; itemque ut corrigerem denominationis a me mutatae adlicationem, quæ in *Celeb. GRONOVII Zoophylacium* nescio quo fato alienæ speciei adjecta fuit.

Oniscorum duum vulgarium descriptiones non potui omittere,
quum

quum casu æri incisi essent. At plures hujus generis & rariores species proximo fasciculo sistam.



I. CICADA GLOBULIFERA.

Tab. XIV. fig. 12-15.

Insectum mole exiguum, structura vero admirandum e Thesauris *Viri amplissimi* DN. GEVERS *Urbis Roterodamenis Consulis*, defumtum & *fig. 12.* naturali, *fig. 13.* autem aucta magnitudine expressum est.

Moles dupla vel tripla pediculi. Corpus totum atrum; pedes lutescentes, alæ (fig. 15.) hyalino albidae, venis testaceo nigris.

Caput exiguum, conicum; apex coni productior, crassescit & exserit *spinam* longissimam (dimidia longitudine insecti), supra dorsum recumbentem, hispidulam, setaceam, & *pedunculos* quatuor, quibus insistunt *globuli* singuli, sphærici, hirsuti. Horum duo ad latera & duo deorsum directi sunt; posteriorum globuli mutici sunt, priorum vero exserunt *spinam* setaceam, apice subtilissimo uncinolorum pare terminatam (*fig. 14.*). Totus hic apparatus corneus & ater est; lanugo globulorum canescit.

(~~CONTINUITATIS~~) ~~ET~~ ~~CONTINUITATIS~~ ~~ET~~ ~~CONTINUITATIS~~

2. *ACARUS MARINUS*
SEU *POLYGONOPUS*

Tab. XIV. fig. 21-23.

Rostrum (fig. 23. a.) e basi crassa adtenuatum, extremitate cylindracea, obtusa, perforata.

Segmenta corporis quatuor (fig. 23. d.d.). Tria prima singula utrinque producta in cylindrum brevem, (quibus pedes insident), desuperque notata tuberculis tribus acutis, uno in medio & utrinque supra cylindricum processum uno.

Articulus primus antice auctus *collari* quodam (fig. 23. c.), quod basin rostri efficit, quodque a dorso (fig. 22.) notatum est tuberculo fusco, subdidymo, pro oculis a BRÜNICHIO habito.

Postremum corporis segmentum itidem trituberculatum, truncato-subbipertitum, inter posticos pedes exserens *stylum* (fig. 21, 22 & 23. e.) cylindraceum, truncatum.

Pedes octo (fig. 21, 22.), postici paulo minores, omnes nodosi, septemarticulati. *Articulus basilaris brevis*, crassissimus; proximi duo brevissimi, gibbi; quartus longior, crassiorque; quintus & sextus minores, subæquales; ultimus subulatus & unguiculatus.

guiculo præfixo acuminatus. Pedibus quandoque Sertulariarum primordia (fig. 22.) innata inveni.

Collari subtus insident *antennulae* (fig. 23. b. b.) lineares, pedibus multo exiliores, at compositione & numero articulorum si-millimæ &, ut illi, uncinulatæ. Hæ quandoque deficiunt & profexus nota distinctiva a BASTERO non ita male habentur.



Non intelligo cur *Cel. BASTERUS LINNÆUM* reprehendat, *Pediculum Ceti MARTENSIANUM* Oniscis adnumerantem. Animalculum nostrum ab *Oniscis* diversissimum est, & pedum imprimis numero isti generi adnumerari certe nequit. Verum *Pediculus Ceti* numero pedum & struētura tota *Onisco anomalo* Tubulariam muscoidem infestanti, a BASTERO *opusc. subsec. tom. I. lib. I. tab. 1. fig. 1, 2.* primum delineato adsociari debet, & ab Insecto nostro distinctissimus est.

Doctiss. BRÜNNICH Insectum nostrum ab omnibus reliquis Apterorum generibus diversum censuit, & *Pycnogoni* nomen eidem indidit. Mihi vero omnino *Acaris* adnumerandum videtur, cum, præter octonus pedes, antennulis instructum sit & *Acaris* quibusdam struētura & habitu persimile deprehendatur. *Acaris* certe magis ad fine erit, quam *Phalangiis*, quibus a STRÖMIO accensitum fuit, cui (*l. supra cit.*) *Phalangium littorale* appellatur.

Piscibus adhærere Insectum nostrum verosimile est. Interrogati tamen a me Piscatores expertissimi illud ignotum sibi esse responderunt. Reperitur saepe mortuum in littore Belgico, inter varia maris purgamenta.

ପଦ ହାତ ହାତ

3. ONISCORUM CANCRIFORMIUM

S P E C I E S.

III. LINNÆUS *Cancris* adnumeravit, Cel. GRONOVIVS *Squillarum* titulo recensuit Insecta duo sub *Pulicum aquaticorum* nomine notissima, quæque corporis compositione, numero pedum & antennarum, totaque fabrica ad *Oniscos* pertinent, singularem eorum familiam constituunt, & *Onisci cancriformes* vocari possunt.

1. **ONISCUS PULEX**, *compressus pedibus quatuor anticis cheliformibus*. Cancer Pulex LIN. *syst. nat. ed. X.* p. 633. f. 56. Vermis cancriformis FRISCH. *inf. VII.* t. 18. Squilla ROESEL. *inf. III.* t. 62.

In lacubus fluminibusque aquæ dulcis, in lacubus salmis, inque ipso mari, sed rarius, reperitur, quisquiliis variis & rimis ubique se inferens, lucis amans. Nullibi numerosiorem vidi quam in topho cavernulofo lacus subsalsi qui prope Rockanje in Belgio est. In maris littoribus Junio Julioque parvos abundare observavi; parvi quoque Julio mense in lacu supra dicto fere soli reperiebantur. In spiritu vini rubri fiunt; vivi albo cinerei, vel pallescentes, juniorum nonnulli luteo-fusci. FRISCHII & ROESELII icones certissime unam eandemque speciem exprimunt quamquam ad diversas a LINNÆO citatæ. RAJUS quærit (*hist. insect. p. 44.*) an a *Pulice marino* differat *fluvialis*, quem invenisse se dicit in aquis calidis *Custozae* prope *Vincentiam*, ubi animal præterea nullum vivit.

2. **ONI-**

2. ONISCUS LOCUSTA, *compressus, chelis nullis, pedibus secundi paris marcidis.* Cancer Locusta LIN. syst. nat. ed. X. 634. sp. 57. SCOPOL. ins. carn. p. 411. n. 1136. Pulex marinus Bellonii, Mouffeti & Gesneri. RAJ. ins. p. 43. DODON. pempt. p. 476.

Hujus icone bona adhucdum caremus, ideoque *Tab. XIV. fig. 15.* eundem exprimi curavi. In maritimis Belgii vulgatissimus, rarius in fossis mediterraneis. Recedente aestu maris per littoris arenam saltabundus reptansve latebras quærit.

Pulice paulo major est & capite crassior. *Oculi* majusculli albi. *Antennæ* exteriores corpore vix breviores, extremitate hispidulæ; intermediæ brevissimæ. *Pedunculi* 2 crassi ad os. *Corpus* septem, *cauda* sex segmentorum, terminata stylis articulatis bifurcatis utrinque binis, & 2 inter hos minutis, simplicibus. *Pedes* octo, priores antrorsum versi; primi paris paulo crassiores; *secundarii* exiles, velut atrophia absumpti, mutici; duo proxima paria primis paulo minora. *Pedes* 6 postici retroversi, antepenulti brevissimi. Ad singulos pedes, exceptis primis, appendicula, secundariis pedibus subulata, reliquis omnibus oblonga. *Pedunculi* setacei sub cauda, ut in *Pulice*. *Color* albidus, linea dorsali fuscida. In spiritu vini etiam albidus manet vel cinerascit.

3. ONISCUS GAMMARELLUS, *compressus, pedibus secundi paris cheliformibus maximis.*

Hanc speciem Leydæ in horto suo, sub asperibus cum *Onisco Armadillo* mixtam quotannis Februario copiose observat Cel. GRONOVIUS, ab aqua longe remotam. Ego ad maris littora, sed rarissime inveni. Apud auctores nusquam occurrit, meruitque ideo *Tab. XIV. fig. 25.* delineari.

Media quasi forma huic est inter O. *Pulicem* & O. *Locustam*. Priore brevior, posteriore longior est ; capitis tamen exilitate huic similius. *Antennas* exteriore majoris habet utrolibet ; secundus earum articulus notabilis imprimis est, majusculus linearis, tetraedrus, superiori latere scaber. *Antennulae* intermediae minimae, ut in O. *Locusta*; cum contra in O. *Pulice* exteriore fere æquent. Evidentissimus character est pedum secundum par, *chela magna*, ventricosa, adactyla terminatum. *Pedes* quinti paris omnium brevissimi & cum sensim longioribus sex posticis retrorsum versi. Quatuor postica paria *femoribus* foliaceis, planis. In spiritu vini albet hæc species, at siccata ex cinereo rubescit.



Adfinis est *Oniscis cancriformibus* singularis species, cui *Onisci volutatoris* nomen dedi, quia in aquæ superficie singulari modo capite cum antennis prævio volutatur.

4. **ONISCUS VOLUTATOR**, *subcompressus*, *antennis exterioribus maximis*. *Astacus muticus*, *pede utrinque antico subulato*, edentulo, longissimo GRONOV. *Zoophylac. vol. II. p. 232. n. 989*. *Oniscus bicaudatus* LIN. *Faun. suec. edit. 2. n. 2062*. *Pulex marinus cornutus* RAJ. *hist. p. 43.*

Celeberr. GRONOVius ad hanc speciem nomen *meum* citare dignatus est. Aliquot nempe Oniscorum descriptiones & icones in litteris olim communicaveram. Erant inter hos, quem supra descripsi, O. *Locusta*, & hic nunc describendus O. *volutator*. Priorrem vocaveram (non *Astacum crassipedem*, sed *Oniscum* (crassicipitem) *cauda inflexa*, *pedibus secundi paris tenuibus muticis*. Hanc phrasin, nescio quo fato, ad O. *Volutatorem*, cui nullo modo convenit, excitavit Vir celeberrimus. Monendum hoc fuit, ne incuriae ipse accusarer a gnaris.

Oni-

Oniscum volutatorem inveni olim in fossis maritimis , prope *Harvicum* *Essexiae*. *Cel.* *GRONOVIUS* in fossis stagnantibus prope *Leydam* legerat. *Tabulae nostrae XIV.* fig. 20. a latere visum exprimit.

Corpus lineare , depresso , supra convexiusculum , constans segmentis 7 , posterioribus sensim majoribus , excepto septimo , denuo breviore.

Cauda subinfexa adtenuata segmentorum 6 , quorum 2 priora æqualia , tertium longiusculum ; & hæc tria subtus soliifera . Tria reliqua decrecentia , utrinque alata *stilis* singulis , priora bifurcatis , ultimum utrinque simplici . *Styli* caudæ fastigiati , ultimi articuli extrellum æquantur.

Caput corpore paulo latius . *Antennæ* (quas citato loco *Ill.* *LINNÆUS* caudas nominare videtur) exteriores maximæ , dupla fere longitudine corporis . Harum *articulus primus* brevissimus , *secundus* vix longior , sed ambo corpore crassiores ; *tertius* longus , crassusque , teretiusculo-turgidulus , supra longitudinaliter pictus fascia fusca , pallido marginata , in qua puncta obliquata pallida . *Articulus proximus* gracilior linearis , fascia fusca obsoletiore : *ultimus* subulatus , falculam pedis *Alaudæ* referens .

Inter antennas majores *antennulæ* corpore dimidio breviores , adtenuatae , compositæ articulis tribus , subtestaceis , quorum ultimus elongatur in filum trium articulorum longitudine , albidum .

Pedes septem parium ; *priores* 8 compressi , antrorsum versi , & ex his primi minores , secundi paris crassiusculi ; *posteriores* 6 retrorsum versi , patentes , gradatim longiores , dextrique multo longiores sinistris .

Color supra subgryfeus, fusco-nebulosus; subtus, pedesque albidus; foliola subcaudalia nigricant.

Longitudo corporis 3 $\frac{1}{4}$ lin. parif. caudæ paulo supra 2". antennarum 6".




Addendæ sunt descriptiones Oniscorum duorum, in *Tabula adjectorum*.

7. **ONISCUS CHELIPES**, *depressus oblongus, pedibus omnibus subcheliformibus*. Est hic Oniscus tridens SCOPOL. *inf. carniol.* p. 413. Asellus marinus cornubiensis RAJ. *hifl. inf.* p. 42. & forte Oniscus physodes LIN. *syst. nat. ed. X.* p. 636. sp. 4. Reperitur in Mari septentrionali, ad Angliam, inter Fucos; sequenti specie frequentior, in fossis itidem maritimis falsis Angliae & in Zeelandia quoque. *Tab. XIV.* fig. 16. eum a latere & fig. 17. a dorso visum naturali magnitudine depingit. *Corpus subsemicylindricum, semipollicare, segmentorum 7 subæqualium, quorum primum & ultimum paulo breviora. Cauda composita loriculis 3 subæqualibus & articulo terminali oblongo, apice obsolete tridentato. Caput corpore angustius; antennæ exteriores dimidio corpore breviiores, 5 articulorum, ultimo subulato longiori; antennulæ intermediæ minimæ. Pedes 7 parium, omnes compressi, longi, chelis monodactylis nec tumidis terminati, subæquales; sex postici tamen sensim longiores, retrorsumque versi. Cauda subtus, foliolo lanceolato exterius longitudinaliter adnato (fig. 16.) bivalvis, includens vesiculos cauda breviiores, oblongo cylindricas, obtusas, numerosas.*

8. **ONISCUS CONGLOBATOR**, *depressus ovatus testudinatus; cauda brevissima obtusa, foliolis lateralibus lanceolatis*. Hunc Oniscum asilum LIN. *syst. p. 636. sp. 1.* SCOPOL. *carniol. p. 414. Asellum*

lum marinum vulgari breviorem & latiorem RAJ. *hist. inf.* p. 43. vocarunt. Invenitur in Mari septentrionali ad Angliam, inque fossis maritimis. Formam exprimit *Tab. XIV. fig. 18* exporreti & 19. conglobati. *Magnitudo* fere *O. armadilli* (multo major in exoticis maribus,) membris similiter intra globulum loricatum latet, ubi mari extrahitur (*fig. 19.*). *Corpus* ovatus quam istius, anteriori extremitate nempe acutius. *Caput* latum, retusum, antice submarginatum; ocelli laterales globosi, nucleo nigro. *Antennæ* sub galeæ margine, capiti oppositæ, *superiores* paulo minores, articulo basiliari crasso, secundo longo tenui, extremitate setacea 4-articulata; *inferiores*, latitudinem capitis excedentes, articulis 3 imis crassiusculis, extremitatis ferrulatæ adtenuataeque novenis. *Os* dentibus lateralibus obtusis, labio superiore plano, mento *tentaculis* binis extremitate foliaceis. *Corporis loriculæ* octo imbricatae, maxime angulis marginalibus retrorsum productis; penultimæ hic angulus rotundatus. *Caudæ* segmenta 3 margine non producta ut dorsalia; horum corpori proximum paulo latius, 2 altera angustissima; extremitas semiovata, nempe ad corpus detruncata, extremo obtusa, utrinque adstantibus foliolis 2 lanceolatis. Abdomen macilentum. *Pedes* utrinque 7; 4 antrorsati, 3 reclinati, omnes testudinis margini adarticulati, sed femoribus introrsum versi, extremisque denuo extroversi uncinatique; primores breviores, paucioribus articulis, postici sensim longiores. In imo abdomine pedunculi 2 mutici breves. Sub cauda *foliorum* sex paria subovalia, introrsum vergentia, reclinata; quorum 3 priora fimbriata.

Huic persimilis est *Oniscus* a PLANCO in *Libri de conch. min. not. ed. II. append. tab. 5. f. A-B.* delineatus & p. 107. cap. 16. nomine *Asili marini* sive *Oestri* descriptus. Latitudo caudæ & magnitudo hunc fere sola distinguit.



X V I I.

F U C U S

A N O M A L U S.

Fucorum
summa di-
versitas.

PLANTARUM submarinarum numerosissimum genus sunt Fuci. Multæ eorum species Botanicos adhuc latent, ideoque forte est, quod cognitarum series nondum satis bene cohæreat. Quumque habitus & fructicationis conditio in diversis diversissima sit, fit ut primo intuitu in plura genera dividì debere videantur.

Vulgatissimorum & magnitudine insigniorum *Fucorum* substantia *coriaceo-cartilaginea* est & fructificatio! consistit in vesiculis muco & seminio plenis, quæ in superficie hiant poris simplibus, saepius penicillo filamentorum tenerrimorum seu pappo quasi quodam coronatis. Hi omnes disco explanato affixi radice carent, & ad instar *Lichenum foliaceorum*, quibus substantia & habitu summopere analogi sunt, per totam superficiem aquam sorbent.

Tales imprimis sunt *Fucus vesiculosus* (LIN. *Spec. plant.* ed. II.

II. sp. 2.) & pro ejus varietate a REAUMURIO perperam habitus *F. serratus* (*LIN. sp. 1.*) quorum specimina interdum *casu*, vel tota, vel *pro parte* spiraliter convoluta, a LINNÆO pro binis distinctis speciebus numerantur (*l. c. sp. 5, 6.*). Ambo isti, ut & *F. filiformis* HUDSONI (*flor. angl. sp. 27.*) a REAUMURIO graphicè descriptus, in apicibus frondium congestis folliculis fructificant & non e fructificationibus modo, sed per totam pa- sim plantam tenerrimis pappis efflorescunt, quos masculos esse flores quidam suspiciunt.

Talis etiam est *F. elongatus* (*LIN. sp. 9.*) apud HUDSONUM *F. linearis* dictus, ubique vesiculis in substantia nidulantibus, papiferis adspersus; cotyledone autem singulari, peltato, a Cel. SCHLOSSERO (*Gentlem. magaz. 1756. Februar. p. 63. c. tab. an.*) curiose observato notabilis.

Tales porro sunt, *F. filigrosus* (*LIN. sp. 17.*) & qui modo dichotomam, modo pinnatam divisuram servare solet *F. nodosus* (*LIN. sp. 11.*) subcaulescentes ambo & vesiculosas seminifluas in frondibus peculiaribus proferentes.

Sequuntur hos proxime *F. primo abrotanoides* LOBELII, qui LINNÆI, ni fallor, *F. concatenatus* est, quemque caudex ligneus, tuberosus, flagella ramosa vesiculis oblongis, fructiferis, vacuis varicosa proferens, singularem reddit; Deinde *F. natans*; *acinarius*, atque *turbanatus*, hisque ad fines qui ut iidem vere caulescant & distinctas habent frondes.

Pertinent huc deinde *F. cartilagineus* (*a*) *LIN. sp. 24.* cui extrema

(*a*) Sub Fuco cartilagineo LINNÆUS intellexisse mihi videtur speciem qua
Bb. 3 Pro-

trema ramorum passim in nodulum fructiferum intumescunt, *F. ceranoides* (LIN. sp. 3.) in media fronde natis tuberculis semen conficiens, *F. excisus* (LIN. sp. 10.) atque *verrucosus* (HUDSON. fl. angl. sp. 21.) strumifer uterque; itemque *F. furcellatus* (LIN. sp. 30.) qui *F. lumbricalis* ab HUDSONO vocatur, ob extrema vermiciformia muciflua, & demum *F. fastigiatus* (LIN. sp. 29.) vesiculas terminales, lanceolatas, longitudinaliter dehiscentes proferens.

Longum foret omnes Fucorum quoad formam & fructificationem varietates sigillatim heic enumerare. Dantur qui fronde membranacea, venosa constant, quorumque fructificatio ignota est, & habitus diversissimus; ut *F. rubens* (LIN. sp. 27.) *sanguineus* & *alatus* (HUDSON. fl. angl. sp. 32, 33.) Dantur qui membranacei sunt absque venis, uti *Agara RUMPHII*, *F. crispus* & *ciliatus* HUDSONI (fl. angl. sp. 28, 31.) atque *F. digitatus* EJUSDEM (sp. 41.) qui LINNÆO *Ulva Lactuca* dicitur. Dantur deinde, qui radice (b) ramosa a fucis reliquis omnibus diversissimi sunt, v. gr. *F. saccharinus* & *palmatus* (LIN. sp. 25, 26.). Sunt denique qui globulos vel pedunculatos pro fructu habent, ut *F. corneus* & *incurvus* (Huds. fl. angl. sp. 18, 38.) vel sessiles pilulas generant, ut *Fucoides varie dissectum rubens* RAJI (*Synops. pl. ed. III. p. 37.*) ad Capensem supra dictum s. *Cartilagineum* a LINNÆO citatum.

Sed

Promontorio B. Spei copiose adfertur, quamque delineavit SEBA *thes. III. tab. 102. n. 1, 2.* Synonyma vero a LINNÆO citata elegantissimam plantulam, sed specie diversissimam, significant in Mari circa Angliam copiosissimam, tenerime subdivisam & alterne pectinatam, rubri slavecentisque coloris, quæ instar conforvarum globulos nigros pro fructificatione habet.

(b) Vidi Fucum tali radice præditum, e mari Mediterraneo, rarissimum, referentem flagellum simplex, adtenuatum, coriaceo, cartilagineum, pollicis crassitie, aliquot pedum longitudine.

Sed ab his omnibus partium forma & compositione diversissima est *planta marina* ex *Mediterraneo* adlata, cuius hic adumbrationem proponam. Fucis tamen forsitan adnumerari debet. Etenim penicilli confervoidei, fructificationum terminales, pappis *F. vesiculosi*, *serrati* cet. analogi sunt. Non tamen video, cur non pro peculiari genere haberi posset, præfertim cum subsimilem ei plantulam nuperime delineatam dederit *Celeb.* *BASTER opuscul. subseciv. tom. II. lib. III. p. 127. tab. 12. f. 1.* tantum defectu pappi fructificationum diversam. Etenim tantundem sene a *Fucis* reliquis differt quam *Muscorum* plurima genera inter se Numerosissimum est *Fucorum* genus, & ideoque de Botanica merebitur qui illud constantibus characteribus in phalanges digerat.

D E S C R I P T I O

F U C I A N O M A L I.

Tab. XIV. fig. 24 a. & 24.

Stirpes filiformes, subsesquipedales, crassitie fili grossioris, inferne etiam tenuiores & vix conspicuo disco rupi adfixæ. *Rami* per totam plantæ longitudinem crebri, trifariam alterni & plerumque inordinatus subternati.

Rami inferiores breviores ac veluti marcescentes, circa medium stirpem longissimi (5-6 pollicum), superiores denuo breviores.


Substantia stirpis & ramorum tenax, flexilis, gryleo-virescens, sic-

siccatione luteo-grysea; extremis ramorum summisque ramis tenerior, albicantior.

Fructificationes per ramos trifariam alternæ, ternæ ubique subadproximatæ, erectæ, referentes Hypni antheram gracilem, inferius in tenuem pedunculum adtenuatam, apice obtuso efflorescentem in *penicillum* laxum, fluitantem, subviridem, e filamentis tenerrimis veluti confervoideis compositum, longitudine ipsius capsulæ. Penicillus in inferioribus marcidis ramis defluxit. Capsulæ in extrema ramorum parte & in summa stirpe tandem exilissimæ.

Figura 24 a. exprimit partem ramuli magnitudine naturali, aucta vero omnia fig. 24.

F I N I S.



TABU.

T A B U L A R U M

E X P L I C A T I O

T A B. I.

A NTILOPE *Grimmia*, a latere spectanda, pede altero sublato, velut inquieta.

E longinquo apparet GRUS *crepitans*, situ quiescentis.

T A B. I I.

APER *aethiopicus*, demisso capite adstans. Molem capitidis monstrosum icon non ad amissim exprimit. Oculos quoque paulo propiores inter se collocare debuisset pictor.

T A B. I I I.

CAVIA *capensis* naturali positu. Ore quamvis clauso, dentes tamen incisores duo superiores prominuli apparent, prout iconem indicatum est.

T A B. I V.

Viscera CAVIÆ *capensis*, ejusdemque & APRI *aethiopici*, ANTILOPES *Grimmiae* & VESPERTILIONIS *foricini* partes quasdam exhibet.

Fig. I. Ruditer a latere adumbrat dentes, quales apparent in corio capitidis APRI *aethiopici* præparato, quod in Museo SERENISSIMI PRINCIPIS servatur.

Cc

A.

A. Est dens superior, cuius sic basis antice ab inferiori adtrita optime apparet.

Fig. 2. Idem specimen a fronte inspectum.

Fig. 3. Cornua ANTILOPES *Grimmiæ*, a. ab interno, b. ab externo spectata latere, ubi adparet tractus longitudinalis, lævigatus.

Fig. 4. Proportiones & circumcæfuram capitis APRI *aethiopici*, desuper inspecti, lineamentis exprimit;

aa. Aures,

bb. Oculi,

cc. Sacci suboculares,

dd. Lobi zygomatici,

ee. Verruca utrinque ad rostrum,

ff. Dentes exserti superiores obtusi,

gg. Inferiores acuti,

Fig. 5. Dentes CAVIÆ *capensis* primores, supra bini, distantes, rotundati, infra quaterni, truncati.

Fig. 6. Pes ejusdem animalis *anticus*, a. desuper, b. a solea inspectus, quadrilobus, unguibus destitutus, sed notis supra lobo singulo impressis, velut unguium amissorum vestigiis, singularis.

Fig. 7. Ejusdem pes *posticus*, bifido-tridactylus, a. superne vifus, ut unguis interni digiti appareat, b. a latere terram spectante.

Fig. 8. Ejusdem *ventriculus* inflatus, a superiore latere vifus, ubi, præter fibras passim indicatas, adparet

a. Oeso-

- a. *Oesophagus reflexus*
- b. *Locus pylori,*
- c. *Duodenum extreum filo ligatum,*
- d. *Sinus magnus ventriculi,*
- e. *Insertio ductus choledochi,*
- f. *Insertio ductus pancreatici.*

Fig. 9. Coecum magnum CAVIÆ, in quo notanda,

- a. *Ilei insertio,*
- b. *Sinus coeci didymus,*
- c. *Cellula seu sinus solitarius, supra didymum,*
- d. *Initium Intestini spiralis, filo ligatum.*

*Fig. 10. Ejusdem animalis Intestinum spirale & bicornis, di-
verso adspectu sistit. In utraque figura significant*

- a-b. *Intestini spiralis curvaturas sesquiores,*
- c.c. *Cornua duo recti s. intestini bicornis,*
- dd. *Eorundem cornuum apices angustos.*

*Fig. 11. Ex eodem animali hepar tripartito-septemlobum, a
latere inferiori exhibitum.*

- a. *Lobus sinister,*
- b-c. *Portionis dextræ lobi duo,*
- d. *Lobulus Spigelianus,*
- e.f.g. *Media portio triloba.*

*Fig. 12. Sistit lienem CAVIÆ capensis, a latere quo ventricu-
culo adhæret.*

Fig. 13. Viscera uropoeïtica & genitalia ejusdem.

- aa. Renes,*
- bb. Ureteres vesicæ fundo inserti,*
- c. Vesica urinaria;*
- dd. Glandulæ suprarenales;*
- EE. Vasa spermatica,*
- ee. Testes,*
- ff. Ductus deferentes,*
- gg. Horum ductuum plexus, seu epididymis secundaria,*
- hh. Vesiculæ seminales;*
- i. Penis portio,*
- kk. Radices penis musculis circumcretæ.*

Fig. 14. Portio Tæniæ in CAVIÆ Capensis intestinis inventæ, ab utroque latere exhibita.

Fig. 15. Pediculus CAVIÆ a. naturali, b. aucta microscopio magnitudine.

Fig. 16. Caput VESPERTILIONIS foricini a fronte inspectum, ubi

- a. Folium nasale,*
- b. Labium inferius bilobum,*
- c. Lingua exsertam,*
- d. Auriculas indicant;*
- D. Auriculam naturali paulo auctiorem.*

Fig. 17. Linguæ extremitas ex eodem, a. superiori, hispido, b. inferiori a latere.

Fig. 18.

*Fig. 18. Dentes primores & caninos primarios ejusdem Ves-
pertilionis exprimit.*

T A B. V.

VESPERTILIO *foricinus* alis compositis repta abundus, naturali
paulo minor.

Adiecta est adumbratio volitantis, ut membranæ inter femo-
ra figura appareat.

T A B. V I.

SCIURUS *Petaurista* fig. 1. a dorso inspectus, prominulumque
caput fig. 2. in quo dentes apparent.

T A B. V I I.

Tredecim figuræ priores APHRODITAM aculeatam cum Anato-
me fistunt.

*Fig. 1. APHRODITA integra minoris magnitudinis, a dorso &
latere spectanda ubi setæ laterum & pedunculi apparent.*

*Fig. 2. Eadem a ventrali latere, ubi os & pedunculi conspi-
ciuntur.*

*Fig. 3. Eadem, longitudinaliter secto & reposito velo textili,
dorsum obvestiente, ut appareant squamæ s. disci cartilaginei
dupli serie per dorsum dispositi. Alterius lateris squamæ re-
clinatae ad latus exhibentur, eo animo, ut sacculi dorsales ex-
primi possent.*

Cc 3

Fig. 4.

Fig. 4. Refert e majori specimine *squamam* dorsalem in altum sublatam, ut appareat sacculus dorsalis *a.* cui insidet ipsa *squama b.* indea pedunculo centrali *c.* linearis tractu adnata.

Fig. 5. Eadem *squama* cujus adhaesionem a centro ad marginem linearem littera *a.* indicat.

Fig. 6. Minores *squamæ*; *a.* penultima oblonga, *b.* ultima lanceolata, *c.* ex minoribus discoideis una.

Fig. 7. Exprimit resectum sacculum dorsalem, cui *branchiæ rudimentum* insidet.

Fig. 8. Idem *branchiæ vestigium* est, naturali magnitudine auctius.

Fig. 9. APHRODITA in dorso aperta, reclinato velo textili & squamis integumentisque *cc.* ut pateant viscera, ob contractiō nem morientis Aphroditæ conferta & adproximata:

a. *Ventriculus*, in quo longitudinaliter decurrit *vasculum continuatum* a *vena magna* intestinum legente, & *ramos longos* versus dorsum emittente.

bb. *Intestinum* cum pinnulis seu appendiculis congregatis per contractionem animalis.

Fig. 10. APHRODITA secta in qua, utpote lymphæ plena adeoque extensa mortua, apparent viscera distinctiora & explicata.

a. *Ventriculus* in situ naturali,

bb. *Intestinum æqualiter expansum*, versus anum adtenuatum,

c. *Vena magna* in intestino longitudinaliter decurrens,
&

& inter singulum par intestinorum coecorum exserens ramum longum, ad dorsum tendentem. Hæc vena tota cum suis ramis, in icona, chalcographi vitio, nimis distincta & crassa exhibetur; tenera enim est, & limpidissima.

dd. Sunt pinnæ intestini, seu *Intestinula coeca* utrinque versus saccos laterales & dorsales tendentia.

ee. *Squamæ dorsales* sunt, ad latera reclinatae, cum integumentis sectis &

ff. *Velo textili* supra dorsum expanso.

Fig. 11. Canalis alimentarius integer, corpore exemptus & explicatus.

a. Ligamentum seu *expansio musculosa*, cuius ope ventriculus ad dorsum necitur;

b. Anterior ventriculi extremitas,

c. Posterior extremitas infundibuliformis;

d. Initium Intestini contractum præternaturaliter,

e. Pars media intestini, supra modum excrementis dilatata,

f. Præfecta ejusdem extremitas,

ggg. Intestinula coeca, seu pinnæ intestini multiformes.

h. Aliqua ex vasculis, quæ vena magna in dorsi tegumenta mittit.

Fig. 12. Ventriculus transversim sectus, portione anteriore longitudinaliter quoque aperta & expansa.

a. Po-

- a. Posterior extremitas, ubi sectio monstrat cavum seu lumen ventriculi verticaliter compressum.
- bb. Internos planos & striatos parietes extremitatis anticæ, apertæ denotat.
- c. Margo aperturæ anticæ ventriculi, eidemque accum-bentes oesophagi plicæ.

Fig. 12. Ventriculus totam secundum longitudinem, cum portione intestini, apertus.*

- d. Parietes interni planiusculi,
- b. Posterior membranacea & plicata pars ventriculi, seu *infundibulum*,
- d. Oesophagus & labia ventriculi.

Fig. 13. Internam APHRODITÆ cavitatem, remoto integro canali alimentario, exhibet.

- aa. Sunt fasciae musculosæ dorsales,
- bb. Seriem muscularum brevium, interpeduncularium indicat, tum
- cc. Fascias abdominales,
- dd. Musculos obliquos laterum,
- ef. Truncum nerveum gangliis interruptum &
- g. Interne prominentes pedunculorum *antennas* indigitat.

Fig. 14. APHRODITAM squamatam refert,

a. A

- a. A dorso visam, ut squamarum duplex ordo appareat;
- b. A ventrali latere, ubi pedunculi conspicuntur;
- c. Squama est dorsalis, aucta magnitudine,
- d. Pedunculus ejusdem, cum cirrho & setarum fasciculo.

Fig. 15. Ad APHRODITAM *lepidotam*, sequenti *Tabula* quoque expressam, pertinet; significat

- a. Eandem totam ablatis plerisque a dorso squamis,
- b. Squamam ejusdem lente auctam, dimidia parte nigram,
uti plerumque in hac specie esse solent.

T A B. V I I I.

Aphroditæ variæ exoticæ, naturali fere magnitudine.

Fig. 1. 2. APHRODITA *lepidota* ab utroque latere.

Fig. 3. APRRODITA *cirrhosa* a dorsali latere squamifero seu vesiculifero.

Fig. 4. Eadem subtus conspicienda; in utraque figura a. denotat antennas, in posteriori b. locum caudæ subinterruptum, & a pictore sic, ut erat in specimine, delineatum.

Fig. 5. Portio *segmenti* vesiculiferi, cum suo pedunculo, cirrho carente.

a. Est squama quæ in vesiculam intumuit, a naturali situ reclinata.

b. Pedunculus setis terminatus.

D d

Fig. 6.

Fig. 6. Pedunculus segmenti unius non squamigeri, ubi

- b. Pedunculi basis,*
- c. Cirrus,*
- d. Fasciculus setarum major, &*
- e. Minor.*

Fig. 7. 8. APHRODITA flava prona & supina ; ubi a. anticam extremitatem , cum ore , antennulis & cristula, b. autem furcam seu pedunculos caudales denotat.

Fig. 9. Cristula ejusdem Aphroditæ, naturali major , ut distinctior sit.

Fig. 10. Branchia a latere superiori &

Fig. 11. A latere dorsum respiciente, villoso.

T A B. I X.

Fig. 1. NEREIS cylindraria CAPENSIS, tubo suo exempta;

- aa. Palmulae aureæ capitis,*
- bb. Antennulae majores,*
- c. Minores antennulae seu posteriores,*
- ee. Branchiae unius lateris binæ,*
- f. Segmenta tria priora protuberantia,*
- F. Area transversa rugosa, a dorso pone palmulas,*

g. Seg-

g. Segmenta duo prioribus succedentia;

b. Latus ventrale animalis;

i. Appendix caudæ scaphoïdea.

Fig. 2. Eadem intra tubum suum, solis palmulis a. prominula.

Fig. 3. NEREIS cylindraria BELGICA, intra tubum arenaceum, exsertis palmulis & antennulis suis, cirrhisque extra tubi oram pendulis.

Fig. 4. Eadem extra tubum, a ventrali facie exhibita.

Fig. 5. Eadem a latere & dorso spectanda.

Fig. 6. Eadem contracto & curvato corpore, qua forma, ubi tubo exturbatur vel viva in acetum spirituosumve liquorem mergitur, esse solet.

*Fig. 7. Ejusdem caput a ventre visum, ubi tophus *cirrborum* os animalis circumstantium appetat.*

a. Palmulæ aureæ;

bb. Majores &

cc. Minores antennulæ.

Fig. 8. Caput ejusdem a latere exhibitum, &

Fig. 9. Idem a dorso; in utraque iconē

a. Denotat palmulas,

- A. Limbum membraneum, fimbriatum, sub palmulis,*
- bb. Antennulas majores,*
- cc. Minores,*
- d. Cirrhus oris pendulus,*
- ee. Branchias utrinque geminas,*
- f. Faciem cavulam a dorso palmulis adsidentem, qua differt Belgica a Capensi varietate.*

Fig. 10. Appendix scaphoidea Varietatis BELGICÆ, a latere dorsali.

Fig. 11. Eadem ab inferiori latere.

Fig. 12. Viscera principaliora Varietatis BELGICÆ, corpore exemta & explicata.

Fig. 13. Eadem naturali magis situ exhibita. In utraque figura denotat

- aa. Corpuscula ovalia, œsophago utrinque adcumbentia,*
- bb. Intestinula fusca, ante ventriculum in arcum composita,*
- c. Ventriculum cucurbitacea figura singularem.*
- c-d. Intestinum primum, cum adnato dudu crasso, rubro, sanguiferi systematis trunco,*
- d-e. Intestinum secundum, adscendens,*
- e-f. Intestinum tertium, quod recta ad anum tendit.*

Fig. 14. *Tubus NEREIDIS conchilegæ e testaceorum fragmentis & lapillulis consarcinatus.*

Fig. 15. *Eiusdem speciei tubus arenulis extus obsitus.*

Fig. 16. *Minimus, quem unquam invenerim, hujus speciei tubus.*

Fig. 17. *NEREIS conchilega ipsa, qualem fese, cum tubo exturbatur, exhibet, cauda nempe in aliquot spiras contorta.*

Fig. 18. *Eiusdem caput, ut conspiciantur, cirrhos oris a. in cludentes, squamæ seu laminæ carneæ & quidem b. major interiorque, d. vero exterior lateralis. Hæc figura simul tæniam carnosam, abdominalem, a latere conspicendam præbet, quam litt. c. indicat.*

Fig. 19. *Itidem caput exhibet, a fronte & fig. 20. denuo a latere inspectum, ut squama turbinata oris pateat.*

Fig. 21. 22. *Branchias utriusque lateris exprimunt.*

T A B. X.

Fig. 1. *Depingitur NEREIS lutaria Americana, vario adspectu, qualemque fese, in vitro aqua marina pleno, viva exhibet.*

Fig. 2. *Est fragmentum Milleporæ alcicornis TUBOS geminos SERPULÆ giganteæ incrustantis; e quorum altero (qui insignem simul dentem, sed corallio incrustatum, monstrat) prominet animal expanso quasi flore a. in alterius summo contractum conspicitur b.*

Fig. 3. *SERPULA gigantea tubo extracta, integra, a latere conspicienda.*

Dd 3

a. Squa.

- a. *Squama magna, calycina, a dorso corporum branchia-
lum sita.*
- b. *Lacinia cuculli, a latere cucullum perficiens & feta
aurea centrata.*
- c. *Corpora scalaria s. branchiae.*
- d. *Tubæ pars depressa, utrinque alata, &*
- D.** *Extremitas unguiformis, in qua,*
- E.** *Cornicula majora, &*
- e. *Minora.*
- f. *Cucullus a dorso adnatus;*
- g. *Corporis fasciæ laterales latæ, striatæ, in dorso fe-
re contiguæ.*
- h. *Ventrale latus læve.*
- k. *Apex caudæ.*

*Fig. 4. Ejusdem pars antica, a ventrali latere visa, ubi tu-
ba tota & cuculli fissura notari possunt.*

*Fig. 5. Eandem exhibet a dorso, adeoque foliolum calyci-
num dorsale, quod plica corporibus branchialibus sepe interse-
rit, & cucullum a dorso maxime adnatum ob oculos ponit.
In his figuris significant*

- a a. Folium calycinum, a dorso branchias fovens & plica
iisdem intersertum;*
- bb. Cuculli lacinias productiores, quæ pro petalis calyci-
nis a ventrali latere adstant;*

c c. Bran-

- c. *Branchias* seu organa scalaria;
- d. *Tuba* stipitem ancipi-depressum, seu utrinque alatum;
- E. *Cornicula majora* & *minora*;
- e. *Minora*, summo tubæ unguiformi insidentia;
- fff. *Limbum* cuculli liberum,
- k. Aream qua cucillus maxime adnatus est;
- gg. *Fascias* laterum striatas,
- b. Latus abdominale lavigatum, tandemque
- i. Sulcum fascias laterales in dorso distinguentem.

Fig. 6. Organum scalare seu branchiale integrum, stratis barbularum arcte compositis, cum calycis laciinis a. b.

Fig. 7. Columella seu truncus scalæformis Branchiarum c. remotis quasi barbulis, quæ limbo continuo striato dd. continuantur, exhibitus, ut spiræ ipsius trunci planæ conspici queant. Calyx itidem adjectus est a. b.

Fig. 8. 9. 10. Singulas exhibent barbulas branchiales, diversarum longitudinum, microscopio auctas. Longior ex infima, proxima ex media spira, & ex summitate branchiæ minor desuntæ sunt; a. raphen earum, & b. fimbriam, stipitem organi spectantem, notat.

T A B. X.I.

Fig. 1. LUMBRICUS echinurus qui linguam amisit, exorrecto corpore, conspiciendus fere a latere ventrali, seu granulosiore, ubi uncinuli genitales siti sunt.

Fig. 2.

Fig. 2. Idem lingua adhuc instructus, a latere dorsali spe-
ctandus.

Fig. 3. Minor ejusmodi LUMBRICUS contractior, & in ro-
strum veluti constrictus, amissa lingua.

Fig. 4. Anterior LUMBRICI perfecti extremitas, a ventrali la-
tere, ubi & *uncinuli genitales*, & *cavum linguæ latus*, raphe
longitudinali notatum, conspici possunt.

Fig. 5. Cauda LUMBRICI *echiuri* a dorso, spinarum aurearum
corona dupli circumdata.

Fig. 6. Eadem a ventrali latere, ubi spinarum series de-
ficiunt.

Fig. 7. 8. LUMBRICI *marini* species, oxyura.

Fig. 9. Alia LUMBRICI *marini* species, tota atra.

Fig. 10. ACTINIA *Doliolum integra*.

Fig. 11. Ejusdem corolla granulosa &

Fig. 12. Anus.

T A B. X I I I.

Fig. 1. TÆNIA *hydatigena* subglobosa, corpore ad bullam
sessili. Transparens chalaza in figura distincta apparet.

Fig. 2. Alia subglobosa, bulla collo adtenuato instructa.

Fig. 3. Alia cujus bulla transversim ovalis, longoque & te-
reti collo prædita est. Transparet & hic chalaza subclavata c.

Fig. 4. Alia ovalis, collo bullæ laxo dilatato singularis.

Fig. 5.

Fig. 5. *Alia oblonga, majusculo corpore, magnitudine naturali.*

Fig. 6. *Alia, collo bullæ teretiusculo, exili. Hæc corporis apicem a. exsertum, & transparens coagulum, e gelatina lymphæ admixta natum b. exprimit.*

Fig. 7. *Alia, longitudinaliter secta, in qua molecula a. inventa fuit, quæque præterea scirrho b. chalaza quasi secundaria instruēto singularis erat. Stria gelatinosa a corpore prominens c. in hacce figura pulchre appetit.*

Fig. 8. *Sistit adspicuum corporis hujusmodi TÆNIÆ, adhuc contracti & papilliformis.*

Fig. 9. *Est caput microscopio auctum Hydatidis fig. 6. expressæ.*

Fig. 10. *Lente auctum caput hujusmodi TÆNIÆ ex mesenterio porcino, collo elongato linearis notabile; a. denotat rostellum spinulis coronatum, bbb. papillas quæ rostelum circumstant. a. Idem est caput magnitudine nativa.*

Fig. 11. *A latere & a fronte expressum caput TÆNIÆ hydatigenæ hepatis murini.*

a. Itidem denotat rostellum quasi calculis coronatum, &
bbb. Papillaria quatuor oscula, quæ caput subquadragulum efficiunt.

Fig. 12. *TÆNIA hepatis murini magnitudine naturali, quammaxime exorrecta, capite a. nudis oculis conspiciendo & bulla b. per exigua.*

Fig. 13. Minor alia, in qua itidem caput a. distinctissime apparet, & bulla b. paulo major est.

T A B. X I I I.

Fig. 1. PENNATULA *Cynomorium*, slipitem a-b. lavis, nuda; corpore b-c. granulosa & flosculis obsita.

Fig. 2. Flosculum supra naturalem magnitudinem sic representat, ut osculum & octo petala appareant.

Fig. 3. Alium refert totum exsertum, in quo a. tubus, b. vero petala indicat.

Fig. 4. Distorti flosculi est, ubi pariter a. tubum, b. petala denotat.

Fig. 5. PENNATULA *phalloides* longissimo slipite a-b. & corpore cylindrico b-c.

Fig. 6. Eadem longitudinaliter secta, ut appareant cellulæ, & officulum a-c. & fulcus pro officulo b.

Fig. 7. 8. Flosculi hujus PENNATULÆ lente aucti, tubo a. brevi, & petalis b. octonis denticulatis instructi.

Fig. 9. Officulum ejusdem Zoophyti, a latere planiori, ut & transversim diffractum; sectionis quoque forma ad a. expressa est.

T A B. X I V.

Fig. 1. ANOMIA *disculus*.

a. A latere inspecta, fragmento rupis adhærens.

b. A

- b. A cardine,
- c. A superficie planiori,
- d. Ab inferiori latere visa;
- e. *Valvulae inferioris* adspectus interior, exhibens *furcam* ab animali substantia depuratam,
- f. Eandem cum animali adhuc adhaerente sistit,
- g. Autem *valvula* superiore ad cardinem excisam.

Fig. 2. ANOMIAE rubræ specimen maximum, integerrimum, a latere valvulae minoris, cum adhaerente portione *Balani*, cui infederat.

Fig. 3. Idem specimen a fronte &

Fig. 4. Inverso situ.

Fig. 5. Aliud ejusdem *specimen* semidiscoideum, a planiori valvula, idemque

Fig. 6. A latere &

Fig. 7. Alio quoque situ, cum adhaerente itidem *Balani* fragmendo.

Fig. 8. Ejusdem speciminis adspectus internus, ut planiori valvula insidens *furca* a. & *tendines* duo solidiores b. cavæque portionis incisura inter cardines appareat.

Fig. 9. Aliud *specimen* e maximis, ruberrimum, scabrum, & vitiatum.

Fig. 10. 11. Specimina minora, quorum prius in superiore valvula vitiatum, utrumque vero cardinis hiatu insigne.

Fig. 12. CICADA *globulifera* naturali mole.

Fig. 13. Ope lentis paulo auctior.

Fig. 14. Ejusdem singularis capiti impositus apparatus,
atque

Fig. 15. Ala microscopio visa.

Fig. 15.* ONISCUS *Locusta*.

Fig. 16. 17. ONISCUS *chelipes* a latere & a dorso spe-
ctandus.

Fig. 18. 19. ONISCUS *conglobator* extensus & conglobatus.

Fig. 20. ONISCUS *volutator*.

Fig. 22. ACARUS *marinus* seu POLYGONOPUS dorso incum-
bens.

Fig. 22. Aliud ejusdem specimen, pedibus insistens, & in po-
sticorum pedum alterutro Sertulariarum primordiis obsumum.

Fig. 23. Idem animal a dorso inspectum:

a. *Rostrum*,

b. *Antennulæ rostro insidentes*,

c. *Collare* cui rostrum implantatur,


d d d d. *Segmenta corporis quatuor*,

e. *Stylus* inter posticos pedes.

Fig. 24. Fuci ad opusculi calcem descripti, anomali ramulus
naturali magnitudine.*

Fig. 24. Ejusdem ramus lentis ope visus.

Fig. 25. ONISCUS Gammarellus.



Quæso ne hæc legentes, quoniam ex his spernunt multa, etiam
relata fastidio damnent; quum in contemplatione Naturæ ni-
hil possit esse supervacaneum.

PLIN. hist. mund. lib. XI. cap. 2.


C O N T E N T A.

1. ANTILOPE <i>Grimmii</i>	Pag. 1.
2. APER <i>aethiopicus</i>	16.
3. CAVIA <i>capensis</i>	30.
4. VESPERTILIO <i>soricinus</i>	48.
5. SCIURUS <i>petaurista</i>	54.
6. Genera MYRMECOPHAGÆ & DIDELPHIDIS non esse novo orbi peculiaria	59.
7. GRUS <i>crepitans</i> seu Psophia LINNÆI	66.
8. APHRODITÆ	72.
Aphrodita <i>aculeata</i>	77.
Aphrodita <i>squamata</i>	91.
Aphrodita <i>lepidota</i>	94.
Aphrodita <i>cirrhoſa</i>	95.
Aphrodita <i>flava</i>	97.
Aphrodita <i>carunculata</i>	102.
Aphrodita <i>roſtrata</i>	106.
Aphrodita <i>complanata</i>	109.
9. NEREIDES	113.
	Ne-

	Pag.
<i>Nereis cylindraria</i>	117.
<i>VARIETAS capensis</i>	118.
<i>VARIETAS belgica</i>	122.
<i>Nereis conchilega</i>	131.
10. <i>SERPULA gigantea</i>	139.
11. <i>LUMBRICUS echiurus</i>	146.
12. <i>ACTINIA Doliolum</i>	152.
13. <i>TENIA hydatigena</i>	157.
14. <i>PENNATULÆ</i>	175.
<i>Pennatula Cynomorium</i>	176.
<i>Pennatula phalloides</i>	179.
15. <i>ANOMIÆ</i>	182.
<i>Anomia rubra</i>	ibid.
<i>Anomia disculus</i>	184.
16. <i>INSECTORUM Descriptiones</i>	186.
<i>Cicada globulifera</i>	187.
<i>Acarus marinus seu Polygonopus</i>	188.
<i>Onisci cancriformes</i>	190.
17. <i>FUCUS anomalus.</i>	196.



COR-




CORRIGENDA NECESSARIA.

- Pag. 12. *lin. 10.* *Antilopen Grimmiam l.* *Moschum pygmæum.*
 — 21. — 2. *Aros l.* *Apros.*
 — 52. — 3. *fimbria l.* *fimbriam.*
 — 116. — 17. *Tab. IX.* 1. *Tab. X.*
 — 118. — 2. — *VIII. l.* — *IX.*
 — 122. — 20. — *VIII. l.* — *IX.*
 — 127. — 16. *octavæ l.* *nonæ.*
 — 131. — 17. *Tab. VIII. l.* *Tab. IX.*
 — 134. — 15. — *VIII. l.* — *IX.*
 — 141. — 8. — *IX. l.* — *X.*
 — 142. — 12. — *IX. l.* — *X.*
 — 154. — 1. — *X. l.* — *XI.*
 — ead. — 7. — *IX. l.* — *XI.*
 — 163. — 7. — *X. l.* — *XII.*



Tab. 1.



J. J. Bylaert Fec.






A. Schouman del.


S. Fokke sc.



A. Schouman del.


S. Fokke sc.









J.S. Bylaert fec.







A. Scheouman del.


R. Huyg sc.





















Fig. 1.




Fig. 2.




Fig. 10.




Fig. 8.




Fig. 7.



Fig. 6.



Fig. 3.

Fig. 4.



Fig. 5.




Fig. 1.




Fig. 3.



Fig. 2.



Fig. 5.



Fig. 6.

Fig. 4.



Fig. 7.



Fig. 11.

Fig. 8.




Fig. 9.




Fig. 12.

Fig. 10.








Fig. 3.




Fig. 7.



Fig. 5.

Fig. 6.



Fig. 4.



Fig. 1.




Fig. 2.




Fig. 11.




Fig. 12.



Fig. 9.




Fig. 10.





Fig. 13.



Fig. 8.







29



